

DIKUNZI



Mu ke na kiese na kuvwanda awa na suka yayi, mpe kuwa malongi yayi ya kuleba, na yina kaka mu vwandaka kwiza na estrade. Pardo samu mu me kwiza na nsukinina. Kasi ya vwandaka na bambevo na manima kuna, na kati ya matoma, mutindu, ambulance mosi, mpe—mpe mu kuzwaka ntangu ya kukipe bayina lendaka ve kukota, beno me mona, ntete mu kota.

² Ntangu yayi, mu ke kukiyufula kana mpangi-kento yina kele na mwana ya fioti, kana yandi lendaka kwisa vutuka ve na manima ya midi yayi. Mu zola kulonga na nkokila yayi, diaka, kana Mfumu kuzola. Kana yandi lendaka ve kuvutuka samu na mbiekolo na ntangu yina, na yina ata ti mu me telama mingi ntangu yayi, mbote, beno tuba na yandi, yandi lendaka nata bébé yango ntangu yayi. Kasi kana yandi lenda vutuka, na nkokila yayi, ya ke vwanda mwa mbote mingi, samu na beto. Kasi bika beto sala nionso yina yandi me zola, konso kima ya kele. Na yina, kana yandi lendaka vutuka ve, beto ke nata mwana yayi ya fioti ntangu yayi samu na mbiekolo. Mpe ntangu yayi, nionso yayi, na yina mu ke tuba, kana yandi zola kwisa ntangu yayi, mpe yayi lendaka vwanda ntangu ya mbote.

³ Ntangu yayi, na nkokila yayi, ya kele na kima mosi ya kuswaswana mingi, mu—mu zola kuzonzila dilongi mosi na nkokila yayi, ya ke vwanda nsangu ya profesi ya: *Tata, Yayi Kele Ntangu?* Na yina kana Mfumu kuzola, mu ke zola kuzonzila dilongi yayi na nkokila yayi. *Yayi Kele Ntangu, Tata?* To, *Tata, Yayi Kele Ntangu?* mu zola tuba. Mpe na yina mu zola kubaka ntangu ya mbote yayi, na ntwala ya dibuundu. Na yina, bima mingi me salama na mwa bilumbu yayi ya nsuka, yina ke vukana na kima mosi ya nene yina mu ke bakula ve. Kasi beto kele, ntangu nionso. . . Banzila ya Nzambi me luta lubakusu ya muntu, na yina beto fwana tambula kaka na lukwikilu. Kana muntu mosi lendaka tendula Nzambi, na yina ya ke vwanda na mfunu diaka ve na kuvwanda na lukwikilu, samu beno—beno zaba yawu. Kasi beto ke tambula kaka na lukwikilu.

⁴ Mpe na suka yayi, mu banzaka ti mu ke meka kuvwanda na kisalu ya kumwangisa nsangu ya mumesanu, samu, mu me soba dibanza ya munu na manima mu me kwisa awa mpe mu me mona bantu mingi ya kutelama, mpe yina vwandaka vingila kubanda ntama. Mpe na yina, na nkokila yayi, mu banza ti ya ke vwanda na bantu fioti kulutila yayi awa, mpe na manima mu lendaka kwenda na ntwala na yayi na yina mu zola kutuba.

⁵ Kima mosi mu ke zola kutuba, na na yina mingi ya bawu kele ya kuvukana, mingi ya beno kele ya kuvukana. Ya kele kima yina mu me zabisa ve na mwa basabala yayi me luta. Ya

kele, bisambu ya beno me kuzwa mvutu samu na diambu ya mpaku yina mu vwandaka na yawu na luyalu. Ya me yidama. Mpe na yina beto kele. . . Yawu—yawu nyonso me manisa ntangu yayi. Mutindu mingi na kati ya beno kubakulaka yina ba vwandaka telemina munu vwandaka ba-chèque yina vwandaka samu na ba-campagne, mpe kasi bawu mekaka na kutuba ti yina vwandaka ya munu. Mpe ba zolaka munu kufuta mbongo bankama tatu na makumi tanu ya mafunda ya ba-dollar ti ya kele kimvwama ya munu mosi, mpe ya vwandaka ve. Ya vwandaka ya campagne. Mpe dibuundu zaba yawu. Beno nionso zaba yawu. Mpe na nsuka ba kumaka na kisika yina . . .

⁶ Mu ke tuba na beno kaka mwa disolo ya mambu yina me salama. Bawu lutisaka pene ya bamvula, tatu to tanu, pene ya bamvula tanu, mu banza, samu na diambu yayi, mpe kukwenda mpe kuvutuka, na kutalaka kikalulu mpe bima nionso. Kasi mu ke vutula matondo mingi ti ba lendaka ve kumona kima mosi ya yimbi na munu, na yina ba lendaka ve kufunda munu samu na yawu. Na yina ya vwandaka ve na kima yina ba lendaka kufunda munu, kaka, bawu tubaka, kaka kukondwa kuzaba ya munu—ya munu, ya munu mosi, mu banza, na kukondwaka kuzaba mingi samu na yina me tala musiku. Ba vwandaka natila munu ba-chèque, mu vwandaka tula nkumbu ya munu, mu vwandaka tula yawu na campagne. Kasi na yina, kaka na ntangu yina mu vwandaka tula nkumbu ya munu na zulu ya yawu, yawu vwandaka ya munu, beno me mona. Ata ti. . . Yandi tubaka, “Yina kele mbote mingi samu na nge, mutindu yayi. Kasi yawu kele ya nge, mpe na manima ntangu nge pesaka yawu na dibuundu. Kasi ntangu nge tulaka nkumbu ya nge na zulu ya yawu, ya vwandaka ya nge, kukondwa kutala yina vwandaka kosalu ya yawu. Ba sonikaka yawu na nkumbu ya nge.” Na yina. . . mpe kana ba tulaka kuna. . . kana muntu mosi sonikaka kuna, “dikabu ya munu mosi,” ya zolaka vwanda mbote mingi. Kasi bawu sonikaka, “William Branham.” Beno me mona? Mpe na ntangu mu tulaka nkumbu ya munu na zulu ya yawu, yimeni. Nionso vwandaka kuna. Na yina bawu vwandaka. . . Mpe na yina na nsuka na bisambu. . .

⁷ Mpe ntama mingi ve, beno zaba, bawu. . . Mu kuzwaka vision ti bakala mosi, ya ntela ya nene, ya ndombe, yina me kumaka ndombe na mulinga, ndombe ya mvindu ya mulinga, mutindu ngandu ya nene, kwisaka, na ntwala ya munu, na misapi ya bisengo. Mu bakaka mwa mbele mosi, mutindu yayi. Mpe ba sonikaka na zulu ya yandi, “Luyalu ya Etats-Unis.” Mpe mu lendaka sala kima mosi ve. Mu vwandaka na ngolo ve. Mpe na manima Mfumu kotaka na kosalu, mpe ba nungaka yandi. Mpe beno ke bambuka moyo ti mu tubaka na beno mambu yina, kubanda ntama.

⁸ Mpe bawu sala ngwisani, kilumbu yina. Mpe nzonzi ya munu, Tata Orbison na New Albany, mpe Ice mpe Miller

na Indianapolis, samu na diambu ya mpaku, bokilaka munu, mpe tubaka na munu, “Kwisa.” Mpe mu kwendaka kuna, Mpangi Roberson mpe munu, mpe kento ya munu, mpe ba-administrateur ya dibuundu awa, mpe beto nionso. Beto kwendaka kuna. Mpe bawu tubaka na beto ti bawu vwandaka, luyalu, vwandaka zola kuwisana.

⁹ Mpe mu tubaka, “Munu, kana mu ke defa kima na muntu, mu ke futa yawu. Kasi mu ke sala nionso mu lenda sala. Kasi,” mu tubaka, “Mu ke defa yina ve.” Mpe na yina mu tubaka, “Mu—mu. . . Ya kele, na kieleka. Nzambi zaba. Mpe samu na yinki ba ke funda munu ve, na yina, kana mu zaba diambu?” Mu tubaka, “Bawu vwandaka meka na kusala yawu bamvula tanu, kasi bawu monaka kima mosi ve ya kusala na yawu.” Na yina mu tubaka, “Ve, mu me manga. Mu ke futa yawu ve tii kuna ba ke talisa ti mu fwana pesa yawu.”

¹⁰ Mpe na yina nzonzi kotisaka munu mpe tubaka na munu, mpe yandi tubaka, “Ntangu yayi, beto lenda meka kunata diambu yango na tribunal. Luyalu ke meka yawu.” Mpe tubaka, “Na ntangu yina, kima mosi kaka ba lendaka mona samu na kutelemina nge, vwandaka ti nge. . .” Na yina munu, ti, mutindu mu salaka yawu. Mu salaka ve. . .

¹¹ Mu zaba kima mosi ve na yina me tala kubumba mbongo, na yina mu zolaka sala yawu mutindu mu banzaka vwandaka ya kusungama. Mpe ba me tulaka yawu—yawu ata fioti ve na banque na nkumbu ya munu. Ba ke tulaka yawu ntangu nionso na nkumbu ya dibuundu samu na campagne mpe nionso yina, beno me mona, na yina ya vwandaka ve kima yina mu zolaka sala samu na yawu. Mpe mu. . .

¹² Yandi tubaka, “Mbote, ba ke zola kusala ngwisani, samu na ba-dollar mafunda kumi na tanu, na kitumbu ya ba-dollar mafunda kumi.” Mpe mbongo ya kufuta nzonzi vwandaka mafunda kumi na tanu. Yina ke sala mafunda makumi yiya. Mpe na yina bawu zola diaka tanu, mu banza ti ya kele ntangu yayi. Na yina mu kwendaka. . .

¹³ Mu tubaka, “Wapi sika na yinza mu ke kuzwa ba-dollar mafunda makumi yiya?” Mu tubaka, “Beno zaba, compte ya munu na banque awa, ba me tuba ti ya kele na ba-dollar pene ya nkama mosi, to mu banza na nsi ya yina.” Mu tubaka, “Wapi sika mu ke kuzwa ba-dollar makumi yiya na ndambu?” Mpe mu tubaka, “Mu ke na kima ve ya kusimbisa. Mu ke na yawu ve. Yimeni.”

¹⁴ Mpe yandi tubaka, “Tata Branham,” yandi tubaka, “tala yina yawu kele. Kana beto meka kunata diambu yayi na tribunal,” yandi tubaka, “ya kieleka beto lendaka kuzwa lunungu ya diambu yango.” Yandi tubaka, “Kasi tala yina ya kele. Beto lenda kuzwa lunungu, samu tala yina mu ke sala. Ba ke tuba ti nionso yina kele ya nge samu nge me tula nkumbu ya nge na zulu ya

yawu. Mpe bawu ke tuba ti ya kele ya nge, ata ti ba tulaka yawu na banque na nkumbu ya campagne, ya dibuundu, campagne ya Branham, mpe na manima ya dibuundu.”

¹⁵ Ata mbala mosi ve, ba me kuzwa centime mosi yina mu me sadila munu mosi. Ya kele kieleka. Nzambi zaba. Ya kele na babakala yina me vwanda awa ntangu yayi, yina vwandaka na munu ntangu yayi nyonso. Ya vwandaka ve na centime mosi yina mu me sadilaka munu mosi. Ya vwandaka nionso samu na Kimfumu ya Nzambi, bisika nionso, ba-cheque nionso, bima yankaka nionso.

¹⁶ Kasi, beno me mona yawu, kasi yina kele diambu ve. Ya vwandaka—ya zolaka vwanda ya munu, ntete, mpe na manima ya vwandaka ya dibuundu, mpe ya campagne. Mpe bawu kele na mutindu ya kusala yawu, beno zaba, mutindu nionso ya kubasikila bawu lendaka sala. Na yina mu tubaka, “Mbote, mu—mu ke sala yawu ve.”

¹⁷ Mpe yandi tubaka, “Mbote, kana beto nunga diambu yina, samu, mu ke—mu ke tuba ti ya kele ‘makabu ya nge mosi.’ Beno me mona? Mu ke tuba yawu, na luyalu, mutindu ‘makabu ya munu mosi.’” Mpe yandi tubaka, “Na yina, ntangu mu ke sala mutindu yina, yina nionso ke vwanda na zulu ya ba-dollars mafunda kumi ke vwanda difwa. Mpe na yina nge ke vwanda kuna na kati, mpe ba ke kanga nge diaka bamvula tanu samu na kutala nionso yina.” Beno me mona? Ntangu nge ke sonika chèque mosi, ya ke luta na kivinga ya kufiongonina. Ba ke sala yawu kopi, chèque yina. Na yina, mu vwandaka na ba-chèque nionso yina lutaka kuna. Na yina bawu tubaka, “Ya kele kisika yina, ba ke kanga nge diaka.”

¹⁸ Mpe yandi tubaka, “Kima yankaka, Tata Branham, kana nge, ba me bokila nge na luyalu, mutindu yina, samu na kufiongonina diambu yango, ata ti nionso yina nge ke sala, na meso ya bantu, ‘Nge kele muyibi.’ Beno me mona? Kasi yawu yina kaka.”

¹⁹ Beno tala longi yayi ya ntwenia ya Baptiste kuna na Mississippi, bakala yayi. Kento mosi tubaka ti yandi kotaka mpe fingaka yandi. Mpe bakala yina nataka nzikisa na kati ya yinsi mpe bisika nionso, ti yandi vwandaka ve na kati ya mbanza, bilumbu na ntwala, kilumbu, to na manima ya kilumbu yina, na mutindu ti nzonzi zolaka balukila kento yayi mpe kulandila yandi samu na diambu ya luvunu. Yandi tubaka, “Bika yandi kwenda.”

²⁰ Mpe ntangu ba talaka mbote-mbote *Diambu* yayi, na yinsi ya muvimba, beno zaba yina salamaka? Bantu makumi sambwadi na tanu na zulu ya nkama mosi ya ba-American tubaka, “Kisika ya kele na mulinga, ya kele na tiya.” Mpe bakala yayi ya mputu, yina zabaka ve diambu mutindu munu, to muntu yankaka, ke

vwanda na diambu yina luzingu ya yandi ya muvimba, ntangu yandi zaba kima mosi ve na yawu.

²¹ Mu kuwaka yimbi mingi, mwa ntangu fyoti, samu na kubanza ti mu pesaka luzingu ya munu na Kimfumu ya Nzambi, samu na kumeka na kusala ti, bantu kufuta bampaku ya bawu mpe kusala bima, mpe kusala yina kele mbote, mpe kusala ti miyibi kukuma bantu ya mbote; mpe kuvwanda mutindu muyibi, munu mosi. Mu banzaka, “Yinki mu me sala na yinza?”

²² Mpe na manima ya kwisaka na munu, mpe mu talaka na kati ya Biblia. Muntu nionso na kati ya Biblia, kukatula muntu mosi ve, yina salaka kisalu ya kimpeve, kana Satana lendaka ve kuzwa bawu na bumuntu to kima mosi, luyalu kuzwaka bawu. Beno vutuka kaka tii na kisika yina beno me zola, tii awa: Moïse, Daniel, bana ya ba-Hebreux, Jean-Baptiste. Yesu Klisto kufwaka na nzila ya muyadi, na kitumbu ya lufwa. Paul, Pierre, Jacques le Grand, Jacques le Mineur, bawu nionso kufwaka na nzila ya luyalu.

²³ Samu, yawu kele, konso luyalu, kiti—kiti ya Satana. Yesu tubaka mutindu yina. Biblia me tuba yawu. Beno me mona? Konso luyalu me twadisama na diabulu. Ya kele na luyalu ke kwisa yina ke twadisama na Klisto, kasi ya kele na Millenium. Kasi yayi, baluyalu yayi ya ntangu yayi, ata wapi mutindu mbote beto ke banza ti ya kele, kasi, na mukongo ya yawu, yawu—yawu me twadisama na Satana. “Bimfumu yayi,” yandi tubaka, “kele ya munu. Mu ke sala na yawu nionso yina mu zola sala. Mu ke pesa yawu na Nge, kana Nge ke sambila munu.”

²⁴ Yesu tubaka, “Katuka awa, Satana. ‘Nge ke sambila Mfumu, mpe Yandi kaka nge ke sadila.’”

²⁵ Mpe na yina mu sukaka ntima. Kento ya munu ke kuwa munu. Mu kwendaka na ntwala, mu tubaka, “Ve, tata. Munu, kana mu fwana kuzwa yawu, mu ke futa yawu. Mu ke pesa yawu ve, mpe mu ke futa yawu ve. Yimeni.” Mu tubaka, “Wapi mutindu mu lenda futa yawu, na mutindu nyonso?”

²⁶ Na yina, mu kwendaka na yinzo. Mu tubaka, “Meda, sukula kizizi ya bana. Kubika bilele ya bawu. Mu ke kwenda.” Mu tubaka, “Bawu ke zola ve. . . Mambu nionso, kele ya kuvwalangana.”

²⁷ Mu tubaka, “Yinki mu me sala? Tuba na munu.” Mu tubaka, “Kasi, munu, mafunda makumi yiya ya ba-dollar? Fiou! Nge ke na kubakula ve yinki ya zola kutuba samu na munu.”

Mpe yandi me kwiza, mutindu mwa kento ya lutondo zolaka, yandi tubaka . . .

Mu tubaka, “Mu ke kwenda.”

²⁸ Yandi tubaka, “Nge ke banza ti yina ke sala kima mosi ya mbote? Nge me sambila ntete samu na yawu?”

29 Mu banzaka, “Mbote, mu banza ti mu ke sambila diaka.” Mu vutukaka na bureau ya munu. Ya monanaka ti Yandi tubaka na munu, Disonuku mosi.

30 Ntangu nionso, beto zola tala Masonuku, yina Nzambi salaka samu na yawu, beno me mona.

31 Mpe kilumbu mosi, ba yufulaka Yandi, beno zaba, na kumekaka—na kumekaka na kufunda Yandi na luyalu. Bawu tubaka, “Ya kele mbote samu na beto ba-Juif ya kimpwanza na kufuta kitadi to mpaku na César?”

Yandi tubaka, “Nge ke na centime ya mbongo?” Yandi tubaka, “Ya kele na bisono ya nani na zulu ya yawu?”

Ba tubaka, “Ya César.”

32 Yandi tubaka, “Na yina beno pesa bima ya César na César. Mpe na Nzambi, bima yina kele ya Nzambi.”

33 Mu banzaka na yawu. Mu zibulaka Biblia mpe tangaka yawu. Mu banzaka, “Ya kieleka, Mfumu, ya kele mbote. Kasi *yayi* kele ve samu na César. Yayi kele ya Nge. Ya kele ve ya César. Kana ya vwandaka ya munu, mu zolaka futa mpaku mingi to kima, mbote, yina zolaka vwanda ya kuswaswana, ti ya vwandaka ya César. Kasi, *yayi*, yayi kele ya Nge. Beno me mona? Mpe yawu—yawu vwandaka ve ya César, na kisika ya ntete.”

34 Beno zaba, Yandi ke vwandaka ntangu nionso na mvutu na kati ya Ndinga. Mu tangaka kaka fioti na ntuala, mpe Yandi tubaka, “Tala, Simon, nge kele ve na ndobo na kati ya posi ya nge?” Beno me mona? “Nge ke vwandaka ntangu nionso na ndobo mpe nsinga. Mpe mu me tula mbongo na suka yayi, na banque yina bambisi ke kebaka kuna na—na nzadi, beno zaba.” Yandi tubaka. . . “Mu me tula mbongo, mpe ya kieleka kibumbi mbongo na banque ke kupesa yina yandi kele na yawu. Kulumuka kaka kuna mpe losa ndobo na kati ya nzadi. Mpe ntangu nge ke kuma na banque, zibula yinwa ya yandi, beno me mona, mpe yandi ke—yandi ke pesa palata. Beto tesa bawu disakuba ve. Beto kota bawu nsoki ve. Nge me mona? Kwenda sumba yawu, Simon. Ya ke vwanda samu na Munu mpe nge.”

35 Mu banzaka, “Ya kieleka, Nzambi. Nge kele na ba-banque yina me kebama na bambisi mpe bima yankaka, na yinza ya muvimba. Mu zaba ve mutindu ya ke salama.”

36 Kasi beto kwendaka kuna. Mu bakaka bampangi ya babakala awa na kati ya dibuundu yina vwandaka na manima ya munu, mpe sonikaka mukanda ya kubasisa mbongo, mpe mu bakaka ba-dollars mafunda makumi yiya, mpe mu futaka yawu.

37 Mu kwendaka na yinzo. Mu zolaka zaba mutindu mu sonikaka chèque yina, kana ba zolaka tula kizitu na zulu ya munu. Mu tubaka, “Yayi ke tuba ti mu ke na kimpwanza ya mpaku nionso. Mbote, muntu yina nionso ke ndima kizitu yina, ke vwanda ya kieleka na mvwaka na manima ya yina.” Mu

bokilaka mingi na allo-allo, na banque, samu na kutala kana ba lendaka kusala yawu.

Mpe, na nsuka, Bob tubaka na munu, yandi tubaka, “Billy, bawu me ndima yawu.”

³⁸ Mu kotaka na kati ya kivinga mpe tulaka diboko ya munu na zulu ya kento, mu tubaka, “Cherie, mu kele na kimpwanza.” Wapi nsatu yayi ya mbote, kuvwanda na kimpwanza!

³⁹ Mpe na yina mu lendaka kufuta yawu ntangu yayi, ba me kumisa diambu yango kukondwa mpasi samu na munu. Mu lendaka kuvutula ba-dollar mafunda yiya na mvula mosi. Ntangu yayi, mu lendaka ve kuyenga-yenga diaka, bankundi ya munu. Mu fwana basika mpe kukwenda kusala kisalu. Na yina mu—mu. . . Ya ke lomba munu bamvula kumi samu na kuvutula yawu. Mpe kana—kana Yesu kukwisa ve. Mpe na yina, ntangu Yandi ke kwisa, ba ke futa bamfuka nionso na ntangu yina. Beno me mona? Na yina, kuna mu—mu banza ti beno nionso. . . Bisambu ya beno. . . Mpe, na nkokila yayi, mu ke landila kaka na kima yina mwa fioti. Kasi bisambu ya beno me sadisa munu. Matondo na beno, mingi. Nzambi sakumuna beno. Ata ti beto kele konso kisika yina, mu ke zimbana yawu ata fioti ve.

⁴⁰ Na nkokila yayi, kana Mfumu kuzola, mu ke zola tubila mwa mambu yina mu zaba. Mpe beno ya kieleka ti beno ke kwisa. Ntangu yayi, beno bambuka moyo: *Batata, Wapi Ntangu Yawu Me Kuma?*

⁴¹ Ntangu yayi, beto ke. . . Mu ke kwikila, ba kele na manaka ya kufuluka samu na kitini ya. . . sabala yayi. Mpe Kilumbu ya ntete na nkokila kele. . . Bisalu, na nkokila yayi, bubu yayi mpe na nkokila yayi, mpe na Kilumbu ya ntete. Kilumbu ya ntete na nkokila kele kisalu ya kulala ve. Mpe—mpe na manima yina ke pesa beno Kilumbu ya zole, Kilumbu ya Mvula ya Malu-malu; kana beno kele na nganda ya mbanza, beno lenda vutuka na yinzo.

⁴² Mpe beto ke vwanda na mwa balongi ya mbote awa ntangu yayi samu na lukutakanu yina. Beto, kimvuka ya nene ya banzonzi ya kitoko, mpe muntu nionso ke tuba na ntangu ya yandi, tii na kati-kati ya mpimpa. Mpe bantangu yankaka bawu ke bakaka mbundana, kana ya kele na nzila. Mu zaba ve kana bawu ke sala yawu ntangu yayi, to ve. Na yina ba ke sala bankinzi, mpe ba ke boka, mpe ba ke bula bakano, mpe ba ke kunwa, mpe ke sala mambu ya yimbi, beto ke baka mbundana. Amen. Beto ke banda Mvula ya Malu-malu na mutindu ya mbote, na mbundana. Ntangu yayi, beno nionso ba me bokila. Mpe mu banza ti, beno, Nzambi ya mazulu ke pesa beno ntangu ya mbote ya kuvwanda kuna kana beno lenda.

⁴³ Ntangu yayi, na ntwala beto belama na Ndinga, mu zola tuba mutindu yayi, mpe, ya kieleka mu ke tonda dibuundu yayi, bamambeke ya yawu, samu na kazaka yayi ya kitoko yina beno

me natila munu. Matondo na beno, mingi. Yina me tuba mingi samu na munu. Bakalati ya beno nionso mpe bima yina me kuzwa na nsungi ya Noël, mpe makabu yina beno me fidisa na dibuta ya munu, mpe, oh, mu, ya vwandaka kulutula mingi samu na munu. Mpe mwa matona yina lenda ve kusimba na kati ya ntima ya munu, kima mosi ve lendaka simba ntima ya munu, samu na kuzaba ti yawu me katuka na beno. Mpe bayankaka na kati ya beno me fidisa na munu mwa makabu ya bawu ya Noël na mbongo.

⁴⁴ Mpe bayankaka na kati ya bawu me fidisa. Mpangi-bakala mosi me fidisa munu portefeuille, mpe ya vwandaka na nkumbu ya munu na zulu ya yawu. Mpe mwa mpwasa mosi ya fioti yina beno lendaka tala na kati; ya vwandaka na Kisambu ya Mfumu na kati ya yawu. Mpe, oh, bima ya mutindu yayi, ya kele kaka, yina kele na mfunu mingi samu na beto. Kento ya munu mpe munu, mpe bana zola kutuba na beno, “Matondo, mingi.” Ya kele fioti mingi. Kasi mu ke tuba mutindu yayi, yayi kele ndinga ya kulutula nene mu banza ti muntu mosi lenda tuba, “Nzambi sakumuna beno.” Ya kele ve na kima mosi ya kulutula kitoko.

⁴⁵ Ntangu yayi, mpe na bampangi yayi awa na yinzo-Nzambi, yina sumbaka munduki yina, Mu—mu lwataka kazaka ya munu, kasi mu—mu lendaka ve kunata munduki na yinzo-Nzambi. Kasi ya vwandaka . . . Ba zolaka vwanda kieleka na kima mosi samu na kutelemina munu na ntangu yina, mutindu yina ve? Na yina mu—mu—mu ke tonda beno, bampangi ya munu. Mpe mu vwanda tanga bankumbu ya bawu na mwa . . . Kasi mosi ya bampangi ya munu kwisaka kutala munu mazono, yandi tubaka, “Oh, kutuba ve—ve—ve matondo na munu, Mpangi Branham. Ya ke basisa kaka kyese nyonso.” Beno me mona? Na yina mu banzaka ntangu yankaka mingi na kati ya bawu lendaka banza mutindu mosi. Kasi mu kele na nkumbu ya nge. Ba me sonika yawu na masini. Mu ke bambuka moyo na yawu ntangu nionso. Mpe Mfumu kusakumuna beno mingi.

⁴⁶ Mpe beno zaba yina mu ke sala samu na kukiyangidika, mpe kele kukwenda na bureau ya munu ya kulonguka mpe mu ke vwanda kuna, mpe mu ke banza mambu. Ntangu mu ke kuma mingi na kidi-kidi, mu lenda kwenda ntama ve, na yina mu ke banza na nzietolo mosi ya kuzomba yina mu kwendaka kisika mosi kuna, to kisika mosi kuna mu kwendaka loba. Mu ke sepelaka na yawu. Nzambi sakumuna beno.

⁴⁷ Ntangu yayi, beto lenda kulumusa bayintu ya beto na mwa ntangu fioti, mutindu beto ke belama na Ndinga. Mu ke banza ti ya kele na balombilu awa na suka yayi, ya kele ya kulutula mingi samu na kutanga yawu ntangu yayi. Na yina mu ke kukiyufula, na ntangu beto me kulumusa bayintu ya beto, lombilu ya beno ya mfunu mingi, kana beno ke bumba yawu na ntima ya beno, mpe beno telemisa kaka maboko ya beno, mpe beno tuba, “Nzambi, Nge zaba yina mu ke banza ntangu yayi.”

48 Mfumu Yesu, Nge ke mona konso diboko. Mpe Nge zaba yina kele na manima ya yawu. Na nsi ya diboko yayi me vwanda lombilu mosi. Mpe beto ke kwisa ntangu yayi, na luzitu nionso, kuna na Kiti ya kimfumu ya Nzambi ya moyo, palata ya nene yina ya mpembe yina me tandama na kati ya ntangu, kisika Yehowa Nzambi kele ya kuvwanda na kati Kuna, mpe Menga ya Klisto kele na zulu ya autel. Mpe beto ke tuba na zulu ya Menga yina, na nzila ya Yandi yina tubaka, “Beno lomba na Tata konso kima yina na Nkumbu ya Munu, beno ke kuzwa yawu.” Nge ke kuwa ve, Nzambi, na suka yayi, mpe kupesa mvutu na bandombolo ya bawu? Mu ke tulula kisambu ya munu na ya bawu, bubu yayi, ti Nge ke pesa yawu.

49 Awa kele bamuswale awa, Mfumu, samu na bambevo mpe bantu ya mpasi. Mpe ba me longa beto na kati ya Biblia, ti, “Ba vwandaka baka bamuswale mpe bitende yina simbaka Santu Paul, mpe ba vwandaka tula yawu na zulu ya bambevo, mpe bampeve ya yimbi basikaka na kati ya bawu, mpe bimbevo vwandaka katuka.” Mpe, Tata, na yina beto me zaba kubanda ntama, mpe ya kieleka beto zaba ti beto kele ve Santu Paul. Kasi, na manima ya nyonso, beto ke kuwa ti ya vwandaka ve Santu Paul. Ya vwandaka Klisto yina vwandaka na kati ya yandi. Mpe Nge kele “mutindu mosi mazono, bubu yayi, mpe kukonda nsuka,” landila Masonuku. Ntangu yayi, bantu yayi, Mfumu, ke kwikila ti kana beto me lomba Nzambi, mpe beto baka bamuswale yayi mpe beto tula yawu na zulu ya bambevo, ti bawu ke beluka. Mu ke sambila ti ya ke vwanda mutindu yina, Mfumu, na ntangu ba ke tula bamuswale yayi na zulu ya bambevo.

50 Mpe mutindu ba tubaka, na ntangu mosi, Israël kotaka na ndonga ya kosalu ya yandi, na kukwendaka na yinsi ya nsilulu, mpe Mubu ya Mbwaki kangaka bawu nzila, na ntangu ya vwandaka sala kosalu ya yandi. Kasi Nzambi talaka na nsi na nzila ya Dikunzi yina ya Tiya, na meso ya nganzi, mpe mubu yina vwandaka na boma. Mpe yawu vutulaka bitembo ya yawu, masa ya yawu. Mpe Israël tambulaka na ntoto ya kuyuma, samu na kukwenda na yinsi ya nsilulu.

51 Ntangu yayi, Mfumu, bubu yayi, tala na nzila ya Menga ya Yesu. Mpe Nge ke mona kosalu yayi ya lukwikilu yina beto ke na kusala awa na suka yayi. Mpe bika ti Satana kubanga mpe yandi kwenda ntama. Mpe bika konso kizieti yina kele awa, mpe na zulu ya bayina nionso ba ke tentika bamuswale yayi, bika bawu. . . nzila kuzibuka, mpe kimbevo kukwenda, mpe bika ti bawu sala nzietelo na yinsi ya nsilulu, ba twadisama na Mpeve-Santu, Dikunzi ya Tiya. Pesa yawu, Mfumu.

52 Ntangu yayi, sakumuna balukutakanu, bandinga, dibanza, ntangulu. Mpe bika ti Mpeve-Santu kubaka Ndinga, na suka yayi, mpe na lembami kukabula Yawu na mosi na mosi ya beto, Mfumu, mutindu beto ke belama na kima mosi ya nene ya kitoko

yina beto me zaba ntete ve. Bantima ya beto me ningana na mutindu ya ngitukulu, Mfumu. Mpe beto ke sambila ntangu yayi, mutindu beto ke belama na luzitu nionso na Nge mpe Ndinga ya Nge, yina Nge ke tendula mpe ke pesa beto ntendulu. Samu beto ke lomba yawu na Nkumbu ya Yesu. Amen.

Ntangu yayi, na nkokila yayi, beno zimbana ve. . . *Ntangu, Wapi Ntangu Ya Me Kuma?*

⁵³ Mpe ntangu yayi, na suka yayi, mu zola baka, beno mpe yina kele na ba-Biblia ya beno. To beno zola sonika yawu, kana beno me zola, na kati ya Masonuku, kisika beto zola tubila, mwa ntangu fioti, kele na Buku ya ba-Actes. Beto lenda tanga bisika zole to tatu. Actes 26:15, ntete. Actes, kapu ya 25 mpe nzila ya 15, na kubanda.

⁵⁴ Na manima beto zola kutanga Actes 23:11. Mpe beno lenda bwela na yayi, kana beno zola, mu banza ti mu ke kuzwa ntangu ya kutanga yawu ve, Phillipiens 1:20. Nionso yina kele na ndonga mosi, mpe ke sadila bampova mosi.

⁵⁵ Ntangu yayi, na Buku ya ba-Actes, 26:15, beto ke tanga mutindu yayi:

Mpe mu tubaka, Nge kele nani, Mfumu? Mpe yandi tubaka, Mu kele Yesu yina nge ke na kutalisa mpasi.

. . . telama, mpe telama: samu ti Mu me monika na nge samu na lukanu yayi, samu na kusala nge longi mpe mbangi samu na bima yayi yina nge me mona, mpe samu na bima yina wapi Mu ke monika na nge;

Mu me soola nge na kati ya bantu yayi, mpe na kati ya Bantu ya makanda, . . . kisika Mu ke fidisa nge,

Samu na kuzibula meso ya bawu, mpe kukatula bawu na mpimpa mpe kunata bawu na nsemo, mpe na ngolo ya Satana mpe kunata bawu na Nzambi, ti ba ke kuzwa mulemvo ya masumu, mpe difwa na kati ya bawu yina me santisama na nzila ya lukwikilu yina kele na kati ya munu.

Na yina, O . . . Agrippa, mu mangaka ve na kutumama na vision ya mazulu:

Kasi lakisaka ntete bawu na Damas, mpe na Jérusalem, mpe bisika nyonso ya simu ya Judée, mpe bawu . . . na yina na Bantu ya makanda, ti bawu fwana balula ntima mpe kubaluka na Nzambi, mpe kusala bisalu kukutana samu na kubalula ntima.

⁵⁶ Na Actes 23, mpe nzila ya 11 dyaka:

Mpe nkokila vwandaka landa Mfumu yina telamaka pene-pene ya yandi, mpe tubaka, Wanda na kibakala, Paul: samu ti . . . nge pesaka munu kimbangi na

*Jérusalem, mutindu mosi nge fwana pesa kimbangi
mpe na Rome.*

57 Bika ti Nzambi kubwela balusakumunu ya Yandi ya santu na ntangulu ya Ndinga yayi ya kifuluka na lemvo, ya santu yina beto ke na yawu na ntwala ya beto.

58 Ntangu yayi, mu vwandaka kuwa muntu kutuba, to kuzonza, ntama mingi ve, mpe yandi sadilaka mpova yayi: *Dikunzi*. Mpe mu banzaka, “Yina ke mpova mosi ya mbote mingi.” Mu me kuwaka yawu bambala mingi, “Ya kieleka.” Yina kele . . .

59 Mu talaka na dictionaire, ya Webster. Landila Webster, ya zola tuba “Ya kulunga na yawu mosi; ya kukondwa nsuka na ngolo ya yawu; ntete-ntete kisika ya ngudi.” Mpe *kisika ya ngudi* kele “Amen. Yimeni.” Ya kele, *dikunzi*. Ya kele “Ya kukondwa nsuka na ngolo,” mpova yayi *dikunzi*. Ya kele—ya kele, “Ya kulunga na yawu mosi. Nionso kele kuna. Yina ke sukisa diambu.”

Mu banzaka, “Yina ke kima ya nkembo. Yina ke ndinga mosi ya kitoko mingi.”

60 Mpe ntangu yayi, ndinga kele dibanza yina ba me zonza. Ntete, ya fwana vwanda dibanza, mpe na manima ya ke kuma ndinga. Samu, beno ke tuba ve bampova ya beno kukondwa kubanza yawu.

61 Ntangu beto ke tuba na bandinga, beto ke vwandaka na dibanza ve. Ya kele Nzambi yina ke bakaka mabanza. Ya kele mabanza ya Nzambi ke sadila bikoba ya beto. Beto ke banza ve to ke zaba yina beno ke tuba ntangu beno ke zonza na bandinga, kana ya kele dibanza me twadisama na kimpeve. Ntangu beno ke tendula, beno zaba ve yina beno ke tuba. Beno ke tuba kaka yawu. Yimeni. Beno me mona? Yina kele Nzambi. Mpe kupesa profesi, beno ke sadila ve mabanza ya beno mosi. Ya kele Nzambi, samu ti beno ke tuba bima yina beno lendaka tuba ve na mumesanu. Beno me mona?

62 Kasi mpova yayi *dikunzi* kele “kisika ya ngudi.” Mpe, na yina, mu banza ti muntu nionso fwana vwanda na kisika ya ngudi. Mpe kisalu nionso ya nene, ke vwandaka na *dikunzi* mosi na manima ya yawu. Ya vwanda konso kima yina, ya ke vwandaka na *dikunzi* na manima ya yawu. Mpe muntu nionso, samu na kusala kima mosi, fwana vwanda ntete na *dikunzi*. Mpe ya kele kisika ya ngudi ya kuvutuka na mbandukulu, na kulutaka na *yayi, yina*, mpe diaka na *yankaka*, tii kuna beno ke kuma na kisika yina, to amen, to kisika ya ngudi. Ya yina beno ke . . . Beno ke kuzwa kima yina beno fwana kangama na yawu, na nzonzolo *yankaka*. Ya kele *dikunzi* ya nsuka ya kukangama na yawu, samu na kisalu nionso. Ya kele kisika mosi kuna. Ya lendaka baluka na kati ya bima mingi ya kuswaswana tii ya ke kuma na *dikunzi* yina ya kukangama na yawu, kasi ya kele na

amen na nionso ya yawu. Kima mosi fwana vwanda mutindu yina. Beno lenda ve kulandila na luzingu kukondwa kuzwa mosi.

⁶³ Beno, ntangu beno kwelanaka, beno vutukaka na kati ya mabanza ya beno, to kima mosi, tii kuna beno ke kuma na dikunzi yina. Mpe ya fwana vwanda zola samu na kento ya beno, to bakala ya beno. Mbote, ntangu yankaka yandi kele ve kitoko mutindu kento ya Jean; to yandi, mbote, yandi kele ve *yayi, yina*. Kasi ya kele na kima mosi samu na yandi, ti, beno, yawu ke bula beno. Beno—beno—beno ke tuba, “Yandi lenda vwanda ve kento ya kitoko mutindu yina yankaka,” to, “Yandi lendaka vwanda ve bakala ya kitoko mutindu bakala yankaka.” Kasi ya fwana vwanda na dikunzi mosi kuna, ti muntu yina kele ya kuswaswana, mpe ya kele kisika yina beno ke kangama. Kana ya kele ve kuna, beno ke sala mbote na kukwelana ve. Kana ya kele ve na dikunzi mosi! Dikunzi yayi!

⁶⁴ Beto lendaka banza na bantu mingi yina vwandaka na makunzi, na kati ya Biblia. Oh, beto lenda baka, nsongi na nsongi na kati ya Biblia yayi, mpe kuvwanda diaka awa basabala zole; mpe kukondwa kusimba ata nsongi, kana beto lendaka banza na makunzi na kati ya Biblia. Mumbandu, bika mu tanga mosi to zole, na bunkufi.

⁶⁵ Beno tala Job. Ntangu yayi, yandi vwandaka na dikunzi. Mambu nionso tambulaka yimbi samu na bakala yayi, yina vwandaka kaka muntu. Ntangu yayi, beto lenda ve kutuba ti yandi vwandaka ve muntu ya mbote, samu ti Nzambi tubaka ti yandi vwandaka. Ya vwandaka ve na mosi na zulu ya ntoto mutindu Job. Yandi vwandaka ya kulunga, na ntwala ya Nzambi. Mpe yandi zabaka yawu, samu ti yandi vwandaka na kisika ya ngudi. Yandi vwandaka na dikunzi, ntangu bima nionso monanaka ya kuswaswana.

⁶⁶ Kimbevo basikaka. Bankundi ya yandi lendaka tuba, “Ntangu yayi, nge yina kuna, Job. Ya ke talisa ti nge me sumuka. Nge me sala yimbi.” Mpe na manima ba-êvêque kwisaka. Ba bokilaka bawu bankindisi ya Job. Mpe na kisika ya kupesa yandi kikesa, bawu monaka kima mosi ve kasi disumu na luzingu ya yandi, samu Nzambi vwandaka sala na yandi na mutindu Yandi vwandaka sala.

⁶⁷ Mpe bana ya yandi kufwaka. Kimvwama ya yandi—yandi yokamaka. Mambu ya yandi—ya yandi nionso tambulaka yimbi. Ata mpe luzingu ya yandi mosi vwandaka na kati ya kigonsa, yandi vwandaka na zulu ya mbombi, ya kifuluka na bamputa kubanda na nsongi ya yintu ya yandi, tii na makulu. Mpe ata nkundi ya yandi ya luzolo, ya lembami, mama ya bana yina, tubaka, “Nge fwana singa Nzambi mpe kufwa.” Kasi na ntwala ya nionso yina, Job vwandaka na dikunzi mosi.

⁶⁸ Oh, na ntangu ya kimbevo, kana beto lendaka kaka kukangama na dikunzi yina!

⁶⁹ Job zabaka ti yandi salaka ntumunu ya Yehowa. Mpe yandi vwandaka na lukwikilu na yina yandi salaka, samu Yehowa lombaka yawu. Beto lenda sala yawu. Yehowa lombaka munkayulu ya kuyoka samu na disumu ya yandi. Mpe Job, kaka samu na yandi mosi ve, kasi samu na bana ya yandi, pesaka munkayulu ya kuyoka, mpe yawu yina nionso Nzambi lombaka.

“Oh,” beno fwana tuba, “Mu ke zola yina nionso Yandi me lomba bubu yayi.”

⁷⁰ Ya kele diaka fioti ya yina. Ya kele kaka lukwikilu na Ndinga ya Yandi! Mpe beno, kana beno ke sala Ndinga ya Yandi dikunzi ya beno, beno lenda. Konso nsilulu ya Kinzambi na kati ya Biblia, beno lendaka kukanga moyo ya beno na yawu. Ata ti bitembo yikwa ke bula beno, beno ke kangama kaka na yawu; dikunzi ya beno.

⁷¹ Mpe yandi kangamaka na yawu. Mpe ntangu bikindisi ya yandi tubaka, “Nge me sumuka,” yandi zabaka ti yandi sumukaka ve. Yandi vwandaka muntu ya mbote, samu yandi salaka ntumunu ya Yehowa. Mpe ntangu ya yandi nionso. . .

⁷² Bakala mosi kotaka, yandi tubaka, “Bana ya nge me kufwa.” Yankaka kotaka, yandi tubaka, “Bakamela ya nge nionso me yokama. Mpe tiya me katuka na mazulu.”

⁷³ Beno tala nsamunu yina salaka bantu yina vwandaka yangisa yandi. “Nge me mona? Tiya me katuka na mazulu. Ntangu yayi, Job, yina ke talisa yawu.” Yina ke talisa kima mosi ve. “Ntangu yayi, Yandi zolaka ve kubula bana ya nge, Job; nge kele muntu ya mbote.”

⁷⁴ “Kasi,” Job tubaka, “Mu zaba ti mu me sala yina kele mbote.” Yandi landilaka na kusimba. Yandi vwandaka na kima yina yandi lendaka simba. Yawu yina. Yandi ndimaka yawu. Yandi salaka kieleka yina Nzambi tubaka na yandi na kusala, mpe yandi vwandaka kieleka ya kundima. Mbote mingi.

⁷⁵ Na yina ntangu yandi kumaka na kisika yina, ntangu yandi monaka ti dikunzi yina simbaka, na yina na nsuka yandi bandaka na kuwa ti nsinga bandana na kubendana. Kasi na ntwala, ya vwandaka baluka na kimpwanza, kasi ya bandaka na kubendana. Mpe Mpeve kwisaka na zulu ya yandi. Mpe yandi telamaka, na kuvwandaka profete, mpe yandi tubaka, “Mu zaba ti Mukudi ya munu kele moyo.” Amen. Beno me mona? Yandi vwandaka ya kukangama na dikunzi ya yandi. Yandi kotaka na ngwisani. Yandi zabaka ti yandi salaka yina vwandaka mbote, mpe kilumbu mosi yandi lendaka benda yawu. “Mu zaba ti Mukudi ya munu kele moyo, mpe na bilumbu ya nsuka, Yandi ke telama na zulu ya ntoto yayi. Ata ti misobi me bebisa nzutu yayi, kasi na nzutu ya munu mu ke mona Nzambi.” Yandi zabaka na ntangu yina. Na yina dikunzi ya yandi simbaka.

⁷⁶ Abraham, vwandaka na dikunzi, yandi katukaka na Babybone, ya yinzo-zulu, mpe yandi vwandaka na yinsi ya

Shinéar, kuna yandi vwandaka zinga na tata ya yandi, mpe mu banza yandi vwandaka fermier. Kasi kilumbu mosi, kuna na bamfinda kisika mosi kuna, ntangu yankaka ya vwandaka lokota bambuma ya mfinda, to—to zolaka kufwa niama samu na musuni ya yandi; mpe kisika mosi kuna, Nzambi tubaka na yandi, ntangu yandi vwandaka na bamvula makumi sambwadi na tanu. Mpe yandi vwandaka. . . Yandi mpe kento ya yandi, Sarah, yandi vwandaka na bamvula makumi sambanu, mpe vwandaka kukondwa mwana—vwandaka kukondwa mwana. Bawu vwandaka ve na bana. Na yina Nzambi tubaka na yandi, “Nge ke kuzwa mwana na nzila ya Sarah. Kasi, samu na kusala yayi, nge fwana kabwana nge mosi.”

⁷⁷ Bansilulu ya Nzambi ke vwandaka ntangu nionso na musiku. Beno fwana, na mutindu nionso. Ata ti beno me kangama na nsilulu, ya ke vwandaka ntangu nionso, na nsi ya misiku. Wapi mutindu beto lendaka telama awa mpe kubaka Masonuku, nsongi na nsongi, na bangunga, beto ke mona, ti musiku kele na mfunu. Beno lenda vwanda kaka ya kukangama na misiku mutindu beno zola, kasi ya kele mitindu na nsi ya misiku na nzila ya nsilulu, luzabu ya mantwala, mpe nyonso yina. Beno tala.

⁷⁸ Ntangu yayi, “Abraham, yandi kwikilaka na Nzambi, mpe ba ndimaka yandi samu na ludedomo.” Ntangu yayi, yinki kima yayi ya kiadi ya zolaka vwanda na kukutana na yinza ya malu-malu, bakala ya bamvula makumi sambwadi na tanu, na kento ya bamvula makumi sambanu na tanu, mpe ba vwandaka zinga kubanda ba vwandaka bankwelani ya bantwenia, samu yandi vwandaka mpangi ya yandi ya kento na kitata, mpe ntangu yayi yandi ke kuzwa bebé na nzila ya kento ya yandi. Kasi yandi vwandaka na dikunzi. Ya vwandaka ve na kima yina zolaka kuningisa yandi.

⁷⁹ Mpe na yina, na ngonda ya ntete, ya salamaka ve, dikunzi ya yandi simbaka, samu yandi zabaka ti yandi solulaka na Nzambi. Ngonda ya zole, mvula ya zole, kumi, mpe bamvula makumi zole na tanu na ntawala, ntangu yandi vwandaka na bamvula nkama mosi, mpe Sarah vwandaka na bamvula makumi yivwa, dikunzi ya yandi simbaka kaka.

⁸⁰ Mpe Biblia me tuba, ntangu ba sonikaka disolo ya yandi, Yandi tubaka, “Abraham tulaka ntembe ve na nsilulu ya Nzambi, na nzila ya kukondwa lukwikilu, kasi yandi vwandaka na kikesa, na kupesaka lukumu na Nzambi.”

⁸¹ Samu na yinki? Beno me banzaka ntete samu na yinki? Yandi vwandaka ya kieleka, na dikunzi. Mpe kima kaka yina yandi zolaka sala vwandaka kukabwana yandi mosi na bantu ya yandi. Mpe ata mbala mosi ve ti Nzambi sakumunaka yandi tii kuna yandi salaka yawu. Yandi bakaka tata ya yandi. Tata ya yandi kufwaka. Yandi bakaka Lot. Mpe na yina, na manima Lot kukabwanaka na Abraham, na manima Nzambi kwizaka na

yandi, tubaka, “Ntangu yayi tambula na kati ya yinsi.” Beno me mona?

⁸² Kutumama, nsilulu, na nsi ya misiku, ke kwendaka ntangu nionso na Nzambi mpe Ndinga ya Yandi. Ntangu yayi beno tala. . .

⁸³ Beto baka Moïse. Moïse, kisadi-profete ya boma, yina Nzambi telemisaka mpe longusaka yandi na yinzo ya kimfumu ya Pharaon. Mpe—mpe Moïse kwendaka na malongi ya yandi ya théologie, mpe yandi kufwaka muntu ya ntete. Na yina, mwa kima ya ntete ya mpasi samu na yandi, na yina Moïse vwandaka na boma ya lufwa.

⁸⁴ Samu na yinki? Yandi vwandaka ve na dikunzi. Yandi vwandaka kaka na kimbangi ya mama ya yandi—ya yandi samu na lubutuku ya yandi. Yandi vwandaka mwana mosi ya ngitukulu. Yandi vwandaka na ndinga ya mama ya yandi samu na yawu. Yandi vwandaka na mikanda yina kisika Nzambi vwandaka ntangu yankaka na papier kisika mosi kuna, ba sonikaka, ba nataka yawu, ti Nzambi zolaka kwisa kutala bana ya Yandi. Yandi zabaka ti yina vwandaka ntangu yango.

Mutindu beto ke sala ntangu yayi, beto zaba ti kima mosi zola salama.

⁸⁵ Ntangu yayi, Moïse zabaka ti yina vwandaka ntangu, mpe yandi zabaka ti yandi soolamaka samu na yawu, kasi yandi vwandaka diaka ve na dikunzi ya kieleka. Beno me mona?

⁸⁶ Mpe kilumbu mosi, na manima ya ntoto ya kuyuma, ntangu yandi zimbisaka vision, Nzambi monikaka na yandi, na mulaka ya tiya. Mpe Yandi tubaka, “Moïse, Mu me mona bampasi ya bantu ya Munu. Mu me kuwa bakuboka ya bawu mpe kudila ya bawu, ya kitumbu ya basinzidi yina. Mpe Mu me bambuka moyo na nsilulu ya Munu. Mu me kulumuka samu na kukangula bawu. Ntangu yayi kwenda kuna na Egypte.” Oh, la la!

⁸⁷ Moïse tubaka, yandi vwandaka bokuta, na kutubaka, “Mu ke tubaka mbote ve. Nzonzolo ya munu—nzonzolo ya munu kele mbote ve. Ba ke kwikila munu ve.”

Yandi tubaka, “Yinki kele na diboko ya nge?”

Yandi tubaka, “Nkawa.”

⁸⁸ Yandi tubaka, “Losa yawu na ntoto.” Yawu kitukaka nioka. Yandi tubaka, “Baka yawu na mukila.” Yawu kitukaka diaka nkawa. Yandi vwandaka pesa yandi kivuvu, nsiamisa.

⁸⁹ Ntangu Nzambi ke pesaka dikunzi, Yandi ke pesaka ntangu nionso nsiamisa, na dikunzi yina.

⁹⁰ Na yina Moïse, ntangu yandi vwandaka kuna, mpe yandi losaka nkawa ya yandi na ntwala ya banganga-nkisi mpe Pharaon, mpe banganga-nkisi kwisaka mpe losaka diaka nkama ya bawu, Moïse kimaka ve mbangu mpe tubaka, “Oh, mbote, mu

vwandaka na kifu. Ah, ya vwandaka kaka mwa nganga-nkisi mosi ya fioti, mpe ya lenda vwanada ti mu vwanada na kifu.”

⁹¹ Kasi yandi zabaka. Yandi vwanada na kieleka ti yandi kutanaka na Nzambi, mpe yandi vwanada swi. Beto tuba ti yandi salaka kieleka yina Nzambi tubaka na yandi na kusala. Na yina Job salaka kieleka yina Nzambi tubaka na yandi na kusala. Moïse vwanada landa misiku ya Yandi. Na yina, beno vwanada swi mpe beno tala nkembo ya Nzambi. Moïse vwanada ya kukangama na dikunzi ya yandi, lutumu ya yandi, mpe yandi vwanada swi. Mpe ntangu yandi salaka mutindu yina, nioka ya yandi minaka banioka yankaka nionso. Beno me mona? Yandi vwanada ya kukangama na dikunzi yina.

⁹² Nzambi tubaka, “Ntangu nge ke vulusa bana yina, nge ke sambila Munu diaka na zulu ya mongo yayi.”

⁹³ Ntangu yayi, mbeni, na mutindu nionso yandi lendaka sala, yandi ke meka kunata beno ntama na dikunzi yayi.

⁹⁴ Kaka na ntangu bawu bandaka na kubasika na Égypte, bawu kutanaka na laka ya—ya Mubu ya Mbwaki, myongo na lweka mosi na yankaka. Kuluta na kiwanda, mpe ya vwanada na Mubu ya Mbwaki. Ya vwanada ve na mutindu ya kutina na kulutaka na zulu ya myongo, ya vwanada ve na mutindu ya kutina na lweka *yayi*, mpe makesa ya Pharaon vwanada kwisa mutindu *yayi*. Wapi kisika yayi ya kutelama!

⁹⁵ Beno me mona mutindu diabulu ke nataka beno na kisika yina beno zaba ve yinki kusala? Kasi beno bambuka moyo, kana beno me kangama na dikunzi yayi, ya kele mbote.

⁹⁶ Moïse zabaka ti Nzambi silaka yandi, ti, “Nge ke sambila na zulu ya mongo yayi ntangu nge ke basisa bawu kuna. Mpe Mu me kulumuka, na nzila ya diboko ya nge, samu na kuvulusa bawu mpe kutula bawu na yinsi yina yankaka.” Yandi bikalaka kaka na yawu. Mpe Nzambi fidisaka mupepe ya este mpe bulaka bamasa, yina vwanada na nsi ya mubu, mpe bawu zabukaka na zulu ya ntoto ya kuyuma. Dikunzi!

⁹⁷ Wapi mutindu beto lendaka kota na Masonuku: Daniel, dikunzi ya yandi; Shadrack, Meschack, na Abednego, dikunzi ya bawu; David, dikunzi ya yandi; bawu nionso, dikunzi.

⁹⁸ Paul vwanada na Mosi, diaka, Yina beto ke mona na ntangulu ya beno. Yandi vwanada na lubokilu ya kusikimisa na zulu ya Klisto, mpe yina vwanada dikunzi ya yandi. Ya kele samu na yina yandi vwanada ve na boma ya yina Agrippa zolaka tuba. Yandi telemaka kuna, mpe Agrippa vwanada Juif, mutindu beto zaba. Mpe na yina ntangu yandi telamaka na ntwala ya bantinu yayi mpe bantu yankaka, Nzambi tubaka ntete na yandi ti yandi ke telama kuna. Na yina, yandi vwanada na dikunzi, na yina yandi tubaka kieleka vision ya Mazulu. Yandi tubaka, “Mu kele ve. . . Mu kondwaka ve kupesa yawu luzitu. Mu vwanada. . . Mu vwezaka yawu ve. Mu monaka yawu ve

mpamba.” Kasi yandi vwandaka ya kukwikama na yawu, mpe mangaka ve na kutumama. Yandi tumamaka na yawu, na mbala mosi, samu Yawu vwandaka dikunzi.

Mpe luzingu nionso ya kusikama na zulu ya Klisto, kele dikunzi ya beno.

⁹⁹ Ntangu yayi, kubanda kukutana na Yandi, mbunzu na mbunzu, na nzila ya Damas, yina vwandaka tuba mingi samu na Paul.

¹⁰⁰ Ntangu yayi, beno bambuka moyo, yandi vwandaka muntu ya mayele, na ntuala. Yandi vwandaka muntu ya ngolo na Masonuku. Kasi yandi vwandaka ve na dikunzi kasi kaka ki-Sanhédrin yina vwandaka simba yandi, mpe—mpe diplome yina yandi kuzwaka na mulongi ya nene. Yandi vwandaka muntu ya nene na ndonga ya yandi. Kasi yandi vwandaka yenga-yenga. Kima mosi kaka yandi vwandaka na yawu, ti dikunzi ya yandi vwandaka ngolo mingi kulutila organisation ya yandi. Yawu yina ngolo nionso yandi lendaka vwanda na yawu. Mpe yandi vwandaka ya kukwikama na kisalu ya yandi, mpe vwandaka baka Baklisto, mpe vwandaka kanga bawu bansinga, mpe vwandaka niongisa bawu, yandi bulaka mpe Etienne matadi.

¹⁰¹ Mu banza, na bilumbu kwisaka na ntuala na luzingu ya yandi, kikuma yandi kwendaka na Jérusalem: Ntangu, profete tubaka na yandi, “Kukwenda kuna ve, Paul, samu na miniololo mpe boloko ke vingila nge.”

¹⁰² Mpe Paul tubaka, “Mu zaba yawu. Kasi mu ke kwenda kaka ve na Jérusalem mutindu mhangi mosi. Kasi, mu ke kwenda kuna, mu me kubama na kufwa samu na Yesu Klisto.” Samu yandi zabaka yina yandi vwandaka sala, mpe lukanu ya yandi vwandaka kukanga kimbangi ya yandi na menga ya yandi mosi, kufwa mhangi, samu yandi kufwaka mosi ya bambangi ya Nzambi.

¹⁰³ Mpe ntangu yayi yandi vwandaka na nzila ya yandi kuna na Damas, na mayele ya yandi nyonso. Yandi vwandaka na yisi ya mulongisi yayi ya nene, Gamaliel, mpe mutindu ti ba longaka yandi na nsambulu nyonso ya ba-Juif. Mpe kasi, na nionso yina, yandi vwandaka fioti kukondwa ngolo, mpe yandi vwandaka ve na kikesa ya kusala mambu yankaka. Mpe na mbala mosi, ya vwandaka na Nsemo, mpe kuboka, ntangu yankaka, na mutindu ya nzasi. Mpe ba bulaka yandi, mpe yandi kubwaka na ntoto.

¹⁰⁴ Mpe yandi talaka na zulu. Nsemo vwandaka sema, meso ya yandi kufwaka. Mpe wapi mutindu ya kima ya ngitukulu ya vwandaka. Muntu yankaka ve monaka Nsemo, kaka Saul. Yawu vwandaka kieleka nsilulu, ya kieleka mingi samu na yandi, tii Yawu kufwaka meso ya yandi. Yandi lendaka ve kumona. Ya muvimba ya kufwa meso, na Dikunzi yina ya Tiya vwandaka lezima na kizizi ya yandi. Mpe yandi kuwaka Ndinga kutuba, “Saul, Saul, samu na yinki nge ke na kotalisa Munu mpasi?”

Yandi tubaka, “Mfumu, Nge kele Nani?”

¹⁰⁵ Mpe Yandi tubaka, “Mu kele Yesu. Mpe ya ke vwanda mpasi samu na nge na kutelemina bansende yayi. Telama ntangu yayi, mpe kota na Damas, mpe kuna ba ke fidisa muntu mosi na nge.” Na yina ntangu yandi telemaka kuna . . .

¹⁰⁶ Mpe ya vwandaka na mosi, profete mosi, kuna na kati ya mbanza, yina monaka yawu na vision ntangu yandi vwandaka sambila, mpe yandi kwisaka. Ananias kwisaka, mpe kutanaka na Saul. Yandi tentikaka maboko ya yandi na zulu ya yandi, mpe yandi belukaka na nzila ya kubeluka ya Kinzambi. Na yina yandi telemaka, ba botikaka yandi, ba sukulaka yandi, mpe yandi bokilaka Nkumbu ya Mfumu. Na manima yandi kuzwaka dikunzi. Yandi vwandaka ata fioti ve mutindu mosi na manima ya yawu. Yandi kwandaka na ngolo, dibuundu na dibuundu, kisika na kisika, na kumekaka na kutunga yina yandi vwandaka meka na kubebisa.

¹⁰⁷ Wapi mutindu yinsi, wapi mutindu yinza ya Baklisto, na suka yayi, ke na nsatu ya kifwanikisu yina ya dikunzi. Bayina vwandaka . . .? . . .ba credo mpe binkulu, mekaka, na nzila ya malongi ya bantu, na kutelemina Ndinga ya Nzambi ti ya kele mutindu mosi mazono, bubu yayi, mpe kukonda nsuka. Ba kele na nsatu ya dikunzi, nzingulu ya lukutakanu, na nzila ya Damas, Nzambi ya moyo Yina lenda belusa bambevo, mpe kuvumbula bamvumbi, mpe basisaka bampeve ya yimbi. Dikunzi ya kieleka!

¹⁰⁸ Paul zabaka ti kima mosi me salama. Ya vwandaka ve na muntu yina lendaka katula yawu na yandi. Kima yankaka ve vwandaka na mfunu. Yandi vwandaka ya kukangama, mpe yina sukisaka diambu. Ata nyonso yina kwizaka, yandi zabaka ti yandi vwandaka ya kukangama, na luzingu ya kusikama na zulu ya Klisto. Oh!

¹⁰⁹ Luzingu yina yandi zingaka vwandaka luzingu ya kuswaswana. Ntangu yayi, beno bambuka moyo ti, yandi vwandaka muntu ya nsambulu.

¹¹⁰ Mpe samu na bantu yankaka na kati ya beno na suka yayi (mpe mu zaba ti beno ke bakula ti bande yayi ba ke na kusalaka, ba ke bula yawu na bayinsi nionso na nsi ya mazulu, mu banza, na yinza ya muvimba); mpe bayankaka na kati ya beno yina kele awa, na kisika yayi; mpe bayankaka na kati ya beno kisika ba ke bula ba-bande yayi na bayinsi yankaka (na nzila ya mutendudi mosi na kupesaka yawu na makanda ya Afrika, kuna na ba-Hottentot, mpe—mpe bisika nyonso); mpe samu na beno bantwadisi ya nsambulu yina me longuka Biblia:

¹¹¹ Beno me baka yawu na mutindu ya disolo, beno lendaka vwanda na kiyeka ya kutendula mambu yayi nionso, kasi kana beno kele ve na dikunzi, kana beno kele ve na nzingulu, mpe kana nzingulu yina—yina beno ke tuba ti beno me kuzwa ke

sala ti beno manga ti Mpova nionso ya *Yayi* kele ve ya kieleka samu na Dibuundu bubu yayi mutindu Yawu vwandaka ntete, mpe beno ke tula kivuvu na diplôme ya beno ya Licencié na Lettre to nionso yina beno lenda vwanda na yawu, kana beno ke tula kivuvu na mabanza ya organisation ya beno yina ke tuba, “Bilumbu ya bimangu me lutaka, mpe beto kele ve na kubeluka ya Kinzambi, mpe mbotika ya Mpeve-Santu mutindu bawu kuzwaka na Kilumbu ya Pentecote kele ve samu na bantu bubu yayi,” kana yawu yina kaka nge kele na yawu, mpangi ya munu ya ntalu ya bakala, mpangi-kento, nge kele na nsatu ya nzingulu ya Damas!

¹¹² Beno ke na nsatu ya kukutana na Nzambi yayi ya moyo, kisika beno, kele kaka ve disolo ya luvunu na mabanza ya beno, ya kele ve kutekita mosi, to mwa sensation mosi, kasi kulongama mpe kuvwanda na nzingulu ya kieleka, ya kisina. Yesu yina vwandaka tambula na Galilée kele ya moyo bubu yayi, mpe ke zinga kukonda nsuka. Mpe Yandi kele mutindu mosi mazono, bubu yayi, mpe kukonda nsuka. Dikunzi, ti beno ke baka ve yina muntu mosi me tuba. Beno zaba beno mosi, mwa sensation ve.

¹¹³ Mpe kana sensation yina beno kuzwaka, mpe kana muntu mosi, ya fwana vwanda sensation ya kieleka ya Biblia, mpe muntu yankaka ke meka na kutendula yawu ya kuswaswana na beno, samu na kutuba ti bima yina vwandaka samu na kilumbu yankaka. Beno sala keba. Ya kele kieleka. Beno sala keba. Kasi ya kele na mutindu ya kuzaba. Beno teza yawu na Ndinga. Yina kele dikani.

¹¹⁴ Kana ba me tunga yinzo kuswaswana na dikani, mutungi ke panza yawu mpe ke tunga yawu diaka. Kasi ya fwana vwanda landila dikani.

¹¹⁵ Ata yina kele nzingulu ya beno, na yina, kana kima mosi na kati ya beno ke tuba na beno ti Biblia kele ve ya kieleka, ti ngolo yayi ya Nzambi, bantumwa, baprofete, mpe milongi, mpe ba-pasteur, mpe makabu ya Mpeve kele ve mutindu mosi Yawu vwandaka ntangu Yawu tiamukaka na kati ya bantumwa na Pentecote, kima mosi ke tambula mbote ve na dikunzi ya beno. Ya fwana ya kukangama na credo mosi ya denomination na kisika ya Biblia ya Nzambi. Ntangu, Yandi tubaka, “Zulu na ntoto ke luta, kasi Ndinga ya Munu ke kondwa ata fioti ve.” Beno tala yina kele dikunzi ya beno.

¹¹⁶ Beno lenda vwanda kieleka ti beno kele na kati ya ngwisani ya mbote na pasteur. Mpe beno lendaka vwanda ya kieleka na ngwisani na mukengi ya kizunga. Mpe beno lenda vwanda ya kieleka ti beno kele na ngwisani na évêque to muntu yankaka ya nene na kati ya dibuundu ya beno. Kasi kana beno kele ve . . . Dikunzi ya beno kele ve Yesu Klisto.

117 “Samu na Ditadi yayi mu ke tula dikunzi ya Munu, mpe mielo ya difelo ke nunga yawu ve.” Luzayikisu ya kimpeve ya Yina Yandi keke, mpe na kuzabaka Yandi! Mbote mingi. Oh!

118 Ntangu yayi, ntangu beno me kuma mutindu Paul, beno me kuzwa dikunzi yina yandi kuzwaka, luzingu ya kusikama na zulu ya Klisto keke luzingu ya kuswaswana kulutula yina beno kuzwaka ntete. Mpe yawu lendaka vwanda luzingu mosi ya musambidi yina beno vwandaka zinga.

119 Oh, mu me kuwaka bantu kutuba, “Ntangu yayi, bawu keke misambidi ya nene.” Yina ke sala kima mosi ve na Yawu.

120 Mu me monaka bansambulu mingi, ya kwikama mingi, na bambala mingi ya kuvedila mingi kulutula yina ke tubaka Baklisto ya bubu yayi. Ntangu, mama mosi lendaka baka mwa bébé ya yandi ya fioti, na mavimpi ya mbote, ya ndombe, mwa yinda mutindu *yayi*, mpe ke losa yandi na yinwa ya ngandu, samu na zola ya nzambi ya yandi. Mu ke kukiyufula wapi mutindu Buklisto keke ya kuvedila. Ntangu, bakala mosi lendaka kukipesa mpasi mutindu yayi, lendaka tula funda mosi ya bandobo na nsuni ya yandi, mutindu *yayi*, na yina ba me namika ba-boule ya masa, na kukangaka yandi na ngolo na kubikala na ntoto mutindu *yayi*, mpe kutambula na kati ya kinkuku ya tiya, kubanda awa tii na nsuka ya tabernacle yayi, ke kwenda mpe ke vutuka, mpe ba me yangula yawu, na tiya ya ngolo mutindu *yayi*, samu na munkayulu na nzambi ya yandi, kiteki mosi kuna na meso ya rubis na kati ya yawu, mpe nionso yina. Mu ke kukiyufula wapi sika keke Buklisto. Uh-huh. Uh-huh. Na yina beno banza ve na “kuvedila.” Kuvedila keke Yawu ve. Kuvedila keke mbote mingi kana ba me tula yawu na kima ya mbote.

121 Mutindu dokotolo ke pesa nkisi. Yandi lendaka pesa beno arsenic, ya kieleka, mpe yandi lendaka pesa beno acide sulfurique, ya kieleka. Beno lendaka vwanda na mukanda ya beno ya bankisi yina ba me sonika mbote ve, mpe beno lendaka baka yawu ya kieleka, kasi yina ke vulusa ve luzingu ya beno. Beno me mona? Ve, tata. Beno fwana zaba yina beno ke na kusala. Mpe nionso yina me swaswana na Ndinga ya Nzambi, mu ke kipe ve yina ya keke, mpe wapi ntangu ya me zinga, ya keke kaka luvunu.

122 Pierre pesaka bawu mukanda ya Kukonda nsuka na Kilumbu ya Pentecote. Yandi tubaka, “Beno balula bantima, mosi na mosi ya beno, mpe beno baka mbotika na Nkumbu ya Yesu Klisto samu na mulemvo ya masumu ya beno, mpe beno ke kuzwa dikabu ya Mpeve-Santu. Samu ti mukanda yayi keke samu na beno, mpe bana ya beno, mpe bayina nionso keke ntama, ya mingi Mfumu Nzambi ya beto ke bokila.” Ya kieleka. Ya keke mukanda ya Kukonda nsuka.

123 Ntangu yayi, mwa pharmacien mosi ya luvunu lenda kuzwa yawu mpe kufwa beno. Yinga. Kieleka. Beno zaba, ya keke na

ndikila mingi na kati ya mukanda, samu na kundikila germe, mpe dokotolo zaba kieleka kitezo, nzutu ya beno lenda kubaka. Kana yandi me lutisa ndikila, yawu ke kufwa beno. Kana beno kele ve na yawu ya kulunga, na yina wapi mbote ya ke sala beno? Ya ke sala beno mbote ve na kubaka nkisi. Yandi zaba yina nzutu ya beno lenda kubaka.

¹²⁴ Ntangu yayi, ya kele mutindu yina mukanda ya Nzambi kele. Wapi mutindu muntu yankaka lenda tuba ti yawu fwana salama mutindu *yayi*, to mutindu *yina*, beno ke kwikila yawu ve. Ntangu beno ke landa Ndinga kieleka mpova na mpova, ya kele mbote. Beno kangama na Yawu. Ntangu yayi, beto kele na . . . bayina ke tubaka, “Ba fwana mwangisa masa na zulu ya beno.” Bawu kele na yawu. Na yawu, “Beni fwana sadila bisalu ya Tata, Mwana mpe Mpeve-Santu.” Ya kele ve na bima ya mutindu yayi na kati ya Biblia. Ata kisika mosi ve yina muntu botamaka, na kati ya Biblia, bisika nyonso na nganda ya Nkumbu ya Yesu Klisto. Ya kele dogme yina ba me bwela na dibuundu ya Catholique ya Rome, yina me twadisama na binkulu. Beto ke zonzila yawu na nokokila yayi.

¹²⁵ Kasi beno tala, na kati-kati ya nionso yina, mukanda kele kaka na mfunu. Ya kele samu na yina beto ke na bana mingi ya kubela, samu ti bawu ke kuwa ve yina Dokotolo me tuba. Dikunzi, ntangu beno me kangama na Yawu, ya kele mbote. Ya kele Ndinga ya Nzambi. Ya lendaka ve kubwa.

¹²⁶ Luzingu yina me sikama na zulu ya Klisto! Ya nsambulu mingi, kasi yawu vwandaka ve ya kusikama na zulu ya Klisto. Mingi na kati ya beto kele na yawu bubu yayi.

¹²⁷ Mpe ntangu beno kele na luzingu yayi ya kusikama na zulu ya Klisto, ya ke sala ti beno sala bima ya kuswaswana na yina beno lendaka sala ve na mumesanu. Ya ke sala ti beno kusala mambu ya kuswaswana kulutila yina beno lendaka sala na mumesanu. Mu zola ve kutuba ti beno ke sala buzoba. Mu ke tuba kusala na Kimpeve, kima yina kele ya kieleka, kima yina kele ya kisina. Mpe ntangu beno ke mona muntu yina ke sala buzoba, beno zaba ti ba ke kukipesa kaka mupepe. Ba ke na kumekaka na kumekula kisika kima yina ya kieleka kele.

¹²⁸ Ntangu beno ke mona dollar ya yimbi, beno bambuka moyo ti ya kele na dollar ya mbote yina me salama na yawu. Beno me mona? Ntangu beno ke mona kima ya luvunu, kieleka ya kele kinsinsya ya kima yina kele ya kieleka. Ya kele kima yina—yina ba me mekula, na kima ya kieleka.

¹²⁹ Beno tala, ya ke salaka ti beno kusala bima yina beno lendaka ve kusala na mumesanu. Oh, ya kele kima mosi. Beno kele ya kieleka. Beno kele ya kieleka mingi na yawu, ntangu beno kele na dikunzi yayi. Beno kele na positif ya yawu. Beno ke baka ve yina kele nzingulu ya muntu yankaka.

¹³⁰ Ya kele samu na yina ti Buklisto me kuma mutindu bana ya fyoti na kati ya Biblia, to, mpe ve, beno lemvočila munu, bana ya fyoti na lukolo. Bawu ke meka na kukopiye mosi na yankaka. Mpe kana muntu yayi kele na kima ya yimbi, nyonso kele yimbi. Beno me mona? Beno me nata kimvuka ya muvimba na kima yimbi. Oh, la la! Beno kopiye ve. Beno kutana na Yandi, beno mosi.

¹³¹ Nkundi ya munu ya mbote, yina me telema awa na manima, kele kiboba. . . kele mwana ya bankundi ya munu, nkundi ya ntangu nionso, Jim Poole ya fioti. Na yina, papa ya yandi mpe munu me kuyela kintwadi na lukolo. Mpe, oh, wapi mutindu ya muntu ya mbote! Jim ya fioti mpe munu ke sambilaka ntangu nionso ti Jim ya mbuta kukuma Muklisto, mukwikidi ya kieleka. Mpe Jim ya leke mpe munu vwandaka zonzila mazono kisika yina beno kutanaka na Nzambi na kati ya mfinda mpe monaka Yandi na yinza. Ya kele kisika yina beno ke mona Yandi. Samu ti, Yandi kele Mvangi, mpe Yandi kele na kati ya luvangulu ya Yandi.

¹³² Mpe mu ke bambuka moyo, Jim na munu vwanda kwendaka—kukwenda, vwandaka zola kuzomba. Mpe ntangu mpimpa kwisaka, mbote, beto vwandaka baka, ba-velo ya beto, mpe beto vwandaka luta na bala-bala yayi awa, beto vwandaka na boma ya nene na kuluta pene-pene ya maziamu ntangu mpimpa me kubwa, beto vwandaka kwenda kusosa crème ya madidi.

¹³³ Mpe Jim vwandaka zola kubula nsaka ya billard. Ntangu yayi, beto vwandaka kaka bana-babakala ya bantwenia, ya bamvula kumi, kumi na zole, kumi na yiya. Mpe na yina Jim vwandaka kuvwanda kuna mpe kutanga babuku ya masolo ya kuzomba mpe kuzomba na mitambu.

¹³⁴ Mpe mu ke vwanda kuna mpe mu vwandaka lota. Beno me mona? Na yina me tala. . . Mpe ntangu yayi kele na bana-babakala lenda kumona munu. Mpe mu vwandaka mona mwa yinzo ya fioti kisika mosi kuna. Mu vwandaka tuba, “Oh, yina ke vwanda mwa yinzo ya fioti ya kuzwa na myongo.” Mpe mu vwandaka lota ti kilumbu mosi mu ke vwanda na mwa yinzo ya fioti na myongo, kinkuku ya bayimbwa, mpe—mpe mwa munduki. Mpe mu vwandaka banza ntangu nionso, “Kana mu lendaka kuzwa mwa .30-30, kilumbu mosi.” Mu banzaka, “Wapi mutindu na yinza mu lendaka kuzwa kilumbu mosi mwa munduki ya fioti .30-30?”

¹³⁵ Mpe kilumbu yina, mu vwandaka ya kutelama kuna, mu vwandaka tala na kibaka ya munu, mpe na kumonaka kuna mwa munduki ya kulutila kitoko yina ba lendaka kuzwa, mu banzaka, “Lemvo ya ngitukulu.”

¹³⁶ Mu banzaka, “Mu ke longoka munu mosi na kubula munduki, mpe kubula mbote munduki. Mpe ntangu yankaka

kilumbu mosi, mu lendaka sala nzietolo na kati ya myongo, ntangu yankaka muzombi mosi ya mbote ke nata munu na yandi. Kaka samu na kuvwanda mutindu. . . Samu, yandi ke zola kukeba luzingu ya yandi, ntangu yankaka, na kubulaka ulusu. Yandi kele ve na lukengolo. Mwa mvwama mosi, yandi ke baka munu, samu na kuwenda na yandi, mutindu garde du corps. Ntangu yankaka kilumbu mosi mu ke kwenda kuzomba na Afrique, mutindu garde du corps. Kana mu lendaka kaka kulongoka! Yawu yina kima mosi kaka mu lenda sala kele kuvwanda muzombi ya mbote, ntangu nionso.”

¹³⁷ Oh, mu banzaka, “Nzambi, banza fioti, Nge bikaka munu kuzomba, na yinza.” Wapi diambu yayi ya kitoko!

Jim vwandaka kuvwanda mpe kutanga buku. Mu tubaka, “Jim. . .”

Yandi tubaka, “Mu—mu ke zolaka kutanga yawu.”

¹³⁸ Mu tubaka, “Jim, yina kele yina muntu yankaka me sala. Mu zola kusala yawu, munu mosi. Mu zola nzingulu.” Ntangu mu kwisaka na Klisto, mu lendaka ve kubaka nzingulu ya muntu yankaka. Mu zolaka yawu, ya munu mosi.

¹³⁹ Mu ke bambuka moyo ntangu mu tangaka *Lone Star Ranger* ya Zane Grey. Mu bebisaka bikombo zole to tatu ya mama, na kutambulaka nswalu, na kati ya yinzo, na zulu ya mpunda yayi ya dibaya. Mu—mu tangaka disolo ya—ya *Lone Star Ranger*, wapi mutindu yandi nataka ngemba na Big Bend.

¹⁴⁰ Na manima mu tangaka roman ya Edgar Rice Burrough ya *Tarzan, Mpe Makaku*. Mama vwandaka na tapi ya mbeto ya ntama ya mika-mika ya nzietolo, to kima mosi, yina Mama Wathen pesaka yandi na kuyokama ya yinzo. Mpe yawu vwandaka na kivinga ya yandi, mpe mu—mu bakaka tapi yina. Mama vwandaka zaba ve ti mupepe nataka yawu ve. Mpe mu nataka yawu na nganda, mpe mu zengaka yawu, mpe mu salaka kazaka ya Tarzan samu na munu mosi, mpe, mu mataka na yinti. Mu—mu vwandaka zinga kati-kati ya ntangu na yinti, na kazaka ya Tarzan. Samu mu monaka yina yandi salaka, mu zolaka kusala yawu mpe.

¹⁴¹ Kasi kilumbu mosi, na lemvo ya Nzambi, mu me simba Buku ya kieleka, Biblia. Nkunga ya munu mpe disolo ya munu vwandaka, “Kuvwanda mutindu Yesu, na zulu ya ntoto mu zola vwanda mutindu Yandi.” Mu zola ve kuvwanda évêque to—to muntu mosi ya nene na kati ya dibuundu, pape mosi to nganga-Nzambi mosi. Mu zola vwanda mutindu Yesu. Dikunzi, ke sala ti beno vwanda ya kuswaswana. Ya kele na kima mosi samu na yawu, samu na kutanga Ndinga ya Yandi, mpe kima mosi na kati ya ntima ya beno, beno zola vwanda mutindu Yandi. Beno kele ya kukwika.

¹⁴² Ya kele mutindu, dikunzi samu na Klisto, dikunzi samu na Muklisto, kele mutindu. . . Yawu, ya kele mutindu kizundu na

masuwa. Yinga. Beno, beno fwana vwanda na dikunzi. Mpe kana Klisto kele dikunzi ya beno, ya kele mutindu kizundu. Ti, ntangu beno . . . Kana mubu me ningana mingi, mpe masuwa me kuma pene-pene na kudinda, mpe, beno, kivuvu mosi kaka beno kele na yawu, kele, kulosa kizundu. Mpe na yina kana masuwa me ningana, beno me mona kizundu ke simba masuwa. Beno zaba, beto kele na nkunga mosi, mu me zimbana nkumbu ya nsoniki yango ntangu yayi, kasi, *Kizundu Ya Munu Kele Ya Kusimba Mbote*.

¹⁴³ Mutindu mwana-bakala yayi ya fioti, mutindu beto ke banzaka yawu bambala mingi, yina vwandaka sakana na cerf-volant. Beno lenda ve kumona kima mosi, kasi yandi vwandaka na nsinga yango. Mpe bakala mosi lutaka kuna mpe tubaka, “Yinki nge ke na kusala, mwana?”

Yandi tubaka, “Mu ke pumbusa cerf-volant ya munu.”

Yandi tubaka, “Yinki nge ke na yawu na diboko ya nge?”

Yandi tubaka, “Nsinga.”

¹⁴⁴ Yandi tubaka, “Wapi kisika kele cerf-volant?” Yandi tubaka, “Mu ke na kumona yawu ve. Mbote, wapi mutindu nge zaba ti nge ke na kupumbusa cerf-volant?”

¹⁴⁵ Yandi tubaka, “Mu lenda kuwa yawu. Ya ke bendana.” Beno me mona? Na nsongi ya nsinga yina, kuna vwandaka dikunzi mosi. Na mutindu ya yandi ya bumwana, cerf-volant yina vwandaka dikunzi ya yandi, na yina yandi lendaka kutuba ti yandi vwandaka pumbusa cerf-volant. Ata ti yandi lendaka ve kumona yawu, kasi yandi vwandaka me simba, kima mosi, yina vwandaka simba yawu.

¹⁴⁶ Ya kele mutindu yina muntu, ntangu yandi me butuka mbala zole na Mpeve-Santu, yandi kele ya kusimba kima yina kele na kizundu kuna, mpe bitembo ke ningisa yandi ve. Yandi zaba ti yandi kele kaka mbote. Yandi me kangama. Mbote mingi.

¹⁴⁷ Ntangu yayi, kana beto kele na mwa bwatu ya beto, na kutepaka na zulu ya nzadi ya lukumu ya luzingu, mutindu poète ya nene tubaka, ti:

Luzingu kele ve ndosi ya mpamba!

Mpe moyo kele ya kufwa yina ke na kulala,

Mpe bima kele ve yina ba ke banza.

Luzingu kele kieleka! Mpe luzingu ke ya ludedomo!

Mpe ntoni ya yandi kele ve lukanu ya yawu;

Samu nge kele putulu, mpe nge ke vutuka na putulu,

Ba me tuba yawu ve samu na moyo.

¹⁴⁸ Oh, mu banza ti ya kele kitoko mingi! Ntangu yayi, Longfellow sonikaka nkunga yayi, *Nkunga Ya Luzingu*. Beno me mona?

Na kunataka masuwa na zulu ya nzadi ya nene
ya luzingu,
Beto ke tambula na masuwa ya ludedomo ya
luzingu mpe mpangi-bakala mosi ya mputu
me kudinda,
Na kutala, ke baka diaka kikesa.

¹⁴⁹ Beno me mona? Ntangu yayi beto me kota na masuwa, yina ke tambula na zulu ya nzadi ya ludedomo ya luzingu, mpe Klisto, samu na masuwa yina me natama na bitembo ya ntangu. Ntangu bitembo ke kuma kizitu, mpe ya ke na kuningana, mu kele na kyese ti mu kele na kizundu yina kele ya kusimba na kati ya vwale kuna, kisika mosi kuna. Ata ti lufwa yawu mosi lenda katula beno na yawu ve. Beno kele ya kukangama na dikunzi ya beno. Klisto kele Kizundu ya beto. Yinki Yandi kele? Yandi kele Ndinga. “Na mbandukulu vwandaka Ndinga, mpe Ndinga vwandaka na Nzambi, mpe Ndinga vwandaka Nzambi. Mpe Ndinga kumaka nsuni, mpe zingaka na kati ya beto.”

¹⁵⁰ Na yina, ntangu beto zaba ti bisalu ya beto kele kieleka na Ndinga, beto zaba ti malongi ya beto kele ya kulunga na Ndinga, na kubwelaka kima mosi ve to ke katula kima mosi ve, kaka Ndinga. Mpe beto ke mona bandandu ya mutindu mosi, ti bayankaka yina kangamaka na Ndinga ya mutindu mosi, yina ke zinga na kati ya beto, na yina kizundu ya beno kele ya kusimba mbote. Luzingu ya Klisto ke na kumonisama, na kati ya nzutu, na kati ya beno, mutindu ya vwandaka na kati ya Klisto, samu, “Ya vwandaka Nzambi na kati ya Klisto, na kuvutulaka ngwisani kati-kati ya yinza na Yandi mosi.” Mpe beno ke mona Nzambi na kati ya beno mosi, na kuvwandaka mutindu mosi na kati ya Ndinga, kaka kieleka mutindu Yesu salaka. Beno ke mona luzingu ya Yandi. “Bisalu yina Mu ke sala beno mpe ke sala yawu, yandi yina ke kwikila.” Ya kele ve yina ke meka na kukwikila, yandi yina ke banza ti yandi ke kwikila, kasi, “Yandi yina ke kwikila.” “Yandi yina ke kwikila na Munu, bisalu yina Mu ke sala yandi mpe ke sala yawu.” Samu na yinki? Yandi me kangama na Ditadi ya mutindu mosi. Yinki vwandaka Ditadi? Ndinga, ntangu nionso. Beno me kangama kuna. Ya kele Mbwetete ya beno ya nord ntangu beno me zimbana na mubu.

¹⁵¹ Beno zaba, beto kele na bambwetete mingi, kasi ya kele kaka na mbwetete mosi ya kieleka, yina ke ninganaka ve. Ya kele mbwetete ya nord, samu ti yawu ke vwandaka na kati-kati ya ntoto. Ata ti beno kele na manima, na zulu, to kisika yankaka, mbwetete yina ya nord kele kaka mutindu mosi. Ya kele mbwetete ya beno ya nord. Ntangu yayi, beno me mona, ya kele na bambwetete mingi yina ke kwendaka kisika na kisika. Kasi kana beno kele na . . . na mubu, na yina, muntu nionso yina ke zingaka na mubu zaba, to muzombi nionso yina ke tambulaka na kati ya mfinda, zaba ti mbwetete ya beno ya nord kele—kele na mfunu samu na beno. Yimeni. Na yina, ya kele mutindu boussole

ya—ya—ya beno. Boussole ke lakisaka ve Mars, to Jupiter, to kisika mosi. Ya ke lakisaka mbwetete ya nord. Samu na yinki? Ya kele dikunzi ya beno.

¹⁵² Oh, la la! Beno tala, dikunzi ya beno! Oh, mu ke tuba kima mosi! Mu ke kuwa ti ya ke na kukwisa. Beno tala. Mu ke kumitala musambidi na ntangu yayi, samu ti yayi kele kivuvu. Beno tala.

¹⁵³ Boussole ya beno lendaka kaka kulakisa na mbwetete ya nord. Ya kele kaka kisika yina ya lendaka lakisa. Kana ya kele boussole ya kieleka, ya ke kubwa na mbwetete ya nord konso ntangu. Ya kele kieleka?

¹⁵⁴ Na yina, kana beno kele na Mpeve-Santu, Yawu lenda talisa kaka na Ndinga. Ya ke lakisa beno ata fioti ve na denomination. Ya ke lakisa beno ata fioti ve na credo. Ya ke lakisa beno ata fioti ve kisika yankaka. Ya ke lakisa mbala mosi na Ndinga. Mu ke zola kuboka. Beno tala, ya kele—ya kele Kima mosi na kati ya muntu, yina ke na kupela, ntangu beno ke mona Mbwetete ya beno yina kele kuna, Yesu Klisto, Ndinga. Mpe beno ke mona Mpeve yina kele na kati ya beno ke bika yawu ve kukwenda na diboko ya kibakala to na diboko ya kikento. Yina kele kaka Yandi yina lenda. Yandi me kwisa samu na kubaka bima ya Nzambi, mpe kulakisa yawu, kutalisa yawu.

¹⁵⁵ Mpe Yesu tubaka, “Yandi ke sala kaka bima yina Mu ke tuba. Yandi ke monisa na beno bima yina ke kwisa,” ke talisa beno na ntwala ya ntangu, na ntwala yawu kuma awa. Beno me mona? “Yandi ke baka bima yina kele ya Munu mpe ke lakisa yawu na beno, mpe na yina Yandi ke talisa beno bima yina ke kwisa.” Jean 15.

¹⁵⁶ Beto ke mona ti Yandi ke talisa bima yango. Mpe Yandi ke baka bima yina kele ya Nzambi mpe ke lakisa yawu na beno. Mpe Yandi ke talisa na beno mambu yina Yesu tubaka. Bandinga yankaka, Yandi ke lakisa pwelele kima yango. Beno tula yawu mbote kuna na nsongi, na nkokila yayi, samu beto ke sadila yawu, na mwa ntangu fioti. Na kuvwandaka ya kieleka, na kusalaka diambu yango ya kieleka, beno me mona, na yina beno zaba. Kana beno . . . Mbwetete ya beno ya nord, yina kele Ndinga, samu na konso Muklisto.

¹⁵⁷ Kima nyonso ya kuswaswana na Ndinga! Beno tala. Bika mu tuba na beno kima mosi. Beno kuwa yayi mbote-mbote. *Yayi* kele luzayikisu ya muvimba, ya Kinzambi ya Nzambi, luzolo ya Yandi, mpe Nkwizulu ya Klisto. Mpe bima nyonso kele na kati ya Buku *yayi*, ya me manisa. Mpe kana kima kubenda beno ntama na Yawu, beno losa boussole yina, samu ti ya kele kaka credo. Ya kele kaka organi- . . . Ya kele kaka papier yina kele na kati ya pokosi ya beno, yina ba me namika na kivinga ya beno, ba me yidika mbote-mbote. Ya kele credo. Na yina, beno sosa boussole yina ke nata beno na Ndinga. Amen.

158 Beno tala, ntangu nzingulu yayi bulaka Paul, yandi kwendaka na Égypte mpe Arabie, kisika mosi kuna, mpe longokaka bamvula tatu. Nkembo! Fiou! Yandi zolaka vwanda ya kieleka. Mpe ntangu yandi monaka, ntangu Mpeve-Santu twadisaka yandi, ndinga na ndinga, yandi lendaka sonika Buku yina ya ba-Hebreux mpe kutalisa yawu na ba-Juif yina. Ya kieleka. Samu na yinki? Yandi vwandaka na kati-kati. Boussole yayi ya Mpeve-Santu me tula yandi na zulu ya Mbwetete ya nord.

159 Ntangu yayi, kana beno kele na kima yina ke benda beno ntama na Yawu, beno fwana bika yawu swi. Mwana, Yawu ke lakisa Ndinga ya Yandi, mpe kaka na Ndinga ya Yandi, samu Mpeve-Santu kwisaka samu na kutalisa, to kusiamisa, bansilulu ya Nzambi. Ya kele ve na credo ke sala yawu. Ata organisation mosi ve ke sala yawu. Bangolo ve to kima mosi lenda sala yawu. Kaka Mpeve-Santu, na nzila ya Ndinga. Mpe Yandi kele Nkuna.

160 Ntangu yayi, beno ke baka mbuma ya blé, mbuma ya kitoko ya blé, kasi ya lenda sala kima mosi ve. Ya kele ya kufwa tii nkuna ke kota na kati ya yawu. Kuna ya ke basisa bambuma mingi ya blé.

161 Mpe Klisto kele Luzingu yina, dikunzi. Kana blé kele ve na dikunzi yina na kati ya yawu, ya ke basika ata fioti ve. Kana blé yina kele ve na dikunzi yina, ya lendaka vwanda kitoko mingi na nganda, kasi ya lenda zinga ve, samu ti ya kele na kima mosi ve na kati ya yawu samu na kuzinga. Kasi ntangu ya kele na dikunzi yayi, ya lendaka telama na ntwala ya masawula nionso, na kutubaka, “Mu ke vumbuka diaka.” Samu na yinki? Samu ya kele na dikunzi. Ya kele na kati ya yawu. Ya fwana vumbuka diaka. Mpe ntangu yawu. . . “Kana beno ke zinga na kati ya Munu, mpe Bandinga ya Munu ke zinga na kati ya beno, na yina beno lomba yina beno zola.” Yawu yina dikunzi.

162 Kasi kana beno kele na ba-credo mpe bima yankaka nionso me kangama na Yawu, beno lenda ve kuvukisa mafuta mpe masa. Beno lendaka baka yawu mpe kuzenga yawu na bitini mutindu beno zola, ya ke vukana ata fioti ve, samu ya kele bima zole ya kuswaswana. Mpe beno lenda ve kusala ti credo, yina kele ya kuswaswana na Biblia, mpe Biblia kuvukana. Beno lenda ve kusala ti denomination mpe nsambulu yina me butuka na kimpwanza, to mpulusu yina me butuka na kimpwanza, kuvukana kintwadi. Samu, ya kieleka kaka, mutindu Nzambi ke salaka kaka. . .

163 Mu ke tuba yawu, na mutindu nionso. Nzambi ke bebisaka manaka ya Yandi ata fioti ve. Yandi lenda kubebisa yawu ve, samu Yandi kele ya seko. Mpe mu me bakula, beno zaba, munu, Ya ke kwenda na ntwala ya bantu mingi. Beno me mona? Kasi Nzambi lenda ve kubebisa manaka ya Yandi. Yandi lenda ve

kusala kima mosi kilumbu *mosi*, mpe kusoba yawu, kusala kima yankaka, kutuba ti ya kele yimbi kilumbu *yina*.

¹⁶⁴ Nzambi ke salaka ve na bimvuka ya bantu. Nzambi ke salaka na muntu mosi, samu bantu kele na mabanza ya kuswaswana. Yandi me salamaka na mutindu ya kuswaswana, na nkadulu. Nzambi fwana baka muntu yina, mpe kuyidika yandi, mpe kumpapa yandi, kubasisa yandi na kati ya yandi mosi, tii kuna Yandi ke nata yandi na nkadulu ya Yandi. Beno me mona? Mpe kuna Nzambi ke sala na muntu yina. Beno tala na kati ya bansungi, Noé mpe Moïse, baprofete, bawu zole ata fioti ve na ntangu mosi. Mosi, na ntangu nionso, na kati ya bansungi nionso.

Na yina, kana beno tuba, “Mpulusu kele na kati ya nkonga ya nene ya bakonseye.”

¹⁶⁵ Beno tala, mpe na yina mu longaka awa ntama mingi ve, na tabernacle. Ya vwandaka na Achab, mpe ya vwandaka na Josaphat. Mpe ba vwandaka kwenda na Ramoth na Galaad, samu na kupusa. Na lufulu, bawu vwandaka na foti ve, yinsi vwandaka ya bawu. Mpe mbeni, bantu ya Syrie na zulu kuna, vwandaka fulusa bivumu ya bana ya bawu na blé yina ba-Israélite lendaka kudia. Ya vwandaka kimvwama yina Nzambi pesaka bawu, na yina, na lufulu, ya monanaka mbote. “Kwenda na munu, mpe mata kuna, mpe beto ke pusa bawu ntama na yinsi.” Mbote, ya ke wakana mbote. Landila lufulu, ya vwandaka mbote, kasi ya kele na misiku.

¹⁶⁶ Josaphat, na kuvwandaka muntu ya mbote, yandi tubaka, “Kasi beto fwana yufula Mfumu ve?”

¹⁶⁷ Na yina, Achab, retrograde yina, tubaka, “Mbote, ya kieleka.” Mukwikidi ya ndilu, beno zaba. Yandi tubaka, “Oh, ya kieleka, mu vwandaka banza na yawu. Mu kele na baprofete bankama yiya ya ba-Hébreux. Bankama yiya na kati ya bawu, mu ke pesaka bawu madia, mu ke kebaka bawu. Bawu kele ya kulutula mbote na kati ya yinsi. Beto ke nata bawu.”

¹⁶⁸ Mpe bawu nionso kintwadi, na ntima mosi, tubaka, “Kwenda. Mfumu kele na nge.” Na lufulu, bawu vwandaka na foti ve, kasi bawu simbaka ve na dikunzi yina.

Na yina ntangu yandi tubaka, “Ya kele ve na mosi yankaka?”

¹⁶⁹ Yandi tubaka, “Yinga. Ya kele na mosi yankaka, kasi mu ke yinaka yandi.” Yandi tubaka, “Yandi ke tubaka yimbi ntangu nionso samu na munu, beno me mona, yandi ke tubaka ntangu nionso.”

¹⁷⁰ Wapi mutindu yandi lendaka pesa profesu ya mbote, ntangu Ndinga ya muvimba, Elie yina vwandaka na ntwala ya yandi, tubaka na Achab, “Bayimbwa ke kunwa menga ya nge”? Ntangu yayi, wapi mutindu profete yina me siamisama tubaka ti kima yina vwandaka ve luzolo ya Nzambi? Mpe wapi mutindu, ti,

“Bayimbwa ke kudia Jézabel, mpe mvumbi ya yandi ke vwanda mutindu fumier na zulu ya bilanga, na yina ba lendaka ve kutuba, ‘Yayi Jézabel.’” Na nsingulu ya mutindu yina na zulu ya muntu, wapi mutindu muntu yankaka lendaka sakumuna?

¹⁷¹ Ya kele mutindu yina bubu yayi. Wapi mutindu muntu lenda sakumuna bima yayi yina ke na kunataka bantu ntama na Nzambi ntangu nyonso? Ya kele kaka na kima mosi ya kusala, kana beno fwana kutelama beno mosi: kusinga kima yango, na Nkumbu ya Mfumu, mpe kukangama na Yawu, ntangu beno ya kieleka.

Beno ke tuba, “Mbote, Mpangi Branham, nge ke sala ti bantu kuyina nge.”

¹⁷² Nzambi ke zola munu. Yina kele dikunzi ya munu. Beno lenda pema ve na diboko ya muntu. Beno fwana kupema na zulu ya Ndinga, yina Nzambi tubaka na kusala.

¹⁷³ Wapi mutindu Michée zabaka ti yandi vwandaka ya kusungama? Yandi vingilaka. Yandi kuzwaka vision. Bawu vwandaka na vision, diaka, kasi vision yango vwandaka ve ya kufwanana na Ndinga. Mpe bubu yayi, ya kele kima ya mutindu mosi. Michée fwanikisaka vision ya yandi na Ndinga, mpe kuna yandi monaka ti yandi mpe Ndinga vwandaka kintwadi. Bubু yayi, kana vision ya beno kele ya kuswaswana na Ndinga, beno bika yawu swi, samu ya kele dikunzi ya luvunu. Dikunzi ya Michée vwandaka kieleka na Ndinga, na yina yandi lendaka ve kutelama mpe kutuba, yandi, yina yandi tubaka, mpe—mpe kukwikila yawu.

¹⁷⁴ Ntangu, bawu bulaka yandi mbata na yinwa, mpe tubaka, “Wapi nzila Mpeve ya Nzambi me kwenda?”

¹⁷⁵ Yandi tubaka, “Nge ke zaba yawu ntangu nge ke kima kivinga na kivinga.” Kieleka.

¹⁷⁶ Yandi tubaka, “Ntangu mu ke vutuka na ngemba. . . Beno tula muntu yayi na boloko, mpe ntangu mu ke vutuka na ngemba,” tubaka Achab, “Mu ke tala diambu ya muntu yayi.”

¹⁷⁷ Oh, ntangu yayi, Michée, wapi mutindu nge ke tuba samu na yawu? Ba ke zenga yintu ya nge ntangu yandi ke vutuka. Michée telemaka kuna na kikesa mutindu Etienne salaka. Amen. Kaka ya kukubama mutindu Mfumu ya munu kwendaka na kulunsi. Kaka na malembe mutindu Daniel ntangu yandi kotaka na dibulu ya bankosi, to Schadrac, Méschac, Abednego ntangu bawu kotaka na dibulu ya tiya. Ya kieleka! Yandi telemaka kuna mpe tubaka, “Kana nge vutuka kaka. . .” Samu na yinki? Yandi vwandaka na dikunzi. “Kana nge vutuka kaka, Nzambi me tuba na munu ata fioti ve. Zenga yintu ya munu.” Yandi vwandaka na dikunzi. Yandi zabaka ti boussole ya yandi, yina twadisaka yandi tii na vision yayi, vwandaka kieleka na Mbwetete ya nord. Yinga, tata. Kizundu ya yandi simbaka, yinga, Ndinga mpe Yawu kaka.

Kana dikunzi ya beno, kana beno kele na dikunzi na luzingu ya beno . . .

¹⁷⁸ Ya vwandaka na ntangu yina, beno zaba, *étiquette* vwandaka na dikunzi ya yandi. Mu ke banza ve na nkumbu ya kento yina, kasi yinsi ya muvimba tulaka kivuvu na yina kento yina tubaka. Mu me zimbana nkumbu ya yandi. Mu vwandaka sonika noti mosi awa. Mu lenda ve kubanza nkumbu ya kento yina, yina ya vwandaka. Kasi awa, mwa bamvula fioti me luta, ba zolaka vwanda, kento yayi, yina yandi vwandaka tuba. Kana yandi tubaka ti ba simba mbele na diboko ya kikento, ya vwandaka—ya vwandaka mutindu yina, yina vwandaka dikunzi. Yandi vwandaka mvutu na mambu nionso. Mpe kana beno tula nsomo na diboko ya kikento, na yina beno kele kaka na kifu. Wapi vwandaka nkumbu ya yandi? [Dibuundu me tuba, “Emily Post.”—Mu.] Oh, yawu yina. Ya kieleka. Yinga. Ya kele yandi. Ntangu yayi, beno vwandaka—beno vwandaka kieleka . . . Yandi vwandaka—yandi vwandaka dikunzi ya *étiquette*. “Ya fwana vwanda mutindu yina.” Na yina, oh, beto ke mona bima mingi ya mutindu mosi. Kasi, beto ke mona ti, ntangu yayi ya me zimbana. Beno kudia beno me zola. Yinga, tata. Mbote mingi. Kasi yina vwandaka dikunzi ya *étiquette*. “Beni fwana sala yawu mutindu yina.”

¹⁷⁹ Ya vwandaka na ntangu yina Adolf Hitler vwandaka dikunzi ya Allemagne, nionso yina yandi vwandaka kutuba. Ntangu yandi vwandaka tuba, “Beni dumuka,” ba vwandaka dumuka. Yandi tubaka, “Beni kufwa,” bawu vwandaka kufwa. Bammillion ya ba-Juif, yandi vwandaka sala kidimbu na yintu ya yandi. Beni me mona yina salamaka na dikunzi ya mutindu yina? Ya vwandaka monana mutindu ngolo, kasi ya vwandaka ya kuswaswana na Ndinga.

“Wapi mutindu beno me zaba ti yawu vwandaka ya kuswaswana na Ndinga?”

¹⁸⁰ Nzambi tubaka. Ntangu Balaam mekaka na kutala kuna na zulu ya Israël, samu na kusinga yawu, yandi tubaka, “Mu ke mona yandi mutindu mpakasa. Wapi mutindu batenta ya nge kele kitoko! Muntu nionso yina ke singa nge ke singama. Muntu nionso yina ke sakumuna nge ke sakumuka.”

¹⁸¹ Ya monanaka ti Hitler zolaka kumona yawu. Ya monanaka ti Baklisto ya Allemand zolaka kumona yawu, beno me mona, dikunzi yina. Ya kieleka ya kuswaswana na Ndinga yayi. Beni zaba, mutindu ba me tuba, “Muntu . . . Nzambi salaka muntu, kasi muntu me sala bampika.” Muntu mosi ke meka na kuyala na zulu ya bantu yankaka. Beto kele na Mfumu mosi, ya kele Nzambi.

¹⁸² Kasi Hitler vwandaka dikunzi ya Allemagne. Beni tala yawu bubu yayi. Ntangu yayi, beno me mona yina salamaka? Yawu vwandaka dikunzi ya yimbi. Samu na yinki? Ya vwandaka ya

kuswaswana na Ndinga. Mpe ntangu yayi beno ke mona kisika yawu nionso kwendaka: na nsoni.

¹⁸³ Mpe kana dikunzi ya beno kele na organisation mosi, to na mwa sensation mosi, to kima yankaka na nganda ya Muntu ya Yesu Klisto, beno ke kwisa na kitini ya nsoni yina, kaka yimbi mingi, beno me mona, kana dikunzi ya beno kele Klisto ve. Yina kele kaka dikunzi mosi ya kati-kati ya luzingu ya muntu, mpe Klisto kele Ndinga; dibuundu ya beno ve, ndinga ya beno. Ndinga! Beno me mona? “Na zulu ya dikunzi yayi Mu ke tunga Dibundu ya Munu,” na zulu ya Klisto, Ndinga.

¹⁸⁴ Ya vwandaka na ntangu mosi ntangu Mussolini vwandaka dikunzi ya Rome. Mu zaba ve, mu lendaka vwanda ti mu tangaka zulunale mosi, to ya lendaka vwanda ti mu tangaka yawu na buku mosi, to muntu mosi tubaka na munu, kasi ya vwandaka Mussolini vwandaka yufula bakiuvu na muntu mosi. Yandi vwandaka . . .

¹⁸⁵ Yandi zolaka—zolaka kunata Rome na ngalasisse, na bansaka ya ngalasisse. Mpe ya vwandaka na kiteki mosi ya nene ba salaka, samu na yandi, samu na bansaka ya ngalasisse. Yina kele mbote mingi. Grèce yango vwandaka na dibanza yina bamvula mingi me luta. Rome ke mekaka ntangu nyonso na kuvwanda na yawu. Ba-athlete kele mbote, to—to bansaka ya ngalasisse. Kasi—kasi beno bambuka moyo, yina ke baka ve kisika ya Klisto. Ata mutindu beno kele na ngolo, ya kele ve na kima ya kusala na yawu. Yandi kele na ngolo nyonso. Mpe beno ke mona na zulu ya yina yandi mekaka na kutunga Rome. Mpe yandi mekaka na kutunga Rome na zulu ya kima mosi ya dikunzi, ti yandi vwandaka dikunzi yango.

¹⁸⁶ Mpe bawu tubaka ti, kilumbu mosi, ti chauffeur ya yandi—ya yandi—ya yandi kwisaka na ntwala ya muniti mosi, mpe yandi kufwaka yandi na munduki. Yandi tubaka, “Mu tubaka ve, ‘vwanda awa muniti mosi na ntwala ya ngunga ya yivwa.’ Mu tubaka, ‘Vwanda awa na ngunga ya yivwa.’” Vlan! Mpe yandi kufwaka yandi na munduki. Beno me mona? Beno me mona? “Mu zola ve ti nge vwanda awa minuti mosi na ntwala. Mu zola nge vwanda awa na ngunga ya yivwa.” Beno me mona? Beno tala dikunzi yina yandi mekaka na kuvwanda yandi mosi. Kasi beno me mona yina salamaka?

¹⁸⁷ Beno bambuka moyo, mingi na kati ya beno, bantu ya ntama, Roy Slaughter, mu banza, mpe na manima diaka na yina, beno ke bambuka moyo kuna ntangu mu tubaka na beno samu na yina me tala profesi. Kilumbu mosi, kuna na kivinga Odd Fellow, ntete beto kwiza awa, Mu tubaka, “Mussolini ke suka na nsoni.” Mu tubaka, “Mvita ya yandi ya ntete, yandi ke kwenda na Ethiopie, mpe Ethiopie ke kubwa na makulu ya yandi. Kasi yandi ke kuma na nsuka ya yandi, mpe muntu ve ke sadisa yandi. Na nsoni ba ke zika yandi.” Ya vwandaka mutindu yina.

¹⁸⁸ Mu tubaka, “Ya kele na ba-isme tatu me basika. Nazisme, fascisme, mpe communisme.” Mu tubaka, “Ba-isme yayi ke kwenda na ntwala mpe ke kuma kima mosi, mpe ya ke vwanda communisme. Beno tala mbote. Communisme ke yoka Rome na tiya.” Beno me mona?

¹⁸⁹ Beno tala yawu. Uh-huh. Ya kele kisadilu na diboko ya Nzambi. Ba ke banza ti ba ke telemina Nzambi. Ba ke na kusalaka kaka na kati ya yawu, ntangu nyonso, bawu zaba yawu ve. Yandi ke sadila bawu kaka mutindu marionnette, uh-huh, kima mosi na diboko ya Yandi, mutindu Yandi salaka na Nebucadnetsar mpe mingi yankaka. Ntangu yayi beno tala. Beno tala, ntangu yayi.

¹⁹⁰ Ya vwandaka na ntangu ntangu Pharaon vwandaka dikunzi ya Egypte, kasi beno tala kisika ya kele ntangu yayi. Beno me mona? Nionso me kubwa.

¹⁹¹ Oh, ya kele mutindu mosi ya yimbi, na yina bawu ke kubwa. Bawu kele makunzi yina me salama na bantu. Beno lendaka ve kubaka dikunzi yina me salama na bantu. Mu ke kipe ve kana ya kele mfumu ya yinsi, kana ya kele mfumu ya nkú, kana ya kele ntinu, kana ya kele dibuundu, kana ya kele organisation, kana ya kele credo. Bima yayi nionso ke kufwa, kaka mutindu makunzi ya mutindu yina na kati ya bansungi.

¹⁹² Beto lendaka tala na manima. Beno tala na manima. Beno tala bantu yina tulaka kivuvu na ba-empereur. Beno tala bantu yina tulaka kivuvu na bamfumu ya nkú. Beno tala bantu yina tulaka kivuvu ya bawu na zulu ya makunzi ya mutindu yina, mpe beno tala kisika bawu kele bubu yayi.

¹⁹³ Ntangu yayi beto baluka mpe beto tala bantu yina tulaka kivuvu ya bawu na zulu ya Biblia, na zulu ya Ndinga ya Nzambi, mpe simbaka Yawu mutindu dikunzi. Beno tala kisika bawu kele ntangu yayi.

¹⁹⁴ Paul ke pesa beno mwa disolo ya fioti samu na bawu, na ba-Hebreux, kapu 11, yina bawu salaka. “Wapi mutindu bawu nungaka bimfumu, salaka mambu ya mbote, mpe nionso yina. Mpe bawu kwendaka sika na sika na kulwataka bampusu ya mameme mpe bampusu ya bankombo. Bawu yina yinza vwandaka ve ya kulunga.” [Kisika ya mpamba na bande—Mu.] Ke vingila na Nkembo samu na mvumbukulu yina ya nene. Beno me mona? Mbote mingi. Na yina bawu, bayankaka na kati ya bawu, kuzwaka ve—kuzwaka ve bimangu yayi, mpe bawu pesaka banzutu ya bawu, na mutindu nionso, na kusepelaka na ntwala samu na mvumbukulu yina. Ba vwandaka kipe ve, mutindu ba ke sukisa baluzingu ya bawu. Bawu zolaka landila kukwenda na ntwala mpe kukipesa bawu mosi mutindu munkayulu, samu ti bawu kuzwa mvumbukulu yina, mpe yawu yina bawu salaka.

Ntangu yayi, makunzi, beto ke zonzila, dikunzi.

195 Beno zaba, yinzo ya beto ya nene ya lusambusu keke dikunzi. Ya keke dikunzi. Ya keke—ya keke kisika ya nsuka ya bansamunu nionso na yinza yayi. Ya kieleka. Lukanu ya bawu keke dikunzi, na yinzo ya beto ya nene ya lusambusu. Kieleka. Oh, mu zaba bantangu yankaka beto ke zolaka yawu ve, kasi ya—ya keke dikunzi, na mutindu nionso. Yinga, tata. Yinki zolaka salama kana beto vwandaka na yawu ve? Yinki na manima? Kasi ya keke dikunzi. Ya kieleka. Samu na yinki? Ya keke, yinsi ya beto, keke ya kukangama na yawu. Ntangu yinzo yayi ya nene ya misiku ke baka lukanu ya nsuka, yimeni. Ya keke dyaka ve na ntangu. Wapi kisika beno ke kwenda, na manima ya yawu? Beno ke landa lukanu ya bawu, yawu kaka. Beno fwana baka yawu. Ba keke ndinga ya nsuka. Ba keke amen.

196 Beno lendaka luta na ba-tribunaux municipal ya mbanza. Beno lendaka luta na ntwala ya zuzi, na manima kuluta na tribunal fédéral, na ba-tribunaux ya mutindu na mutindu, mpe na ba-tribunaux fédéral. Kasi ntangu beto ke kuma na yinzo ya nene ya lusambusu, yimeni. Kieleka. Bantangu yankaka beto ke zolaka ve, kutuba, “Mbote, mu ke zolaka ve lukanu ya bawu,” kasi beno meka kaka na kukwenda ntama na yawu. Yina keke dikunzi ya yinsi ya muvimba. Mpe yinki kana beto me baka yawu ve? Yinga.

197 Beto fwana vwanda na dikunzi. Muntu nionso fwana vwanda na mosi. Beno keke na mosi. Kasi yina mu ke meka na kutuba na beno, mu ke meka na kuvutuka na manima, samu na kutalisa beno yina makunzi keke.

198 Ntangu yayi, yinzo ya nene ya misiku ya yinsi keke dikunzi ya yinsi. Ya keke sukisa kuswana nionso. Bawu keke sukisa diambu. Yina bawu keke tuba, yawu yina kaka.

199 Ya keke na dikunzi na bansaka ya nkwesho. Ya keke arbitre. Oh, yinga. Bantangu yankaka beto ke zolaka ve lukanu ya yandi, to, kasi ya keke—ya keke—ya keke yawu kaka, na mutindu nyonso. Arbitre, lukanu ya yandi keke ndinga ya nsuka, ya kieleka, ata ti yina bantu yankaka ke tuba. Kana yandi tuba ti ya keke bi, ya keke bi. Yina keke kieleka. Ya kieleka. Ata ti yina bantu yankaka ke tuba, yina keke ve na kima ya kusala na yawu. Mpe beto banza kaka na yawu. Kana beno . . . mu ke kwendaka ve na bansaka ya nkweni, kasi me sonika yawu kaka. Arbitre, yandi keke dikunzi na nsaka ya nkwesho.

200 Mosi ya bawu keke tuba, “Yina vwandaka balle.” Yankaka keke tuba, “Nge keke muntu ya luvunu.” *Yayi* keke tuba, “Yayi keke mutindu *yina*. Ya fwana vwanda mutindu *yayi*.”

201 Arbitre keke tuba, “Bi!” Beno tala bawu nionso keke vutuka na bisika ya bawu mpe keke vwanda. Bayankaka na kati ya bawu keke niunguka. Kasi mu keke banza ti bawu keke sidika samu na yandi kuna, na kati ya ntima ya bawu, mpe nionso yina, kasi ya

kele “bi” na mutindu nionso. Samu na yinki? Yandi kele mpova ya nsuka.

²⁰² Gardien ya ntete ya lufulu ke tuba, “Beno zaba ti yawu me luta.” Yankaka yina ke tuba, “Beno zaba ti ya kele. . .”

²⁰³ Yandi ke tuba, “Bi.” Uh-huh. Yawu yina kaka. Beno kanga yinwa na ntangu yina, beno vutuka na kisika ya beno.

²⁰⁴ Yinki zolaka salama kana arbitre vwandaka ve na saka ya nkweeso? Oh! Beno lendaka banza mutindu ya nkweeso ya zolaka vwanda? Mosi ya bawu ke tuba, “Ya vwandaka bi.” Yankaka yina ke tuba *yayi*. Yankaka ke tuba *yina*. Yankaka ke tuba, “Nge kele muntu ya luvunu.” Ya ke vwanda na kuswana mpe kunwana.

²⁰⁵ Samu na kuvwanda na nsaka ya nkweeso, beno fwana vwanda na dikunzi. Mpe yandi ke kwenda kuna, mpe ata ti beno zola yandi ve, to nionso yina, yandi—yandi kele dikunzi, na mutindu nionso. Yandi kele dikunzi. Mpova ya yandi kele nsuka, ata ti nionso yina beno ke tuba samu na yawu. Ya kele mutindu yina. Ntangu yayi, kana bawu salaka yawu ve, mambu nionso zolaka kwenda na poto-poto. Ya kieleka?

²⁰⁶ Yinki zolaka vwanda yinsi kana ya vwandaka ve na tribunal fédéral? Kana ya vwandaka ve na yinzo ya nene ya lusambusu na yinsi yayi, wapi kisika ya zolaka kwenda? Wapi kisika ba zolaka kwenda? Yinsi zolaka vwanda na kati ya poto-poto. Kana ya vwandaka ve. . .

²⁰⁷ Kana arbitre vwandaka ve na nsaka ya nkweeso, ya zolaka suka yimbi, beno zolaka simba ve nkweeso ti muntu mosi zolaka swanisa beno. Muntu mosi ke telama kuna, mpe ntangu yankaka ya me kota na kisika ya mbote, mpe muntu yankaka lendaka tuba, “Oh, ve. Ve, ve. Ya me sala yawu ve.” Na yina, ya ke banda. Ntangu ba ke losa balle ya ntete, ba ke swana samu na yawu. Mosi na kati ya bawu ke tuba, “Yina vwandaka bi.” Yankaka ke tuba, “Ya vwandaka ve bi.” Beno me mona?

²⁰⁸ Beno fwana vwanda na muntu mosi na zulu ya yina nsaka yina ke vwanda, mpe ya kele arbitre. Ntangu yandi ke tuba, “Bi,” ya kele bi. Kana yandi tuba, “Balle,” ya kele balle. Nionso yina yandi ke tuba, ya kele mbote. Yawu yina. Mpe kana beno sala mutindu yina ve, beno ke vwanda ve na nsaka.

²⁰⁹ Bika mu talisa na beno dikunzi yankaka, kele nsemo ya mbwaki. Nsemo ya mbwaki, ntangu yawu me tuba “telema,” yawu zola tuba telema. Kana beno luta yawu, beno ke futa samu na yawu. Kasi kana mbanza yayi vwandaka ve na bansemo awa, bansemo samu na kutelama, wapi mutindu ya mbanza ya zolaka vwanda? Beno me mona? Ya fwana vwanda na dikunzi. Mu ke kipe ve yina pulusu ke tuba, to muntu yankaka ke tuba, yina me telema kuna. Yina ke baka kisika ya zole. Kana muntu lenda lakisa ti beno me luta nsemo ya vert, mu ke kipe ve yina pulusu ke tuba, ba kele na foti. Ntangu nsemo me tuba “kwenda,” ya zola kutuba kukwenda. Ya kele dikunzi. Beno lendaka talisa ti, nsemo

me tuba “kwenda.” Pulusu lendaka vwanda ya kutelama kisika mosi, mfumu ya mbanza lendaka vwanda, kisika mosi kuna, yina ke sala luswaswanu mosi ve. Kana beno kele na kidimbu ti ya vwandaka “kwenda,” beno kwenda. Mpe kana muntu kubula beno, ya kele foti ya bawu. Beno lenda talisa yawu. Ya kele kieleka.

Mpe beto lenda lakisa yina beto ke na kuzonzila. Kieleka.

²¹⁰ Ntangu yayi, yinki kana nsemo ya mbwaki vwandaka ve? Mosi zolaka kwisa kuna na carrefour, mpe yawu. . . beno tala yina yawu zolaka vwanda. Mosi ke tuba, “Hé! Katuka na nzila. Mu ke kwenda nswalu. Mu ke kwenda na kisalu. Mu kele na nsukinina ntangu yayi. Mu ke luta ntangu yayi.” Yankaka ke tuba, “Kubanza ve mutindu yina. Samu, ya kele munu ke kuluta, samu ti mu vwandaka awa ntete.” Mpe mu lendaka mona kento kubasika mpe kuyidika nsuki ya yandi. Yinki kana beto vwandaka ve na nsemo ya mbwaki? Ya zolaka vwanda ve na kisaka-saka!

²¹¹ Yawu yina diambu na mabuundu. Beno me mona? Ya kieleka. Ya kele samu na yina beto kele na kisaka-saka mingi ya badenomination. Yinga. Yina kele kaka kieleka. Ata muntu mosi ve ke kuma kisika mosi. Ba ke bikala kuna, na kuswana.

²¹² *Awa* kele Nsemo ya Nzambi. Ntangu Yawu ke tuba “kwenda,” kwenda. Ntangu Yawu ke tuba “telema, ya kele ntama mingi,” na yina telema. Ya kieleka. Ya kele kisika yina beto kele ya kuvwanda, na zulu ya Yawu, Ndinga yayi, ve yina nkonga mosi ya bantu me tuba, to mwa nkonga yankaka ya bantu tubaka. Yesu tubaka, “Bidimbu yayi ke landa bayina ke kwikila.” Beto kwenda. “Beno kwenda na yinza ya muvimba, beno longa Nsangu ya mbote na bantu nionso.”

²¹³ Beno zaba, wapi mutindu malongi ya lukolo kele mbote, kasi ata mbala mosi ve ti Yesu me lombaka yawu. Ya kieleka. Wapi mutindu bayinzo-Nzambi kele mbote, bivinga, Yandi me lombaka yawu ata fioti ve. Wapi mutindu balupitalu kele mbote; beto, mabuundu, me tunga balupitalu. Ya kele mbote mingi. Beto ke sepela na yawu. Kasi Yandi me lombaka yawu ata fioti ve.

²¹⁴ Yandi tubaka na Dibuundu, “Longa Nsangu ya mbote.” Mpe Nsangu ya mbote kwisaka kaka ve na Ndinga kaka, kasi na ngolo mpe kumonisama ya Ndinga. Paul tubaka mutindu yina. Na yina beno kwenda, beno lakisa Nsangu ya mbote, oh, la la, kana ya kele mutindu yina.

²¹⁵ Oh, beto kele, bubu yayi, beto ke na kuzinga ntangu yina beto me kuzwa badokotolo ya kulutila mbote yina beto me kuzwaka ntete ve. Beto kele na bankisi ya kulutila kitoko beto ke sadilaka. Beno zaba yawu. Mpe beto ke zitisa babakala yina. Beto ke sambilaka samu na bawu. Mu ke sala yawu, mpe mu banza ti beno ke sala yawu. Bantu yayi, na lubakusu ya bawu ya nsatu ya bawu. . . Bawu kele na ba-sense zole ya kusadila,

ya kele kumona mpe kusimba, mpe bawu. . . mpe kuwa. Bawu ke salaka na muningu ya ntima, to kusimba tumeur, to kima mosi, to kumona kima mosi bawu lendaka mona, kupanzana ya kimbevo, to—to kima mosi na kizizi, yina ke fika kizizi to nzutu, kisika mosi kuna. Ba—ba ke sala na zulu ya bima yina. Beno me mona? Samu ya kele. . . Mpe ba ke meka na kubaka bankisi, mpe mwa ndambu yina ke kufwa yawu, mpe kasi ya ke kufwa beno ve, mpe—mpe nionso yina. Bawu. . . Yina kele kusalu ya bawu, kusala na zulu ya yawu. Mpe beto ke sepela na yawu. Yina kele mbote mingi. Kasi, beto me kuzwa badokotolo ya kulutila mbote, nkisi ya kulutila mbote, balupitalu ya kulutila mbote, mpe bimbevo mingi yina beto me kuzwaka ntete ve.

²¹⁶ Beto kele na kukondwa lukwikilu mingi yina beto me kuzwaka ntete ve. Yinga, tata. Ya kieleka. Balongi me bongisa ba-organisation, mpe me kuzwa ba-denomination ya nene, mpe na kundima mambu nionso na kati ya bawu, mpe nionso yina, mpe samu na konso kima yina, na kusalaka mambele ya dibuundu. Mpe bawu kwendaka kuna na seminare mosi, yina kele mutindu kisika bansusu ke butukaka, mpe kisika ba ke butuka na kulutaka na kinikinu mosi ke basisa bawu mutindu yina, mpe ntangu yankaka bawu zaba mingi ve na yina me tala Nzambi kulutila Hottentot kuzaba ve mpimpa ya ba-Egyptien. Ba ke basisa bawu mutindu yayi, mpe yawu yina. Beno me mona?

²¹⁷ Oh, yina beto ke na yawu nsatu na mabuundu ya beto kele muntu yina kele na dikunzi mosi. Yina beto kele na yawu nsatu na dibuundu ya ba-Methodiste, na dibuundu ya ba-Baptiste, na dibuundu ya ba-Pentecotiste, na dibuundu ya ba-Presbytérien, kele dikunzi, muntu ya Nzambi yina ke kangama na Ndinga mpe na Klisto, mpe ke nata dibuundu yayi mutindu yayi kisika mambele nionso ke tambula landila Ndinga yayi, na kumonaka Ndinga yayi me monisama, ke landa bawu. “Bidimbu yayi ke landa bayina ke kwikila, na yinza ya muvimba.”

Bawu tubaka, “Ba me katulaka yawu.”

²¹⁸ Yesu tubaka, “Beno kwenda na yinza ya muvimba, beno longa Nsangu ya mbote na bantu nionso.” Beto me kuma ntete ve na yinza ya muvimba, mpe ntama kuna na konso kivangu. Wapi kisika? “Na yinza ya muvimba.” Na nani? “Kivangu nionso.” Yinki ke salama? “Bidimbu yayi ke landa bayina ke kwikila. Na Nkumbu ya Munu ba ke basisa bampeve ya yimbi. Ba ke tuba bandinga ya malu-malu. Kana bawu simba nioka, to kunwa kima yina ke kufwaka, ya ke sala bawu yimbi ve. Kana bawu tentika maboko ya bawu na zulu ya bambevo, bawu ke beluka.” Yina kele dikunzi me telama kuna, Ndinga, Mbwetete yina ya nord, boussole yayi ke bikala kaka na Yawu. Yawu yina beto kele na yawu nsatu.

219 Kasi beto me kwenda kuna mpe beto me tunga balukolo, beto me sala bantu ba-organisation, beto me kotisa bamambele, mpe beto me swana na ba-Baptiste samu ti bawu vwandaka kwikila ve mutindu beto, mpe ba-Methodiste samu bawu kwikilaka ve, mutindu *yayi*. Mpe—mpe beto me telemisa seminere ya nene, beto me tunga bayinzo-Nzambi ya nene, na ba-banc ya ntalu mingi, mpe orgue ya nene, mpe nionso yina, mpe nkonga ya bantu yina ke lwata mbote mingi, mpe ba me nata mfumu ya mbanza mpe bantu nionso na kati ya dibuundu. Mpe yinki beto me kuzwa? Nkonga ya lufwa, yina me kangama na dikunzi ya denomination. Lufwa! Oh, ya vwanda ntama kuna!

220 Kana mu kufwa na kati ya ksalu, dikunzi ya munu kele Yesu Klisto, na zulu ya yawu mu ke kwikila, kana bantu nionso kukwenda. Muntu mosi tubaka, Docteur Davis tubaka na munu, “Billy, kana nge longa kima ya mutindu yina, nge ke longa yawu na makunzi ya yinzo-Nzambi.”

221 Mu tubaka, “Mu ke longa Ndinga ya Nzambi na makunzi yina, na yina, samu ti Nzambi kele na kiyeka ya kubasisa na makunzi yina bana samu na Abraham.” Kieleka. Ndinga ya Nzambi kele kieleka.

Yandi tubaka, “Nge banza ti bawu ke kwikila na nge?”

222 Mu tubaka, “Ya kele ve . . . Yina kele ve dyambu ya munu. Ya kele ksalu ya munu na kuvwanda kieleka ya kukwikama na Ndinga yayi.” Ya kele kieleka.

223 Yandi tubaka, “Nge banza ti nge ke kutana na yinza ya kulonguka mutindu yayi, na théologie ya—ya kubeluka ya Kinzambi?”

224 Mu tubaka, “Ya kele ve kubeluka ya munu ya Kinzambi. Ya kele nsilulu ya Yandi. Yandi vwandaka Yina pesaka lutumu.” Oh!

225 Mpe mu ke bambuka moyo ntangu Yandi kulumukaka kuna na Nsemo yina ya nene, mu vwandaka ya kutelama kuna na nzadi, na mvula 1933, na Ngonda ya sambanu, ntangu Yandi tubaka, “Mutindu—mutindu ba fidasaka Jean-Baptiste samu na kuzabisa mpe ke kuyidika nkwezulu ya ntete ya Klisto, Mu ke fidisa nge na Nsangu mosi na yinza, samu na kuyidika Nkwizulu ya zole ya Klisto.” Mpe na yinza ya muvimba Yandi kwendaka, ntangu batiya ya reveil pelaka na bamvula kumi na tanu na zulu ya konso mongo. Kubeluka ya nzutu na bayinsi, mpe ngolo, mpe kuvutula.

226 Mpe ntangu yayi mu ke kwikila ti Yandi zola kuma na kisika yina ya nsuka, samu na kunata Lukwikilu yina ke nata Dibuuundu na Nkembo. Mpe Yandi me vwanda na kati ya Bansangu. Beto kele kieleka na ntangu ya nsuka. Beto me tubila yawu, mpe bima nionso, kasi kima yango me kuma na beto ntangu yayi. Yinga. Yinga, tata. Awa kele mosi. Ya kieleka.

227 Nsemo ya mbwaki, mutindu mu tubaka, ya ke sukisa dyambu. Yimeni. Nsemo ya mbwaki ke tuba na beno nani ke kwenda. Ata nionso yina muntu yankaka ke tuba, ya kele yina nsemo ya mbwaki ke tuba. Beno lendaka vwanda kieleka na kisaka-saka kana beno—kana beno me kipe ve nsemo ya mbwaki. Ya fwana vwanda na dikunzi mosi. Yinga, tata.

228 Kaka mutindu mosi na Dibuundu, ya fwana vwanda na dikunzi. Samu na bantu na kati ya Dibuundu, beno fwana vwanda na dikunzi ya beno.

229 Kasi, bubu yayi, konso dibuundu kele na dikunzi ya yawu mosi. Beno me mona? Mpe beno meka ve kubaka, “Beto ba-Baptiste ke kwikilaka *yayi*. Beto ba-Methodiste ke kwikilaka *yayi*. Beto ba-Presbytérien ke kwikilaka *yayi*. Beto ba-Pentecotiste ke kwikilaka *yayi*.” Yina nionso kele mbote, kasi samu na yinki beno ke baka ve yankaka ya Yawu? Yinki ke tambula mbote ve na yankaka ya Yawu?

230 “Beto ba-Baptiste ke kwikilaka na kukotisa na masa.” Ya kele mbote. Yinki beno ke tuba samu na mbotika ya Mpeve-Santu, ntangu yayi? Yinki beno ke tuba samu na kuzonza na bandinga? Yinki samu na makabu ya kubeluka ya nzutu? Yinki samu na profesi? “Oh, ve. Beto lenda ve. Ti, ya vwandaka samu na nsungi yankaka.” Oh, mwana!

231 Ba-Pentecotiste, beno ke tuba, “Mbote, beto ke kwikilaka na kuzonza bandinga ya malu-malu, samu na nzikisa.” Kieleka, kuzonza na bandinga ya malu-malu kele mbote mingi, kasi yina kele kaka ve nzikisa. Bantu mingi ke zonzaka na bandinga, ya kele kieleka, mpe ya kele ntama mutindu bawu ke kwenda ve. Diabulu lenda mekula konso dikabu yina, konso dikabu yina kele na kati ya Biblia.

232 Paul tubaka, “Ata ti mu zonza na bandinga ya bantu mpe ya Bawanzio, ata ti mu pesa nzutu ya munu samu ba kuyoka yawu mutindu munkayulu, ntangu mu ke tekisa bima ya munu nionso samu na kudisa bamputu, mpe ata ti mu kele na lukwikilu ya kukatula bamongo, ata ti mu kwendaka na seminere mpe longokaka luzabu nyonso yina kele, mu kele dyaka kima ve.”

233 Ya kele Muntu ya Klisto. Klisto, ke yamba Yandi, mpe beno lenda ve kuzwa Yandi kukondwa kuyamba Ndinga ya Yandi. Ndinga fwana kwisa ntete, na yina Luzingu ke kota na kati ya Ndinga yina mpe ke talisa Ndinga yina.

234 Yesu tubaka ve, “Kana Mu ke sala ve bisalu ya Tata ya Munu, na yina beno kwikila Munu ve”? Ya vwandaka Ndinga ya Nzambi me monisama. Nzambi vwandaka na kati ya Klisto, na kuvutulaka ngwisani, na kukitalisaka Yandi mosi na yinza, yina Yandi vwandaka. Yawu vwandaka—yawu vwandaka dikunzi. Yina vwandaka dikunzi ya Kukonda nsuka.

235 Ntangu yayi beno ke tuba, “Yina kele ya Kukonda nsuka, Mpangi Branham?” Ya vwandaka. “Na yina yinki samu na bubu yayi?”

236 Yesu tubaka, “Yandi yina ke kwikila na Munu, yandi mpe ke sala bisalu yayi Mu ke sala.” Yawu kele dikunzi ya mutindu mosi. Mbote mingi.

237 Mosi na mosi vwandaka na dikunzi ya yandi. Oh, la la! Ya kele kaka mutindu ya vwandaka na bilumbu ya bazuzi, “Muntu nyonso vwandaka sala yina vwandaka mbote na meso ya yandi.” Na bilumbu ya bazuzi, muntu nionso vwandaka na dikunzi ya yandi—ya yandi mosi. Yandi vwandaka sala kaka yina yandi vwandaka zola kusala. Mpe ya kele mutindu yina na ntangu yayi. “Muntu nyonso vwandaka sala kaka yina vwandaka mbote na ntwala ya yandi.” Ntangu yayi, beno zaba kikuma bawu salaka yawu na Bazuzi? Yayi lendaka sala mpasi fioti. Kasi kikuma bawu salaka yawu na Bazuzi, samu ti bawu vwandaka ve na profete na bilumbu ya bawu, samu na Ndinga ya Mfumu na yina ya zolaka kwiza. Na yina muntu nyonso lendaka sala yina yandi vwandaka zola, na ntwala ya yandi mosi.

238 Mpe ya kieleka yawu yina me salama bubu yayi. Beto kele ve na profete na bilumbu yayi ya ba-denomination, kasi Nzambi silaka beto mosi. Beno me mona? Beno me mona? Mpe Yandi salaka yawu. Na bilumbu ya nsuka, Yandi ke vumbuka mpe ke fidisa diaka Elie na kisalu, “Mpe yandi ke vutula bantima ya bana na Lukwikilu ya batata,” kuvutuka na pentecote ya kieleka. Beno zaba ti Yandi tubaka yawu.

239 Ntangu yayi, mu zaba ti beno ke lakisa, mutindu Yandi salaka kuna na Jean, kuna na—na Matthieu kapu 11, mpe nzila ya 6, mu banza ti yawu yina, ntangu bawu tubaka, “Nani Nge banza ti muntu yayi vwandaka, Jean yayi?”

240 Yandi tubaka, “Kana beno lenda kundima yawu, yayi kele yina ba zonzaka, “Tala, Mu ke fidisa munati-nsangu ya Munu na ntwala ya Munu.” Yina kele Malachie 3, Malachie 4 ve.

241 Kasi, beno bambuka moyo, kana yina vwandaka Malachie 4, na yina Ndinga me kubwa, samu Yandi tubaka, “Kasi kaka na ntangu yayi, yinza ya muvimba ke yokama tiya, mpe bantu ya mbote ke tambula na zulu ya mbombi ya bantu ya yimbi.” Ve. Beno vukisa yawu ve, mpangi-bakala. Beno sala ti Yawu kutuba kaka kieleka yina Yawu ke tuba. Ya kieleka. Yandi silaka yawu na kilumbu ya nsuka, mpe ya ke vwanda mutindu yina na kati-kati.

242 Beno bambuka moyo, ntangu bazuzi, muntu nionso vwandaka sala mutindu yandi me zola. Ya vwandaka ve na muntu mosi, ata muntu mosi ve lendaka zingisa Ndinga yayi. Ya vwandaka ve na profete. Ndinga ya Mfumu ke kwisaka ntangu nionso na profete. Kieleka. Mpe ba ke yinaka yandi ntangu nionso. Kaka mwa nkonga ya fioti ke zolaka yandi, beno me

mona. Kasi, mu zola tuba, ya ke vwandaka mutindu yina ntangu nionso.

²⁴³ Nzambi ke sobaka ve politiki ya Yandi, Yandi lenda sala yawu ve, mpe kuvwanda Nzambi. Kana Nzambi me tuba kima mosi to me sala kima mosi, Yandi fwana sala yawu na ntangu ke landa. Ntangu mpasi yina ke kwisa, kana Yandi ke sala ve mbala ya zole mutindu Yandi salaka mbala ya ntete, Yandi salaka yimbi na mbala ya ntete. Mpe nani ke fundisa Nzambi ti Yandi me sala yimbi? Nani beno kele, lenda tula disumu na Nzambi? Yawu yina Yesu tubaka, “Nani na kati ya beno lenda fundisa Munu na disumu?”

²⁴⁴ Yinki kele disumu? Kukondwa lukwikilu. “Yandi yina ke kwikila ve kele yimeni ya kufundisa.”

²⁴⁵ “Nani na kati ya beno lenda talisa Munu ti Mu me lungisaka ve bima nionso Mesiya lendaka sala?” Beno me mona? Muntu ve zonzaka dyambu. Yandi kuzwaka yawu. Mesiya vwandaka Profete, mpe Yandi siamisaka ti Yandi vwandaka yina. Ba vwandaka ve na profete kubanda bankama ya bamvula, kubanda Malachie, mpe na yina Yandi kotaka na kisalu. Yandi vwandaka muntu ya ngitukulu samu na bantu, mpe yina vwandaka ditadi ya disakuba samu na dibuundu ya bawu.

²⁴⁶ Samu, Yandi tubaka, “Tala, Mu ke tula na Sion, ditadi ya nsongi, Yina ya ntalu, yina ba mekaka, oh, ditadi ya disakuba.” Yinga. “Kasi yina nionso me kwikila na Yandi ke vwanda ve na nsoni.” Ya kieleka. Yandi vwandaka kuna. Mpe yina lungisaka kaka Masonuku. Kasi bayina kwikilaka na Yandi vwandaka na dikunzi.

²⁴⁷ Marthe ya fioti, ntangu yandi monaka Lazare me basika na ntoni, yandi zabaka Nani ya vwandaka. Ata mpe na ntwala Yina salama, yandi zabaka ti yandi vwandaka na dikunzi. “Mu ke kwikila ti Nge kele Mwana ya Nzambi, yina ke kwisa na yinza. Mpe ntangu yayi, ata ti mpangi ya munu ya bakala kele ya kufwa, tuba kaka ndinga. Nzambi ke sala yawu.” Amen. Yandi vwandaka kieleka ya kundima. Ya kele kieleka. Ntangu Yandi . . . Yandi tubaka yawu, mpe yandi zolaka tuba yawu na ntima ya yandi.

Yandi tubaka, “Wapi kisika beno me zika yandi?”

Yandi tubaka, “Kwisa mpe nge mona.”

²⁴⁸ Yandi telemaka kuna, na vision. Samu, Yandi tubaka, “Mu ke sala kima mosi ve tii kuna Tata ke lakisa Munu ntete,” Santu Jean 5:19.

²⁴⁹ Yandi fidisaka yandi ntama, na yinzo ya Lazare. Ba kwendaka kubokila Yandi, samu Yandi kwisa kusambila. Yandi zabaka ti Lazare zolaka kufwa. Mpe na manima ya mwa bantangu, Yandi tubaka, “Nkundi ya beto, Lazare, me lala.”

Bawu tubaka, “Yandi me sala mbote.”

250 Yandi tubaka, “Yandi me kufwa. Mpe samu na beno, Mu ke na kiese ti Mu vwandaka kuna ve.” Ba lombaka Yandi na kusambila samu na yandi.

251 Na yina Yandi kwisaka vutuka, tubaka, “Kasi Mu ke kwenda kuvumbula yandi.” Oh, la la! (Ve, “Mu ke kwenda mpe ke tala yina Mu lenda sala.”) “Mu ke kwenda kuvumbula yandi.” Samu na yinki? “Tata me lakisa Munu ntete yinki kusala.”

252 Yandi kulumukaka na ntoni. Bakala mosi vwandaka me telema kuna. Kuna vwandaka Nzambi kati ya nzutu, yina lendaka tuba na ditadi yina, “Nienia,” mpe ya zolaka kusulumuka. Kasi Yandi tubaka na bakento yina, mwa bakento yayi ya bamputu, mwa bakento ya bantwenia, Yandi tubaka, “Beno katula ditadi yayi.”

253 Beno fwana sala kima mosi, mpe. Beno me mona? Mpe bawu balulaka ditadi yango. Mpe ya pesaka bawu kimbevo; yandi vwandaka kuwa yimbi mingi.

254 Kuna, Yandi telamaka kuna. Oh, la la! Mu lenda mona Yandi kusungika mwa nzutu ya Yandi ya kulemba. Samu ti, Biblia ke tuba, “Yandi vwandaka ve na kitoko yina beto zolaka zola Yandi.” Yandi vwandaka kitoko mingi ve na kutala. Beno me mona?

255 Kaka mutindu mosi na David, ba soolaka yandi vwandaka ntinu ntangu yandi vwandaka kaka mwana-bakala ya tinta ya mbwaki. Beno me mona?

256 “Bantu yayi nionso ya nene,” tubaka, “yandi ke vwanda ve kitoko na yimpu ya kimfumu na zulu ya yintu ya yandi? Baka mwana yayi ya bakala,” Isai tubaka.

257 Samuel tubaka, “Nzambi mangaka yandi.” Yandi nataka bana ya yandi nionso kuna. Yandi tubaka, “Nge ke na yankaka ve?”

258 “Yinga, beto kele na mosi, kasi yandi ke monana ve mutindu ntinu. Na yina, yandi kele mwana-bakala ya fioti, na mapeka ya kulemba, na tinta ya mbwaki.”

“Kwenda, baka yandi.”

259 Mpe kaka na ntangu yandi kwisaka, yandi kumaka na ntwala ya profete yina, Mpeve kulumukaka na zulu ya yandi. Yandi kwendaka mbangu na mafuta yina, yandi tiamunaka yawu na yintu ya yandi, yandi tubaka, “Yayi kele ntinu ya beno.” Kaka yina. Yinga, tata.

260 Yesu telamaka kuna, na mapeka ya kulemba, mu banza, na bansuki ya mpembe ntangu Yandi vwandaka kaka na bamvula makumi tatu. Biblia ke tuba, “Ya lendaka monana ti Yandi vwandaka na bamvula makumi yiya.” Ba-Juif tubaka, “Nge kele ve Muntu na zulu—na zulu ya bamvula makumi tanu, mpe Nge ke tuba ti Nge ‘monaka Abraham?’”

Yandi tubaka, “Ntete Abraham kuvwanda, MU KELE.” Oh! Oh, la la! Santu Jean 6.

261 Na yina, beto ke mona ti, awa Yandi telemaka, pene-pene ya ntoni. Yandi zabaka ti vision yina zolaka kusiamisama. Yandi zabaka ti ya zolaka salama. “Beno katula ditadi.” Yandi kele. . .

262 Yandi vwandaka basika nsunga ya yimbi, ya kuvinga na bilele ya bamvumbi, ya kufwaka kubanda bilumbu yina. Mbombo ya yandi vwandaka ntete me niefwama, na mwa bantangu yayi.

263 Kuna, Yandi telamaka kuna, sungikaka mwa nzutu ya Yandi ya fioti. “Mu kele mvumbukulu, mpe Luzingu.” Hum! “Yandi yina ke kwikila na Munu, ata ti yandi me kufwa, kasi yandi ke zinga.” Beno tuba na munu muntu yina lenda zonza mutindu yina. “Yina nionso ke zinga mpe me kwikila na Munu ke kufwa ata fioti ve. Nge me kwikila yawu?”

264 Yandi tubaka, “Yinga, Mfumu.” Ata ti Yandi kondwaka yandi, na kutala. Ntangu yandi bokilaka, Yandi kwendaka ve. Yandi bokilaka diaka; Yandi kwendaka ve. Kasi yandi tubaka awa, “Mu zaba ti Nge kele Klisto yina ke kwisa na yinza.”

265 Yandi tubaka, “Lazare, basika.” Mpe muntu yina kufwaka kubanda bilumbu yiya. Samu na yinki? Yinki? Klisto me kuzwa dikunzi ya kieleka. Yandi monaka vision. Ya lendaka kukondwa ve. Ya kieleka. Ya lendaka kukondwa ve. Yandi vwandaka kieleka me ndima.

266 Mpe Marthe vwandaka ya kieleka me ndima. Kana yandi lendaka kunata Yandi na kundima ti Yandi vwandaka yina yandi vwandaka kwikila, yandi zolaka kuzwa yina yandi vwandaka lomba. Ya kieleka. Ba vwandaka kuna. Dikunzi, ya vwandaka ya kukangama na Ndinga, mpe ya vwandaka yina.

267 Muntu nionso bubu yayi kele na kusala, yina kele mbote, na ntwala ya yandi, samu profete kele ve. Beno tala na bilumbu ya bazuzi.

268 Beno tala na bilumbu yina Eli-. . .mu banza, yawu vwandaka Elie to Elisée, mosi na kati ya bawu zole. Yinga. Kisika vwandaka, bébé ya kufwa. Kento ya Sunamite, yandi salaka. . .

269 Elie vwandaka muntu ya Nzambi na ntangu yina, kaka mulongi ya mbote ve, ya mayele. Na yina, yandi vwandaka bakala ya kiboba yina vwandaka kwenda awa mpe kuna. Beno zolaka. . . Kana yandi zolaka kwisa, na kielo ya beno bubu yayi, beno zolaka kulosa yandi. Yinsi ya muvimba yinaka yandi. Jézabel mpe bantu yankaka nionso vwandaka yina yandi.

270 Samu, yandi vwandaka na Yinzo ya Mpembe mpe salaka ti bakento nionso kusala mutindu yandi vwandaka sala, mpe bawu nionso vwandaka baka mbandu ya yandi. Mpe Achab balukaka, yintu ya yandi vwandaka me baluka, na nsi ya luyalu

ya yandi. Beto kele ve ntama mingi na yawu bubu yayi. Kaka mutindu mosi, mpe beno me kuma kuna—kuna. Mpe bawu nionso vwandaka ya kuzabana. Mpe, oh, bawu nionso vwandaka ya kufuluka na yawu.

²⁷¹ Kasi mwa kento yina, ya Sunamite! Kento ya Sunamite ve, kasi mwa . . . Yinga. Mu banza ti yandi vwandaka Sunamite. Ntangu yandi kwisaka mpe monaka ngolo yina vwandaka na kati ya Elie, yandi tubaka, “Mu ke mona ti yandi kele muntu ya santu.” Mpe ntangu bébé yina vwandaka ya kufwa, yandi tubaka, “Kanga mpunda yina mpe kutelama ve.” Yandi mataka kuna. Yandi zabaka. Mpe mu ke zolaka yawu, mutindu yandi kwisaka. Yandi kwisaka na dikunzi ya yandi, dikunzi ya yandi ya kuyekama.

²⁷² Elie tubaka, “Awa kwisaka Sunamite yina. Yandi kele na kiadi. Kasi mu zaba ve yina ke tambula mbote ve.” Beno me mona? Nzambi ke talisaka ve nionso na bisadi ya Yandi; yina kaka Yandi zola ti bawu kuzaba. Na yina yandi tubaka, “Ntima ya yandi kele na kiadi, kasi mu zaba ve.” Yandi tubaka, “Kwenda mbangu, Guéhazi, samu na kuzaba, yina ke tambula mbote ve.”

²⁷³ Yandi tubaka, “Nionso ke tambula mbote na nge? Nionso ke tambula mbote na bakala ya nge? Nionso ke tambula mbote na mwana ya nge ya bakala?”

²⁷⁴ Beno tala yandi. Oh, la la! Yawu yina. Yandi tubaka, “Nionso ke tambula mbote.” Samu na yinki? Yandi kwisaka na dikunzi ya yandi. “Nionso ke tambula mbote.”

²⁷⁵ Mpe yandi fukamaka. Yandi kubwaka, ntete, na makulu ya yandi. Mpe Guéhazi telemisaka yandi, “Ya kele mbote ve,” na ntuala ya mulongi ya yandi—ya yandi. Yandi telemisaka yandi. Mpe yandi bandaka na kutuba na yandi.

²⁷⁶ Ntangu yayi, yandi vwandaka ve na dikunzi na ntangu yina. Yandi zabaka ti yandi vwandaka na ngolo, na nzila ya vision, samu na kupesa yandi mwana. Kasi ntangu yayi yinki yandi vwandaka sala? Yandi bakaka nkawa ya yandi mpe kotaka na kati ya kivinga, yandi kangaka bakielo nionso, basisaka bantu nionso. Yandi vwandaka baluka na kati ya kivinga. Yandi vwandaka na dikunzi, kana yandi lendaka kaka kukutana na Yawu. Yandi vwandaka tambula na kati ya kivinga! Oh, la la! Na mbala mosi yandi kuwaka Kima mosi bulaka yandi. Yandi lalaka na zulu ya bébé yango. Na manima yandi telemaka, mpe yandi kwendaka. Bébé ninganaka fioti, yandi yangumukaka. Yandi vumbukaka, bambala mingi. Yandi vwandaka ve na ngwisani ya mbote na dikunzi yina. “Yinki ya vwandaka, Mfumumu? Yinki Nge zola ti mu sala?”

²⁷⁷ Kukondwa ntembe, ntangu yandi balukaka, yandi monaka vision mosi, mwana-bakala yina ya fioti kimaka mbangu, vwandaka sakana, yandi vwandaka dumuka na nsinga, kima yankaka mutindu yina, yandi vwandaka sakana. Yandi

kukilosaka yandi mosi na zulu ya bébé. Yandi kangaka mbombo ya yandi na zulu ya mbombo ya yandi, bikoba ya yandi na zulu ya bikoba ya yandi, mpe ngolo ya Nzambi vumbulaka bébé na luzingu.

²⁷⁸ Yinki ya vwandaka? Dikunzi ya kento yayi vwandaka profete! Dikunzi ya profete vwandaka Nzambi! Mpe kintwadi, na Ndinga, “Mu kele mvumbukulu mpe Luzingu.” Mu ke mona ngolo ya Nzambi. Mvangi lenda sala nionso. Yandi me vumbuka diaka, bébé yango. Ya kieleka.

²⁷⁹ Samu na yina muntu nionso vwandaka sala mutindu ya yandi mosi, samu bawu vwandaka ve na profete samu ti Ndinga ya Mfumu kukwisa na yandi. Ndinga mpe baprofete vwandaka ve na ntangu yina.

²⁸⁰ Oh, mu monaka yayi ntangu mu balulaka ntima ya munu, samu na kilumbu yina beto ke na kuzinga. Mu ke na kiese mingi ti Nzambi simbaka munu na ntwala ya dibuundu. Mu zolaka vwanda kaka mumpani. Yinga, tata. Mu . . . Na mvwaka yayi nionso, mvindu, mpe bantu nionso ke tuba, “Mbote, kwisa kuna mpe kota na sika ya beto. Mpe kana nge sala yawu ve, mbote, nge lenda baka mukanda ya nge mpe kukwenda kota na yina yankaka.” Oh! “Nge zola ve kunata mukanda ya nge na kati ya kimpangi ya beto?”

²⁸¹ Mu banza ti ya kele na mukanda mosi, ya kele ntangu Klisto ke sonika nkumbu ya beno na Buku ya Luzingu ya Mwana-dimeme. Ya kele kaka na zulu ya yina.

²⁸² Ntangu mu ke tala ba-denomination yayi nionso! Beto kele ya dikanda ya ba-Irlandais, yina vwandaka Catholique ya ntama. Mpe mu monaka ti ya vwandaka ya kubeba mpe ya kupola. Mu kwendaka na dibuundu mosi ya denomination awa na kati ya mbanza, bawu tubaka, “Oh, beto kele nzila, Kieleka, Nsemo. Beto kele na nyonso ya Yawu.” Mu kwendaka na yankaka na New Albany, “Oh, la la! Bantu yina kuna ke zaba ve yinki bawu ke tuba.” Bantu ya Catholique tubaka, “Benoni nionso kele na kifu.”

Mu banzaka, “Oh, la la!”

²⁸³ Mu sakanaka na mwana-bakala mosi ya fioti ya Lutherien. Mpe mu banzaka . . . Allemand mosi ya fioti ya Lutherien. Mu kwendaka kuna, mpe mu tubaka, “Wapi dibuundu nge ke kwendaka?”

“Mu ke kwendaka na dibuundu *yina*.”

²⁸⁴ Mu kwendaka kuna, mpe mu monaka ti bawu tubaka ti bawu vwandaka nzila. Mu kwendaka kuna na Mpangi Dale, na dibuundu Emmanuel ya ba-Baptiste, mpe, to dibuundu ya Ntete ya ba-Baptiste. Bawu tubaka, “Yayi kele nzila.” Mu kwendaka na yinzo-Nzambi ya ba-Irlandais, yandi tubaka, “Mbote, *yayi* kele nzila.”

285 “Oh, la la! Mu vwandaka na kati ya mubulu mingi. Mu zabaka ve yinki kusala. Kasi mu zola kuvwanda ya kusungama.” Mu zabaka ve yinki kusala. Mpe mu vwanda zaba ve wapi mutindu kubalula ntima.

286 Mu sonikaka mukanda. Mu banzaka, “Mu monaka Yandi na kati ya mfinda.” Mu sonikilaka Yandi mukanda. Mu tubaka, “Tata ya luzolo, mu zaba ti Nge ke lutaka na nzila yayi awa, samu ti mu vwandaka awa samu na kuzomba bampadi. Mu zaba ti Nge ke lutaka awa. Mu zaba ti Nge kele awa. Mu zola Nge. Mu zola kutuba na Nge kima mosi.”

287 Mu banzaka, “Ntangu yayi vingila fioti. Mu—mu me monaka ntete ve muntu mosi. Mu me monaka ve. Mu zola tuba na Yandi. Mu—mu zola tuba na Yandi. Mu zola solula na Yandi.” Mu banzaka, “Mbote, ntangu yayi, mu zaba ve wapi mutindu ya kusala yawu.”

288 Mpe mu kwendaka kuna na kingenga mpe fukamaka, masa vwandaka kuna, ya vwandaka me pola na masa. Ya vwandaka kuna, na ditoma mosi, yina salaka kisumbula. Mu tubaka, “Mu banza ti mu me monaka foto, mu ke kwikila, bawu tulaka maboko ya bawu mutindu *yayi*.” Mpe mu fukamaka. Mpe mu tubaka, “Ntangu yayi yinki mu ke tuba?” Mu tubaka, “Ya kele na mutindu beno fwana sala yayi, mpe mu zaba ve. Mu zaba ti ya kele na mutindu ya kusala bima yayi nyonso. Mpe munu ve. . .” Mu tubaka, “Mu ke tula maboko ya munu mutindu *yayi*.”

289 Mu tubaka, “Tata ya luzolo, mu zola ti Nge kwisa tuba na munu, na mwa ntangu fioti. Mu ke zola kutuba na Nge wapi mutindu mu kele yimbi.” Mu telemisaka diboko ya munu mutindu *yayi*. Mu kuwaka.

290 Bantu ke tubaka, “Nzambi tubaka na munu.” Mpe mu zabaka ti Yandi vwandaka tuba, samu mu kuwaka Yandi ntangu mu vwandaka mwana ya fioti, kutuba na munu “kunwa malafu ve” mpe nionso yina.

291 Yandi pesaka munu mvutu ve. Mu tubaka, “Mu banza ti mu zolaka tula maboko ya munu mutindu *yayi*.”

292 Na yina mu tubaka, “Tata ya luzolo, mu zaba ve kieleka mutindu ya kusala yayi, kasi mu—mu ke na kivuvu ti Nge ke. . . Nge lenda sadisa munu?”

293 Mpe konso mulongi ke tuba na munu, mu kwisa kota na yina ya bawu, mpe na kutubaka ti bawu bakaka Yesu Klisto, mpe bawu “ke kwikila ti Yesu kele Mwana ya Nzambi.” Bampeve ya yimbi ke kwikilaka mutindu mosi.

Na yina mu banzaka, “Mu—mu fwana kuzwa kima ya kulutula yina.” Ve.

Mu vwandaka ya kuvwanda mutindu *yayi*.

294 Mu tangaka kisika Pierre na Jean lutaka na mwelo yina ba bokilaka Kitoko, mpe kuna vwandaka kikata, kubanda kivumu

ya mama ya yandi. Yandi tubaka, “Mbongo mpe wolo mu ke na yawu ve, kasi yina kele na munu. . .” Oh, mu zabaka ti mu vwandaka na yawu ve.

²⁹⁵ Na yina mu vwandaka meka na ku—kuzaba mutindu ya kusala yawu. Mu vwanda zaba ve mutindu ya kusambila. Mu bakaka maboko ya munu, na yina mu tulaka yawu mutindu *yayi*.

²⁹⁶ Mpe, ya kieleka, Satana kotaka na kusalu na ntangu yina, yandi tubaka, “Nge ke mona, nge vingilaka ntangu mingi. Nge me kuma dezia na bamvula makumi zole. Nsatu kele ve ya kumeka yawu ntangu *yayi*. Yinga.”

²⁹⁷ Na yina mu kotaka ya muvimba na kidi-kidi, mpe mu bandaka na kudila. Mpe na yina, ntangu mu kotaka kieleka na kidi-kidi, mu tubaka, “Mu ke tuba. Kana Nge tuba na munu ve, mu ke tuba na Nge, na mutindu nionso.” Na yina mu—mu tubaka, “Mu kele mbote ve. Mu ke na nsoni ya munu mosi. Tata Nzambi, mu zaba ti Nge ke kuwa munu, kisika mosi kuna. Nge ke kuwa munu. Mpe mu kele na nsoni ya munu mosi. Mu kele na nsoni ti mu mangaka Nge.”

²⁹⁸ Pene ya ntangu yina, mu talaka na zulu, mpe nsatu ya ngitukulu kwisaka na zulu ya munu. Awa kwizaka Nsemo mosi, ke tambula na kati ya kivinga, mpe salaka kulunsi, mutindu *yayi*. Mpe Ndinga mosi, yina mu me kuwaka ntete ve na luzingu ya munu, zonzaka. Mu talaka Yawu. Ya vwandaka kaka madidi, bisika nyonso, ya kukangama na boma. Mu lendaka ve kuningana. Mu telemaka, mu talaka Yawu. Yawu kwendaka.

²⁹⁹ Mu tubaka, “Tata, mu—mu ke bakula ve ndinga ya Nge.” Mu tubaka, “Kana Nge lenda tuba ve ndinga ya munu, mpe mu—mpe mu ke bakula ve ya Nge, mpe kana Nge fwana lemvokila munu. . . Mu zaba ti mu fwana vwanda kuna na kulunsi, kisika mosi kuna, ti masumu ya munu zolaka vwandaka kuna. Mpe—mpe kana Nge lemvokila munu, vutuka kaka mpe tuba na ndinga ya Nge Mosi. Mpe mu ke bakula yawu, kana Nge lenda ve kuzonza ndinga ya munu.” Mu tubaka, “Nge ke bika kaka Yawu kuvutuka, diaka.”

³⁰⁰ Yawu yina, diaka. Oh, kiadi! Kuna mu kuzwaka dikunzi mosi. Amen. Yinga, tata. Mu kuwaka mutindu kizitu ya ba-tonne makumi yiya me katuka na mapeka ya munu. Mu kwendaka kuna na nsi, sika wapi mu lendaka simba ve ntoto.

Mama tubaka, “Billy, nge ke na kidi-kidi.”

Mu tubaka, “Ve, mama, mu zaba ve yina me salama.”

³⁰¹ Ya vwandaka na nzila ya train pene-pene kuna. Mu landaka nzila yina ya train, na kudumukaka na zulu mingi, kaka na ngolo mu lendaka. Mu vwanda zaba ve mutindu ya kuzabisa bansatu ya munu. Oh, kana mu zolaka zaba mutindu ya kuboka! Mu vwandaka boka, kasi na mutindu ya munu mosi, beno me mona.

302 Yinki ya vwandaka? Mu kotisaka moyo ya munu na kiswamunu ya kupema. Yina me sukisa diambu. Yina vwandaka dikunzi. Kuna mu monaka kima mosi, mwa disolo ya luvunu ve, mwa mabanza ve. Mu tubaka na Muntu yayi. Mu tubaka na Muntu yayi tubaka na munu “kunwa malafu ata fioti ve, to kunwa makaya ata fioti ve, to kusala kima ya mvindu ve na bakento” munu mosi na bakento mpe nyonso yina. Ti, ntangu mu ke kula, ya ke vwanda na kusalu samu na munu kusala. Mu kutanaka na Yandi; kasi dibuundu ve. Mu kutanaka na Yandi, Yandi! Yinga, tata. Yandi vwandaka Mosi.

303 Mutindu muntu mosi kuna na Kiwanis to . . . vwandaka tuba, ve . . . kaka na manima ya Mvita ya Ntete ya Yinza ya muvimba. Mpangi Funk, yina kele kuna, kele soda. Yandi tubaka ti yandi vwandaka . . . Ya ke monana fioti, mwa nsaka. Yayi kele ve kisika ya nsaka, kasi beno tala yina yandi tubaka. Yandi vwandaka awa na New Albany.

304 Mpe yandi tubaka, “Capitaine basisaka beto, yandi tubaka, ‘Yinsi yayi ya muvimba me ziungama na ba-Japonais. Mbasi, bampangi, beto ke nwana. Beto fwana baka bawu.’ Yandi tubaka, ‘Benso bambuka moyo, bampangi, ya ke na mingi na kati ya beto me telama awa, bubu yayi, yina ke vwanda ve kuna mbasi. Ba ke vwanda ve awa mbasi. Beto ke nwana, mbasi, na suka-suka.’ Yandi tubaka, ‘Ntangu yayi mosi na mosi ke kukutana na nsambulu ya yandi.’” Bakala yayi tubaka, “Mpe mu vwandaka na nsambulu mosi ve.” Mpe yandi tubaka, “Mu tubaka . . .”

305 Yandi tubaka, “Mu telemaka kuna. Mpe bayankaka nionso . . .” Yandi tubaka, “Awa kwizaka aumonier mosi, mpe bawu kwendaka na lweka *yayi*; mpe ba-Protestant kwendaka na lweka *yayi*; mpe ba-Juif kwendaka na lweka *yayi*; mpe bantu ya Katolika kwendaka na lweka *yina*; na aumônier ya bawu.” Yandi tubaka, “Mu telemaka kuna.”

306 Mpe yandi tubaka, “Commandant tubaka na munu, yandi tubaka, ‘Bakala, nge fwana kutana na nsambulu ya nge.’”

Yandi tubaka, “Mu ke na yawu ve.”

307 Yandi tubaka, “Nge fwana vwanda na mosi, samu nge ke vwanda na nsatu ya mosi kuna. Mu ke ndima yawu.”

308 Mpe yandi tubaka, kaka na ntangu yina yandi monaka nkonga mosi kuluta, mpe ya vwandaka bantu ya Katolika. Yandi tubaka ti yandi belamaka mpe tubaka na nganga-Nzambi yayi, “Nge lenda pesa munu nsambulu mosi?”

Mpe yandi tubaka, “Kwisa.”

309 Yandi tubaka, “Yandi kwendaka kuna mpe salaka munu muntu ya Katolika.” Mpe kuna na New Albany, ya vwandaka na John Howard mpe nkonga mosi ya bantu ya Katolika ya kukwikama, beno zaba, ntangu mwana-bakala yayi vwandaka tuba mambu yayi.

³¹⁰ Mpe yandi tubaka—yandi tubaka, “Kilumbu ya kulanda na mvita . . .” Yandi vwandaka tubila yawu, oh, wapi mutindu ya vwandaka. Mpe yandi tubaka ti yandi vwandaka muntu mosi ya nene, beno zaba. Mpe yandi tubaka, “Ba me kuma kunwana nzutu na nzutu, mpe ba vwandaka bulana bambele, mpe ba vwandaka boka, mpe ba vwandaka zenga, ba vwandaka pasula.” Yandi tubaka, “Bandonga vukanaka. Bawu kumaka mosi na manima yankaka, mpe ba-Japonais bwisaka bawu mbala mosi kuna na kati, mutindu yayi. Mpe minduki yayi ya nene vwandaka bula, bisika nionso. Mvita mosi ya nzutu na nzutu!”

³¹¹ Yandi tubaka, “Na mbala mosi, mu telemaka, mutindu *yayi*.” Mpe tubaka, “Nionso, vwandaka boka bisika nionso, beno lendaka ve kuwakana beno mosi.” Yandi tubaka, “Ya vwandaka na menga.” Yandi tubaka, “Mu talaka, mpe ya vwandaka menga ya munu.” Yandi tubaka, “Mu talaka *awa*. Ya vwandaka na dibulu mosi na lweka ya munu.” Yandi tubaka, “Yina vwandaka menga ya munu.” Mpe yandi tubaka, “Munu, nge zaba, mu—mu—mu . . .”

Mpe nkundi ya kieleka . . . nkundi ya Katolika, mu ke tuba yayi ve samu—samu na kusala nkaka ntangu yayi, kasi muntu ya Katolika ya kukwikama tubaka—tubaka, “Nge me tuba *Mbote Maria*?”

³¹² Yandi tubaka, “Ve, tata.” Yandi tubaka, “Yina vwandaka menga ya munu. Mu zolaka ve kutuba na secrétaire. Mu tubaka, ‘Mu zola kuzonza na Muntu ya ngudi.’ Yina vwandaka—yina vwandaka menga ya munu.”

³¹³ Mu banza ti ya kele fioti mutindu yina. Yinga, tata. Ya kele mutindu yina. Beto fwana vwanda vwanda na dikunzi ya kuyekama, dikunzi mosi.

“Mu vwandaka na ntangu ve ya kusolula na secrétaire ya Yandi.” Yandi tubaka, “Mu zola solula na Yandi.”

³¹⁴ Mpe yawu yina, mpangi. Ntangu muntu ke kwisa na Klisto, beno zola ve kubaka ndinga ya mulongi mosi, mwa ndinga ya secrétaire, mwa kima mosi. Beno ba-Protestant, beno baka ve *yayi*, *yina*, to *yankaka*. Beno kwenda na dikunzi yina, tii kuna beno ke kota kuna na lubutuku ya Malu-malu, na kubutukaka mbala ya zole mpe kifuluka na Mpeve-Santu, mpe beno ke mona Biblia ke monisama na kukikulumusya mpe zola na kati ya luzingu ya beno. Oh, na yina, yina kele dikunzi ya beno. Yinga, tata.

³¹⁵ Mu tangaka na kati ya Ndinga kisika ba tubaka ti Yandi kele Ndinga. Na yina, dibuundu ya ba-Allemand tubaka ti ya kele mutindu *yayi*; mpe ba-Methodiste, mpe ba-Baptiste, mpe ba-Catholique. Kasi mu tangaka na Ndinga kisika Yandi tubaka, “Na zulu ya ditadi yayi Mu ke tunga Dibundu ya Munu, mpe bamwelo ya difelo ke nunga Yawu ve.”

Beno kuwa ntangu yayi, samu na kumanisa. Ntangu yayi ba-Protestant ke tubaka . . .

316 Ntangu yayi, muntu ya Katolika ke tuba, “Yandi tungaka Yawu na zulu ya Pierre, ‘Nge kele Pierre, mpe na zulu ya ditadi yayi . . .’” Ve, Yandi salaka yawu ata fioti ve. Kana ya vwandaka mutindu yina, yawu vutukaka kaka na manima. Bawu tungaka yawu na zulu ya muntu.

317 Yinki Yandi salaka? Ba-Protestant tubaka, “Yandi tungaka Yawu na zulu ya Yandi mosi.” Ve. Yandi salaka yawu ve. Yandi tungaka Yawu ve na zulu ya Yandi mosi.

318 Yinki Yandi salaka? Yinki? “Nani bantu ke tuba ti Munu, Mwana ya muntu, kele?”

“Mpe bayankaka ke tubaka ti Nge kele ‘Elie,’ mpe ‘Moïse.’”

Yandi tubaka, “Kasi yinki beno ke tuba?”

Pierre tubaka, “Nge kele Klisto, Mwana ya Nzambi ya moyo.”

319 Beno tala mbote bandinga yango ntangu yayi. “Nge kele ya kusakumuka, Simon, mwana ya Jonas. Nsuni na menga ve me monisa yawu na nge. Nge longukaka yawu ve na nzila ya nganga-Nzambi mosi. Nge longokaka yawu ve na seminere. Kasi Tata ya Munu yina kele na Mazulu me monisa Yawu na nge. Mpe na zulu ya ditadi yayi,” luzayikisu ya kimpeve ya Ndinga, “Mu ke tunga Dibuundu ya Munu, mpe bamwelo ya difelo lenda ve kununga Yawu.”

Mu banzaka, “Mfumu, yawu yina.”

320 Mu me tanga awa na Buku ya Apocalypse, kapu ya 21 . . . kapu ya 22, kisika Yandi tubaka, “Muntu nyonso yina . . .” Yayi kele Kima ya muvimba. “Yina nionso ke kotisa kima mosi na Yawu; muntu nionso yina ke katula Yawu, ke manga ti Ya kele mutindu yina; to muntu nionso yina ke meka kusoba Yawu fioti kulutula mbote, kuyidika Yawu samu na nsungi. Yina nionso ke bwela to ke katula, ba ke katula yandi, kitini ya yandi, na Buku ya Luzingu.”

321 Mu tubaka, “Na yina, yawu yina kaka mu kele na yawu nsatu, Mfumu, ya kele kukwikila Yayi.” Mpe na kati ya Yayi, kulunsi yina kuna, Klisto kwisaka. Ya kele ya kulunga, bisika nionso, Ndinga nionso yina Yandi tubaka. Beno baka Buku na diboko *yayi*, disolo na diboko *yayi*, mpe ya ke siamisama kaka na mbala mosi, ya kele ya kulunga. Mpe mu tubaka, “Na yina, Mfumu, yamba munu.” Mpe ntangu mu salaka yawu, mu yambaka Klisto, Mpeve-Santu na kati ya ntima ya munu, dikunzi ya munu. Ya vwandaka ve munu.

322 Mu vwandaka mbevo kilumbu mosi, ntangu kento ya munu . . . mu zimbisaka kento ya munu. Bébé ya munu kufwaka. Oh, tata ya munu kufwaka, mpe mpangi ya munu ya bakala kufwaka, mpe semeki ya munu ya kento kufwaka. Mpe Billy

vwandaka ya kulala, yandi vwandaka kufwa, mpe—mpe mu vwandaka pene ya kufwa. Mu vwandaka mata na nzila, na kudilaka, mu vwandaka kwenda na ntoni ya yandi; mpe yandi mpe bébé, mpe bébé na maboko ya yandi. Mu vwandaka kwenda na ntoni. Mu vwandaka kwenda. Tata Isler vwandaka kwisa awa mpe kubula, beno zaba, Sénateur ya kizungu ya Indiana. Yandi vwandaka mata na nzila. Yandi telemisaka munu. Yandi kwendaka mbangu kuna, yandi tulaka maboko ya yandi pene-pene ya munu. Yawu vwandaka na manima ya kufuluka ya masa ya mvula 1937. Yandi tubaka, “Wapi nge ke kwenda, Billy? Kuna na zulu?”

Mpe mu tubaka, “Yinga.”

Yandi tubaka, “Yinki nge ke kwenda sala kuna na zulu?”

323 Mu tubaka, “Mu ke kuwa yembe mosi ya ntama.” Mu tubaka, “Mu ke vwanaka kuna pene-pene ya ntoni ya bébé mpe ya yandi. Yembe mosi ya ntama ke kulumuka kuna, mpe yandi ke tuba na munu.”

“Oh,” yandi tubaka, “Billy!”

324 Mu tubaka, “Yinga. Mpe mu ke kuwa makelele ya matiti ntangu ya ke bula yawu. Ya ke bula muziki samu na munu, Tata Isler.”

Yandi tubaka, “Wapi mutindu ya muziki ya ke bula?” yandi tubaka.

Ya kele na Yinsi kuna na simu ya nzadi,
Yina ba ke bokilaka simu ya lembami,
Mpe beto ke kuma kaka na kumu yina na
lukwikilu;
Mosi na mosi beto ke kuma na mwelo,
Samu na kuzingira kuna na bantu yina ke
kufwaka ve,
Ntangu kilumbu mosi ba ke bula bangunga ya
wolo samu na beno mpe munu.

325 Yandi tubaka, “Billy, mu zola yufula nge kima mosi.” Yandi tubaka, “Yinki Klisto zola kutuba samu na nge ntangu yayi? Yinki Klisto zola tuba samu na nge ntangu yayi?”

326 Mu tubaka, “Yandi kele Luzingu ya munu, nionso ya munu. Yandi kele yina nionso mu ke na yawu, Tata Isler. Yandi kele kisika ya munu—ya munu ya Ngudi. Ya kele kaka na Yandi mu fwana kangama.” Samu na yinki? Kima mosi salamaka, “Na zulu ya ditadi yayi!”

327 Yandi tubaka, “Mu monaka nge ya kutelama awa na nsongi ya nzila mpe kulonga, tii kuna nge ke kuma mutindu ti nge ke kubwa na lufwa. Mu monaka nge, na bangunga nionso ya mpimpa, na kutambulaka na bala-bala, samu na kukwenda kutala bambevo. Mpe na manima Yandi me baka kento ya nge, mpe bébé ya nge, nge ke sadila Yandi kaka?”

328 Mu tubaka, “Kana Yandi kufwa munu, kasi mu ke tula kaka kivuvu na Yandi.” Samu na yinki? Kizundu ya munu kele ya kusimba mbote na kati ya vwale. Mu vwandaka na Dikunzi. Mu vwandaka ya kukangama na Ndinga ya Yandi, mpe Ndinga ya Yandi vwandaka simba. Yandi kele Dikunzi ya munu. Mu me mona ti bima yayi nionso yankaka lenda kubwa, kasi Klisto lenda kubwa ata fioti ve.

329 Dibuundu ya Katolika kele na pape mutindu dikunzi. Ba-Protestant kele na ba-évêque ya bawu, mpe ba-credo ya bawu, mpe ba-surveillant général ya bawu.

330 Kasi, munu, mutindu Paul. . . Beno kele na kilapi ya beno? Beno sonika kima mosi. Na. . . Paul tubaka, na ba-Actes kapu ya 20 mpe nzila ya 24, “Ata mosi ve ya bima yayi ke ningisa munu.” Oh, beno lenda vwanda na ba-credo, beno lenda vwanda na yina nionso beno me zola, kasi bima yayi ke ningisa munu ve.

Mu me kangisa moyo ya munu na kiswamunu
ya kupema,
Samu na kutambula na bamubu ya kudasuka
(mu zaba ve kisika beno kele, na lweka *yayi*,
na lweka *yina*) diaka ve;
Mupepe ya ngolo lenda bula na zulu ya mubu,
kitembo ya ngolo,

Na zulu mpe na nsi.

Kasi na Yesu mu kele ntangu nyonso na
lukengolo.

331 Yinga. Ata mosi na kati ya bima yayi ke ningisa munu, samu ti mu kele ya kukangama na kizundu. “Oh, kubanda mu kutanaka na Yandi,” Paul tubaka, “na nzila yina, mu vwandaka ya kukangama na kizundu. Yandi salaka ti mu baluka. Yandi me sala ti mu banda mbote-mbote.” Beno bambuka moyo, Paul vwandaka na organisation diaka, ya kulutula nene na yinsi, kasi yandi kangamaka na dikunzi.

332 Beno kuwa. Mu ke zola kutuba na beno kima mosi. Yandi vwandaka na dikani na kuvulusaka munu. Yandi vwandaka na dikani na kuvulusaka beno. Mpe mu me baka lukanu, na luzolo ya Yandi, na kusala yawu; ve samu na kubwela na Yawu, to kukatula na Yawu. Apocalypse 22:19, kana beno zola kusonika yawu. Mbote mingi. “Yina nionso ke katula. . .” Mu me baka lukanu. Mu ke zola kubika dibuundu, mpe beno zaba yawu. Mpe na yina mu me baka kaka lukanu samu na kuvwanda na Nsangu ya mbote yayi ntangu nionso mu ke zinga, na lusalusu ya Nzambi. Huh! Beno bambuka moyo, yayi kele lemvo. Ya vwandaka na mafuku yina vwandaka kufwa na disumu ntangu Yandi vulusaka munu. Nani mu vwandaka samu Yandi vulusa munu? Yandi vwandaka na dikani mosi, samu na kuvulusa munu, mpe mu me baka lukanu samu na kulungisa dikani yina. Mu ke kipe ve. Ya lendaka vwanda nsuka ya munu, ntangu

yankaka, ntama mingi ve ntangu yayi. Kasi, nionso yina ya kele, mu me kangama kaka. Mu me sobaka yawu ata fioti ve.

333 Tata Isler tubaka na munu kilumbu yina, ntangu mu vwandaka tambula na nzila, yandi tubaka, “Billy, na kati ya mpasi yayi nionso, nge ke keba nsambulu ya nge?”

334 Mu tubaka, “Ve, tata. Yawu kebaka munu.” Um-hum. Kizundu ya munu simbaka. Ya kieleka. Mu kebaka Yawu ata fioti ve. Yawu kebaka munu. Mu lenda ve kukeba Yawu. Ya kele ve na mutindu samu na munu na kusala yawu. Kasi Yawu ke kebaka munu. Yinga, tata.

335 Yandi vwandaka na dikani mosi samu na kuvulusa munu. Ya vwandaka na mafuku na kati ya disumu ntangu mu kwisaka na Yandi, kasi Yandi vulusaka munu. Yandi vwandaka na dikani mosi samu na kusala yawu.

336 Lufwa ya Klisto vwandaka dikunzi, samu na boma yina ya vwandaka pesa. Lufwa ya Klisto sukisaka diambu, ntangu nyosi yina ya lufwa tsokotaka Yandi mpe me kotisaka ntunga yina. Beno zaba, nyosi, nzinzi yina kele na ntunga, kana ya me kotisa ve ntunga yina, na mudindu mingi, ntangu ya ke zimbisa yawu, ntangu ya ke benda ntunga ya yandi. Lufwa vwandaka ntangu nionso na ntunga. Lufwa vwandaka ntangu nionso na ntunga.

337 Mpe kilumbu mosi, ntangu yina kwendaka na Calvaire, mpe kuningana yina na zulu ya matadi yayi, kutiamuka ya Menga na zulu ya matadi, ntangu yawu simbaka masa na zulu ya Calvaire, na kukwendaka na Golgotha, mukongo ya kulunsi yina, vwandaka timuna bitambi ya Menga na mwa nzutu yina, ya kulemba, na kukwendaka kuna. Ntangu ba vwandaka bula Yandi fimpu mpe kulwadisa Yandi, ntangu Yandi vwandaka mata na zulu ya mongo, kasi Yandi vwandaka na dikunzi. Yandi zabaka kisika Yandi telemaka, samu Ndinga ya Nzambi tubaka, na nzila ya David, “Mu ke bika ve Muntu ya Munu ya santu kumona kupola, to dyaka Mu ke bika ve moyo ya Yandi na difelo.”

338 Yandi zabaka ti kupola ke kotaka, na bangunga makumi sambwadi na zole. Yandi tubaka, “Beno bebisa tempelo yayi, mpe Mu ke vumbula yawu diaka na bilumbu tatu.” Yandi vwandaka na dikunzi.

339 Yandi yina ke kwenda, na zulu ya mongo, na mata ya masawula, ya basoda yina me lawuka malafu yina vwandaka losa yawu na kizizi ya Yandi, mpe bulaka Yandi na yintu, na kutubaka, “Nge kele profete? Tuba na beto nani me bula Nge.” Yandi vwandaka kuna, vwandaka mata mongo, na mawa mpe nsoni. Samu na . . . Kukatulula Yandi bilele ya Yandi, na kulwataka nsoni, ba komaka Yandi na zulu ya kulunsi na ntwala ya bantu, kinkonga. Kufwa na nsoni ya Rome, na nsi ya luyalu, kitumbu ya lufwa, Muntu yina salaka kima mosi ve.

³⁴⁰ Mwa disolo mosi ke tuba na ntangu mosi, ba tubaka, Marie Madeleine basikaka mbangu mpe tubaka, “Yinki Yandi me sala? Yandi me belula bambevo ya beno, me vumbula na lufwa bamvumbi, mpe me nata luvukulu na bantu yina vwandaka, na kimpika. Yinki Yandi me sala?”

³⁴¹ Mpe nganga-Nzambi mosi bulaka yandi mbata na yinwa, ti menga basikaka, mpe tubaka, “Beno ke kuwa yandi to nganga-Nzambi ya beno ya mbuta?”

³⁴² Oh, yinza yina ya denomination, ya kele nsingulu samu na nionso yina. Yawu yina.

³⁴³ Kuna, yinga, bawu nataka Yandi. Kasi mutindu Yandi vwandaka mata na zulu ya mongo, na kubendaka yandi, diabulu vwandaka tula ntembe na yawu ntangu nionso, ti Yandi vwandaka yina Yandi vwandaka. Yandi tubaka, “Kana Nge kele Mwana ya Nzambi, kitula matadi yayi na mampa. Nge ke tubaka ti Nge lenda sala bimangu. Kana Nge kele Mwana ya Nzambi, tuma na matadi yayi na kukituka mampa.”

³⁴⁴ Mpeve ya yimbi yina ya ntama ke zinga bubu yayi. Ya kieleka. “Kana nge kele munganga ya Kinzambi! Tala kiboba yayi ya Jean *Kingandi* ya kuvwanda awa na nsongi. Mu zaba ti yandi kele kikata. Belusa yandi.” Beno zaba ve ti ya kele mpeve ya yimbi yina ya ntama?

Yesu tubaka, “Mu ke sala kaka . . .”

³⁴⁵ Beno tala, Yandi lutaka na kiziba ya Bethesda, kisika mafunda vwandaka kuna, bikata, bampofo, bankonzo, mpe bantu ya bifuma, mpe kwendaka na muntu yina lendaka tambula. Yandi lendaka tambula. Ya lendaka vwanda ti yandi vwandaka na kimbevo ya prostate. Nionso yina ya vwandaka, yawu lutaka bamvula mingi. Yandi vwandaka na yawu kubanda bamvula makumi tatu na nana. Yandi tubaka, “Ntangu mu ke kuma na kiziba, muntu mosi ke kulumuka na ntwala ya munu.” Yandi lendaka tambula.

³⁴⁶ Yandi bikaka bawu nionso ya kulala kuna, mpe kwendaka na yandi yina mpe belusaka yandi. Samu na yinki? Yandi tubaka ti Yandi zabaka ti yandi vwandaka mutindu yina. Kuna bawu tubaka na Yandi, yufulaka Yandi, ntangu bawu monaka Yandi. Santu Jean 5, Yandi tubaka, “Kieleka, kieleka, Mu ke tuba na beno, Mwana lenda sala kima mosi ve na Yandi mosi, kasi yina Yandi ke mona Tata ke sala.” Yawu yina dikunzi ya Yandi. Ya kele ntangu nionso dikunzi.

³⁴⁷ Mu vwandaka kuna na Finlande kilumbu yina, mpe mwana-bakala yina ya fioti vwandaka me tandama kuna, mpe mu vwandaka tambula na pene-pene ya yandi, yandi vwandaka me tandama kuna, ya kufwa, yandi kufwaka kubanda kati-kati ya ngunga. Beno tangaka yawu na buku. Mu bandaka na kukwenda ntama, Muntu mosi tulaka maboko ya yandi na zulu ya yandi. Mu

balukaka, mu banzaka, “Yinki ya vwandaka?” Mu talaka diaka. Mu banzaka, “Vingila fioti.”

³⁴⁸ Mu talaka kuna na dititi ya ntete ya Biblia. “Mpe ya ke salama ti, mwana mosi ya fioti ya bakala pene ya bamvula yivwa, ba ke kufwa yandi na tomabilu. Ya ke vwandaka na kinkuku ya ba-cornifère, ya kupanzama na matadi kuna. Ditoma ke vwanda na lweka ya nzila, ya kubeba. Yandi ke lwata mwa basoseti, mutindu yayi, ya kumatisa; na bansuki ya nkufi ya kuzenga. Mwa meso ya yandi ke vwanda ya kubaluka na manima. Mikwa ya nzutu ya yandi ke vwanda ya kubukana.”

Mu talaka. Mu banzaka, “O Nzambi!”

³⁴⁹ Mu tubaka, “Benso vwanda swi, beno nionso.” Mfumu ya mbanza vwandaka kuna. Mu tubaka, “Kana mwana-bakala yayi me telama ve na minuti zole, mu kele profete ya luvunu; beno basisa munu, na nganda ya Finlande.” Ya kieleka. “Kasi kana yandi telama, beno fwana pesa baluzingu ya beno na Klisto.” Ya kieleka. Bawu vwandaka swi.

³⁵⁰ Mu tubaka, “Tata ya Mazulu, kuna na simu ya mubu, bamvula zole me luta, Nge tubaka ti mwana yayi ya fioti ya bakala ke vwanda ya kulala awa.”

³⁵¹ Ya vwandaka na Mpangi Moore mpe Mpangi Lindsay, bawu vwanda tala yawu. Mpe, bisika nyonso, bawu sonikaka yawu na kati ya Biblia. Mpe bamafunda ya ba-Biblia na kati ya yinsi ba sonikaka yawu. Yinki ya vwandaka? Dikunzi. Tata talisaka yina zolaka salama. Ya vwandaka na boma ve, ata fioti, ya kutelama kuna. Ya kieleka, na mutindu nionso, yandi ke vumbuka.

³⁵² Kaka kuna na Finlande, kisika mafunda ya bantu vwandaka kwisa konso nkokila, mpe ya vwandaka lomba kaka kubasisa bawu mpe kuvwanda, kubasisa bawu na nganda mpe kukotisa muntu yankaka. Yandi telemaka kuna, na nionso yina. Bantu vwandaka zola munu, mpe bawu monaka bakubeluka ya nzutu me salama, kasi awa vwandaka mwana-bakala me tandama kuna, yandi kufwaka. Yinki vwandaka dikunzi? Vision. “Mu ke sala yina Tata me tuba na kusala. Yandi yina ke kwikila na Munu, yandi mpe ke sala bisalu yayi Mu ke sala.” Yawu yina dikunzi ya beno.

³⁵³ Mu tubaka, “Lufwa, nge lenda dyaka ve kukanga yandi. Nzambi me zonga. Vutuka. Bika yandi.” Mpe mwana-bakala yina ya fioti vumbukaka, yandi talaka pene-pene ya yandi mutindu yayi. Bantu bandaka na kukangama pema, mpe nionso yina. Yawu yina, ba me sonika kuna, mpe ba me sinié yawu na mfumu ya mbanza, to, na notaire. Ya kieleka.

³⁵⁴ Yinki ya kele? Dikunzi, Yesu Klisto kele mutindu mosi mazono, bubu yayi, mpe kukonda nsuka. Kana yina kele ve Nzambi mosi yina telemisaka kento ya Nain, na bayina vwandaka nata mwana ya yandi. Ntangu muntu vwandaka kufwa na bilumbu yina, ba kotisaka ba vwandaka mbala mosi

kukotisa bawu na ntoni. Ba vwandaka ve kubika bawu kuna. Ba vwandaka tula bawu na ntoni. Ya kele Yesu Klisto mosi yina, mazono, bubu yayi, mpe kukonda nsuka. Yinga.

³⁵⁵ Beno tala na yisi kuna na Mexique, mpe mwa bébé yina. Bayankaka na kati ya beno vwandaka awa, ya kuvwanda awa. Mpe bébé yina, dokotolo sonikaka nsamunu mosi, ba sonikaka yawu na Bantu ya Mumbongo ya Baklisto. “Bébé yina kufwaka na suka yina na ngunga ya yivwa, mpe yayi vwandaka ngunga ya kumi na nkokila yina.”

³⁵⁶ Mwa kento yina zolaka ve ba pesa yandi kivuvu. Billy vwandaka me telama kuna, mwana ya munu ya bakala, vwanda meka na kukanga yandi. Mpe yandi vwandaka, kuna, mu banza ba vwandaka na mafunda zole ya mikengi ya kutelama kuna, mpe yandi lutaka na zulu ya bawu. Nkokila yina landaka, bakala yina ya mpofo kuzwaka kumona ya yandi, mpe yandi zabaka yawu. Yandi vwandaka muntu ya Katolika.

³⁵⁷ Na ntangu, na nsuka, mu tubaka, “Kwenda, Mpangi Moore, mpe sambila samu na yandi. Samu, bébé yina . . .”

³⁵⁸ Mvula vwandaka noka, mingi. Yandi vwandaka ya kutelama kuna kubanda na suka-suka yina, na kivinga yina ya nene. Mpe mu tubaka . . . Ba vwandaka kulumusa munu na bansinga, kuna na manima, samu na kukotisa munu. Mu vwandaka kaka kuna na bankokila tatu.

³⁵⁹ Mu telemaka kuna. Mu tubaka, “Mutindu mu vwandaka tuba . . .” na kulongaka. Mpe mu talaka, mu monaka mwa bébé mosi awa na ntuala ya munu, mwa bébé mosi ya Mexicain, ya kukondwa meno, yina me vwanda kuna ke seka munu, kaka awa na ntuala ya munu.

³⁶⁰ Mu tubaka, “Vingila fioti, Mpangi Moore. Nata yandi awa.” Oh, dikunzi mosi!

³⁶¹ Mikengi vutukaka na manima. Yandi yayi me kwisa. Yandi fukamaka mpe tubaka, “Padre, Padre.”

Mu tubaka, “Telema.”

³⁶² Mpe Mpangi Espinoza tubaka, “Telema,” mpe yandi tubaka na yandi na Espagnole. Yandi telemaka kuna.

Mu tubaka, “Tata ya Mazulu, mu me telama awa na kati ya mvula yayi.”

³⁶³ Ya vwandaka, mwa kento mosi ya kitoko ya bamvula pene ya makumi zole na tatu, kima mosi mutindu yina, bansuki ya yandi vwandaka ke diembela. Mwa kizizi ya yandi vwandaka tala mutindu *yayi*, kutala ya meso ya yandi, vwandaka talisa ti yandi vwandaka vingila. Yandi monaka bakala yina vwandaka ya muvimba mpofo kubanda bamvula pene ya makumi yiya, meso ya yandi zibukaka na estrade. Yandi zabaka ti kana Nzambi lendaka zibula meso ya kufwa, Yandi lendaka belusa bébé ya yandi. Yandi vwandaka kuna, mwa nzutu ya yandi ya kulemba ya

kuinga na nsi ya bulanketi mutindu yayi, mpe yawu vwandaka ya muvimba ya kupola na masa. Yandi vwandaka ya kutelama kuna na suka ya muvimba, mpe na manima ya midi yina, diaka. Ya vwandaka, pene ya ngunga ya kumi na mosi, ngunga ya kumi na nkokila, kima mosi mutindu yina, yandi vwandaka me simba bébé yayi na ntwala ya yandi. Beno monaka mukanda yango na zulunale ya Bantu ya Mumbongo ya Baklisto. Yandi vwandaka me simba bébé yina, mutindu yayi.

³⁶⁴ Mu tubaka, “Tata ya Mazulu, mu zaba ve yina yayi zola kutuba. Mu kele kaka kisadi ya Nge. Kasi mu monaka bébé yina ya kutelama kuna. Ya vwandaka na moyo. Mu ke tentika maboko ya munu na zulu ya yandi, na Nkumbu ya Mfumu Yesu.”

Yandi tubaka, “Waa!” mpe yandi bandaka na kudila.

³⁶⁵ Mama yango simbaka bébé mpe yandi bandaka na kuboka. Mpe bantu bandaka na kuboka kuna, mpe bakento vwandaka kangama pema mpe nionso yina. Mu tubaka, “Beno tuba kima mosi ve samu na yawu. Beno fidisa muntu ya mbangu na bébé yayi, na mama yayi, mpe beno kwenda na dokotolo, mpe yandi kusinié nsamunu, ti, ‘Bébé yayi kufwaka. Yandi kufwaka na pneumonie, na suka yina na ntwala ya yawu, mpe, to na suka yina na ngunga ya yivwa.’”

³⁶⁶ Mpe beto me kuzwa nsamunu yina dokotolo me sinié, “Ba zabisaka bébé yango ‘kufwaka,’” na bureau ya dokotolo na suka yina, mpe mama vwandaka nata yandi kuna na kilumbu ya muvimba.

³⁶⁷ Yinki ya vwandaka? Dikunzi. Yinki ya vwandaka? Yandi kwikilaka, kana Nzambi lendaka zibula meso ya mpofo, (yinki?) Nzambi lendaka vumbula bantu ya kufwa, samu ti Yandi kele mutindu mosi mazono, bubu yayi, mpe kukonda nsuka.

³⁶⁸ Mu vwandaka ndima ve. Mu vwandaka zaba ve tii kuna mu monaka. Mpe ntangu mu monaka bébé yango, ya vwandaka dikunzi, ya kieleka na nionso. Yawu vwandaka kuna. Lufwa fwana pesa mvumbi ya yandi.

³⁶⁹ Kuna vwandaka Mwana ya Nzambi. Nyosi yina ya lufwa bandaka na kuniunguta pene-pene ya Yandi. “Ah, wapi mutindu Yandi lendaka vwanda profete? Wapi mutindu Yandi lendaka telama kuna mpe ba losa mate na kizizi ya Yandi? Wapi mutindu Yandi lendaka telama kuna, kubika ba seka Yandi, mpe kukondwa kusala kima mosi samu na yawu? Ya kele ve Emmanuel. Ya kele kaka muntu mutindu bantu nionso. Beno tala mate yina me katuka na basoda yina me lawuka malafu. Beno tala kizizi ya Yandi ke basika menga.”

³⁷⁰ Dyabulu tubaka, “Mu ke kuzwa Yandi. Mu ke kuzwa Yandi.” Awa yandi kwizaka, mutindu nyosi, ntunga ya lufwa, ke niunguta pene-pene ya Yandi. Kasi, mpangi-bakala, ntangu nyosi kotisaka ntunga ya yawu na Emmanuel yayi, ntangu yandi

basikaka yawu, yandi zimbisaka ntunga ya yandi, ata mpe lufwa yawu mosi.

³⁷¹ Kuyituka ve ti Paul, na ntwala, lendaka tala yawu na kizizi, kutuba, “O lufwa, wapi ntunga ya nge? Ntoni, wapi lunungu ya nge? Matondo na Nzambi, Yina pesaka beto lunungu!” Lufwa ya Klisto vwandaka dikunzi samu na muntu nionso yina vwandaka na boma ya yawu.

³⁷² Ntima ya munu me tuba “amen” na konso Ndinga yina kele na kati ya Buku ya Yandi. Mu ke sukisa, na kivuvu mingi ntangu yayi. Mu fwana fiotuna yawu kaka. Beno me mona?

³⁷³ Ya kele samu na yina mu zaba ti Mpeve-Santu kele boussole yina ke twadisaka munu. Yandi kele Mosi yina ke salaka ti mu zaba Ndinga yayi kele kieleka. Yandi kele dikunzi ya munu. Yandi kele Munzenzi ya munu. Yandi kele Luzingu ya munu. Yandi kele kizundu ya munu. Ntangu bampasi ke kwisa, Yandi kele Mbwetete ya munu ya nord. Ntangu mu me zimbana, Mpeve-Santu kele boussole yina ke vutulaka munu na kisika ya mbote.

³⁷⁴ Ba-denomination kele mutindu bambwetete yankaka, bawu ke na tambulaka na ntoto. Bambwetete yankaka ke tambulaka mutindu ntoto ke tambulaka, kasi mbwetete ya nord ve. Ntoto lenda tambula kisika yina yawu zola, kasi yawu ke bikala kisika mosi. Oh, mpangi, Mbwetete ya nord kele ya kukangama. Bayankaka ke tambulaka, beno lenda mona bawu *awa* mpe *kuna*, mpe bisika nionso yankaka. Ya kele mutindu mosi na mabuundu ya ba-denomination.

³⁷⁵ Kasi Klisto kele dikunzi. Yandi kele Yina beno lenda tudila kivuvu. Ntangu ba-denomination me nata beno na kidi-kidi, beno tala kaka na Mbwetete ya nord. Mpeve-Santu kele boussole. Yandi ke bikana kieleka na Ndinga ya Yandi.

³⁷⁶ Ntangu ba tubaka na munu ti bima yina lendaka salama ve na bilumbu yayi, mu zabaka. Kana—kana—kana Nzambi vwandaka ve, na yina beno zinga, beno kudia, beno kunwa, mpe beno sepela. Kana Nzambi kele, beto sadila Yandi. Mpe mu zingaka samu na kumona kilumbu yina Yandi salaka mambu nionso, ata mpe kuvumbula bantu ya kufwa, ntangu Yandi vwandaka awa na zulu ya ntoto. Mpe beto zaba ti na nzila ya bansamunu ya kieleka, ti yawu kele kieleka. Yinga, tata.

³⁷⁷ Yandi kele dikunzi ya munu. Ntangu yayi beno sala Yandi Dikunzi ya beno. Beno baka . . . Bantangu ya munu ya mpasi, Yandi ke vwandaka ntangu nionso dikunzi. Ntangu yayi beno tala. Na lemvo ya Nzambi . . .

³⁷⁸ Ntangu yayi mu ke na kumanisaka. Ntangu me luta. Mbote, beno tala awa, mu banzaka ti ya vwandaka ngunga kumi na mosi, mpe ya kele ngunga ya kumi na zole na ndambu.

379 Bankundi, konso kilumbu, mpimpa nyonso, mvula nyonso, na kati ya Seko, lendaka ata fioti ve kulunga samu na kuzonzila Yawu. Beno meka ve na kutendula Yawu. Beno lenda ve. Ya kele ve na mutindu ya kutendula Yawu. Beno ke tuba, “Mpangi Branham, kana—kana nge. . .”

380 Mu zaba ve. Mu ke kwikila kaka. Mu me sukisa na kumeka, kusala kima mosi samu na Yawu. Mu ke kwikila Yawu kaka, yimeni. Beno me mona? “Ya kele ve yandi yina ke kima mbangu, to yandi yina zola; ya kele Nzambi ke lakisa mawa.” Beno me mona? Ya kele ve na nzila ya bisalu. Ya kele na nzila ya lemvo. Beno me mona? Mu ke kwikila kaka Yawu. Nzambi, ya me tala Yandi na kusala yina me bikana. Beno kwikila kaka Yawu, beno sala na nzila ya Yawu.

381 Nkunga yayi me zabana, mu kuwaka bawu kubula to kuyimba yawu awa to kisika mosi kuna:

Oh, zola ya Nzambi, ya bumvwama mpe ya
kuvedila!
Ya kukondwa lubakusu mpe ngolo!
Yawu ke vwanda ntangu nyonso,
Nkunga ya basantu mpe ya Bawanzio.

382 Kana muntu mosi ya bantalu, kumeka na kutendula yawu, to kumeka na kutalisa yawu na nzila ya malongi ya lukolo, yandi ke kuma kilawu. Beno lenda ve kusala yawu. Beno meka ve kusala yawu. Beno meka ve kutendula Yawu. Nzambi me luta lubakusu nyonso. Beno lenda ve kutendula Nzambi. Beno kwikila Nzambi kaka. Ya kele kinswe- . . . Ya kele kinsweki. Beno tendula Yawu ve. Beno kwikila Yawu kaka. Mu lenda ve kutuba na beno yina Yawu zola kutuba. Mu lenda ve kutuba na beno wapi mutindu kusala yawu. Mu zaba ti mu ke kwikila kaka Yawu. Yimeni.

383 Kaka mutindu beno ke sila kima mosi na mwana ya fioti, yandi ke kwikila yawu. Beno fwana zitisa ndinga ya beno. Beno kele mwana ya Nzambi. Yandi ke zitisaka Ndinga ya Yandi. Beno kwikila kaka Yawu. Beno ningana ve. Beno bikana kaka kuna. Kana Nzambi salaka yawu kilumbu mosi, Yandi fwana sala yawu dyaka. Kana Yandi sala yawu ve, Yandi ke tuba na beno samu na yinki Yandi lenda ve kusala yawu. Mpe ya kele kieleka. Ntangu yayi, beno vwanda kaka na Yawu.

384 Beno zaba, nzila yina kuna. . . Mu ke kwikila ti mpangi ya beto ya ntalu kuna, ba botikaka yandi mazono na nkokila, yimbaka nkunga yina, “Oh, zola ya Nzambi.” Ba tubaka na munu ti nzila yayi, kitini ya nkunga yayi, ba monaka yawu na kibaka ya yinzo ya bantu ya kimbevo ya yintu. Kisika yayi ke tuba:

Kana beto fulusa mubu na tinta,
To mazulu vwandaka buku;

Mpe konso mwinga na zulu ya ntoto disala,
 Mpe konso muntu musoniki;
 Kusonika zola ya Nzambi
 Ke yumisa mubu;
 To buku ya kuzibuka nsongi na nsongi ya
 mazulu,
 Lendaka ve kubaka nionso.

³⁸⁵ Beno banza na yawu. Ntangu, pene ya tatu na zulu ya yiya ya ntoto kele maza. Mpe beno tala hydrogène mpe oxygène yina kele na kati ya mipepe, madidi mpe nionso yankaka. Beno me mona? Kana konso madidi vwandaka tinta. Mpe beno banza na makiaza, mpe bamafunda na bamafunda ya mwinga, yina ke vwanda disala. Mpe beno banza na bamafunda ya bantu yina ke vwanda na zulu ya ntoto, mpe muntu nionso ke vwanda musoniki. Samu na kukotisa yawu na mubu, mpe kumeka na kutendula zola ya Nzambi, ke yumisa mubu; to buku lendaka ve kubaka nyonso, ata ti ya kele yinda Seko na Seko.

³⁸⁶ Beno tendula Yawu ve. Beno lenda ve. Beno ke zimbisa mabanza ya beno, kumeka kutendula Yawu. Beno kwikila Yawu kaka. Beno sala Yandi dikunzi ya beno. Beno bikana kuna, ngemba ya lembami mpe nzingulu yina beno ke zimbana ata fioti ve. Beno kangama na Yawu, mpe kizundu ya beno ke vwanda na kati ya vwale.

Beto kulumusa yintu ya beto.

“Wapi mutindu Nge kele nene! Wapi mutindu Nge kele nene!”

³⁸⁷ Bantu yikwa na kati awa, na bayintu ya beno ya kukulumusa na suka yayi. . . Beto ke na kubelama na Mvula ya Malu-malu ntangu yayi. Mpe beno vwandaka muntu ya nsambulu mingi, mpe ya kele mbote. Mu ke sepela na yawu, beno nionso. Mu ke ndima ti Nzambi ke sepela na yawu. Kasi beno me kuzwaka ntete ve nzingulu yina ya dikunzi?

³⁸⁸ Kima yina beno mekaka kaka ve na kukwikila, beno banzaka yawu kaka ve, kasi Kima yina pesaka beno mvutu, mpe na yina beno monaka luzingu ya beno kusoba na ntangu yina. Beno me mona, Ndinga ya Nzambi nionso, nsilulu nionso, me ndimama na “amen,” na yina beno ke kangama na dikunzi. Samu, beno bambuka moyo, Yandi tubaka, “Mazulu na ntoto ke luta, kasi Ndinga ya Munu ke kondwa ve.”

³⁸⁹ Beno me kuma ntete ve na kisika yina, kisika yina beno lendaka tuba “amen” na konso Ndinga, kana Yawu kele ya kuswaswana na credo ya beno, Yawu kele ya kuswaswana na denomination ya beno, kasi beno zola kuma na kisika yina, mutindu Moïse, mutindu bantu yankaka? Bawu lenda sala yawu ve tii kuna bawu ke kuzwa dikunzi yina. Mpe beno zola yawu na luzingu ya beno na suka yayi, beno lenda kaka kutuba mutindu mosi na kuzangulaka diboko ya beno na Nzambi?

Nzambi sakumuna beno. Mbote mingi, tata. Bisika nionso na kivinga.

³⁹⁰ Tata ya lemvo, mu zaba ti kilumbu mosi beto fwana kabwana. Ya fwana vwanda na ntangu yina beto ke katuka na yinza yayi. Beto zaba ve wapi ntangu yina, mpe ya ke sala luswaswanu mingi ve. Kana ntangu ya beto me kumana, na yina beto zola kwisa. Lukanu ya beto ya kuvwanda awa kele kusadila Nge.

³⁹¹ Mpe kubanda ntangu beto vwandaka na nzila yina ke twadisa na kubeba, kilumbu mosi, mutindu Paul vwandaka na nzila ya Damas, samu na kusala muvusu na Dibuundu, Nsemo kufwaka yandi meso. Mpe, O Nzambi, Nsemo yina vwandaka landa yandi, samu ti Yawu vwandaka Klisto. Mpe yandi kangamaka kuna na dikunzi, ti, ata mpe lufwa yawu mosi, yandi lendaka seka yawu na kizizi, mpe kutuba, “Matondo na Nzambi Yina pesaka beto lunungu na nzila ya Yesu Klisto.”

³⁹² Nge kumaka dikunzi ya muvimba samu na ntumwa yina. Yandi vwandaka . . . Nge vwandaka Amen samu na yandi, na konso nsasa. Nge vwandaka Mbwetete ya luzingu ya yandi, dikunzi-ntwadisi. Nge vwandaka boussole yina vwandaka twadisa yandi na kati ya kitembo. Nge vwandaka luzayikisu. Nge vwandaka vision. Nge vwandaka kivuvu ya yandi, mpulusu ya yandi. Ata mpe na ngunga ya lufwa, ntangu yandi zabaka ti yandi ke kwenda na yawu, Nge vwandaka kaka dikunzi ya yandi.

³⁹³ Nge vwandaka dikunzi ya Daniel. Nge vwandaka dikunzi ya baprofete nionso. Na kati-kati ya luswaswanu ya denomination, mpe bampasi ya bilumbu ya bawu, mpe ba-Pharisien mpe ba-Sadducéen, kasi ya vwandaka na bantu yina bakaka Nge mutindu dikunzi ya bawu.

³⁹⁴ Mpe bubu yayi, Mfumu, babakala mpe bakento yina ke na kukabula mpasi, na zola, mpe—mpe bantima yina ke basisa menga, Mfumu, samu na nzingulu ya kieleka ya kuzaba Nzambi, mpe kuvwanda na kivuvu ya dikunzi mosi. Mu banza ti bantu nionso zabaka, na ntwala, Mfumu, vwandaka kukuma mamebele ya dibuundu. Mpe beto me bakula, mutindu mu mekaka na, ya kieleka, ve samu na kuvwanda ya kuswaswana; Nge zaba ntima ya munu; kasi kutuba na bawu ti, “Beno lenda ve kukota na Dibuundu. Beno ke kotaka na loge, ba-loge ya ba-Methodiste, ya ba-Baptiste, ya ba-Katolika, mpe ya ba-Pentecotiste. Kasi beno ke butuka na kati ya Dibuundu, Nzutu ya mansweki ya Klisto, mpe beno ke kuma bamamebele ya Nzutu ya Yandi, na makabu ya Mpeve, samu na kusala Nzutu ya Yandi ya nene kukota na kusalu mpe na ngolo.”

³⁹⁵ Nzambi, yawu yina maboko yayi zola kutuba na suka yayi, ntangu bawu me telemisa yawu. “Tula munu, O Mfumu. Baka munu, mpapa munu, yidika munu. Sala ti kisika ya munu na

luzingu kuvwanda dikunzi mosi, ya kukangama na Klisto, ti mu ke banza ve na kima yankaka kasi na dikunzi yayi.” Pesa yawu, Mfumu. Sakumuna bawu. Belusa bambevo mpe bantu ya mpasi. Vulusa bayina me zimbana.

³⁹⁶ Ntangu yayi, Mfumu, beto zaba ti yawu kele mumesanu ya kubokila bantu na autel, kasi yina me kuma kinkulu samu na beto. Mpe na suka yayi, na ba-autel ya kifuluka, mpe bana ya fyoti mpe—mpe nyonso, kasi, Mfumu, na mutindu nyonso Nge me tuba na bawu. Bawu me telemisa maboko ya bawu. Ba me baka—ba me baka, na mutindu nionso, lukanu mosi. Bawu zola yawu. Bawu—bawu—bawu zola kima mosi ya kieleka. Mpe mu ke pesa kisambu ya munu samu na bawu. Pesa yawu na mosi na mosi, Mfumu. Vwanda na beto ntangu yayi, lemvočila masumu ya beto, belula bimbevo ya beto, mpe pesa beto luvukulu yina beto ke na yawu nsatu.

³⁹⁷ Mpe, Mfumu, na zulu ya bima nyonso, ti beto zimbana ata fioti ve, bubu yayi, ti beto me kangama na dikunzi, Mbwetete ya beto ya nord, na Calvaire, na Klisto. Mpe Mpeve-Santu ke na kubaka Bandinga ya Nzambi mpe ke sala ti Yawu monana pwelele na beto, na kubeluka ya bambevo, na kutalisa beto b- vision, na kuvumbula bantu ya kufwa, mpe ke sala kieleka yina Yandi silaka na kusala.

³⁹⁸ Mpe bika ti dibuundu yayi, mpe bantu yayi, to ndambu ya Nzutu ya Klisto yina me vukana awa na suka yayi, kuzinga mutindu Yesu tubaka na kuzinga. “Beno kele mungwa ya ntoto.” Mpe bika ti bawu vwanda na mungwa mingi ti bantu ya kizunga ya bawu ke vwanda na mpwila. Mungwa ke pesaka mpwila. Mpe mungwa lenda kaka kubumba mutindu yawu ke kutana. Mpe mu ke sambila, Nzambi, ti Nge ke pesa yayi na bantu, samu bawu kuvwanda bayina ke nunga myoyo, mpe.

³⁹⁹ Sakumuna pasteur ya beto, Mpangi Neville, kisadi yayi ya kukikulumusa, Mfumu. Yandi ke vwandaka na kisika ya yandi ya kusalu, na luzitu nionso, mutindu mambele ya Nzutu ya Klisto, na kumekaka na mutindu nionso na kulanda nionso yina Nge ke tuba na yandi na kusala.

⁴⁰⁰ Sakumuna ba-administrateur, babakala yayi telemaka na munu na bulemvo na ntangu yayi ya mudidi, kasi ya mfunu yina mu me luta.

⁴⁰¹ Vwanda na Dibuundu yina sambilaka na munu mpe telemaka pene-pene ya munu na bantangu ya mpasi. Mfumu, mu zola bawu. Mpe mu ke pesa kisambu ya munu, ti bawu ke tala na Nge, Mfumu. Bika bawu kutala ve na kitini ya ntoto yayi me sala kisadi yayi ke kufwa. Bika bawu kutala na Yandi Yina kele na Ngolo nionso, Yina kele. Mpe beto zaba, Mfumu, ti beto kele na nsuka. Ata nani beto kele, beto kele kaka bantu yina ke kufwa. Kasi, munati-nsangu ve, kasi Nsangu. Pesa yawu, Mfumu. Ya kele kisika yina beto ke lakisa, na Yesu Klisto Mwana

ya Nzambi. Pesa ti Yandi ke vwanda ya kieleka mingi na mosi na mosi awa bubu yayi, ata mpe samu na bana ya fioti, ti Yandi ke kuma dikunzi samu na dibuundu ya muvimba. Beto ke lomba yawu na Nkumbu ya Yesu. Amen.

Mu zola Yandi, mu zola Yandi
Samu Yandi zolaka munu ntete
Mpe futaka mpulusu ya munu
Na yinti ya Calvaire.

⁴⁰² Ntangu yayi, na yina beto ke yimbila yawu diaka, beno pesa mbote na muntu yina kele na ntwala ya beno, na manima ya beno, na lweka ya beno, beno pesana mbote na muntu nyonso ntangu yayi. Beno bikana kaka ya kuvwanda. Beno baluka mpe beno pesa mbote, kana beno lenda. Beno me mona?

Mu . . . (. . . ? . . .)
. . . futaka ya munu . . . ? . . .

Ba me zabisa kaka, “Mbundana, na Kilumbu ya ntete, na kati-kati ya mpimpa.”

⁴⁰³ Beto telemisa maboko ya beto ntangu yayi mpe beto yimba na Yandi. Bantu yikwa, bantu yikwa ke na kuwa (beno) Yandi kele dikunzi ya beno? [Dibuundu me tuba, “Amen.”—Mu.] Ndinga, Yandi kele Ndinga. Beno ke kwikila yawu? [“Amen.”] Yandi kele Ndinga. Mpe Mpeve-Santu me butisa Ndinga yayi, samu na kusala ti Nsemo yayi, ya Ndinga, kuzinga na kati ya beno, nsiamisa ya Ndinga. Beno tula Ndinga na kati ya ntima ya beno. Bika ti Mpeve-Santu kukota, mpe beno tala Ndinga ke tambula. Beno kwikila. Beno vwanda ya kukilumusa. Beno vwanda ve na nsatu ya kuvwanda muntu mosi ya nene. Beno vwanda muntu mosi ve, ti Nzambi lenda sala beno muntu mosi. Beno me mona? Mbote mingi. Beno sala yawu ntangu yayi.

⁴⁰⁴ Muntu nyonso zola Yandi? Beno tuba, “Amen.” [Dibuundu me tuba, “Amen.”—Mu.] Beno zaba yinki mpova yayi *amen* zola kutuba? “Na yina beno vwanda mutindu yina.” Amen. Ya kieleka.

⁴⁰⁵ Beto tuba, “Alleluia!” [Dibuundu me tuba, “Alleluia!”—Mu.] Beno zaba yinki ya zola kutuba? “Lukumu na Nzambi ya beto.”

⁴⁰⁶ Ntangu mu vwandaka na Allemagne ntama mingi ve, mu telemaka na ntwala ya bantu, pene, ya mafunda makumi tanu to makumi yiya kuna kilumbu yina, mpe mu tubaka, “Ya kele kima ya ngitukulu ti beno bantu ya Allemagne lenda ve kubakula.” Mu tubaka, “Ntangu mu vwandaka kwisa awa bubu yayi, yimbwa me boka na manima ya munu na Kingelesi. Ya kele kieleka.” Mu tubaka, “Yandi vwandaka na mpasi ve. Mpe ndeke mosi vwandaka kuna, mpe yandi yimbaka samu na munu na Kingelesi. Mu landaka nzila, mpe mama mosi vwandaka na bébé na maboko ya yandi, ntangu mu vwandaka kwisa awa kuna na manima, mpe,” mu tubaka, “bébé yina vwandaka dila na Kingelesi. Yinki kele diambu ya beno bantu?” Ya kieleka. Oh,

kana beno tala kaka na nziunga, Yandi kele bisika nionso, Yandi kele ve mutindu yina? Ya kieleka, Yandi kele.

⁴⁰⁷ Ntangu yayi beto telemisa kaka maboko ya beto mpe beto kanga meso ya beto, mpe beto yimbila, na yina beto ke lomba pasteur na kukwisa samu na kusukisa.

Beto telama, ntete. Muntu nionso kutelama, muntu nionso.

⁴⁰⁸ Beno zola Yandi? Dyaka ntangu yayi beno tuba, “Amen.” [Dibuundu me tuba, “Amen.”—Mu.]

⁴⁰⁹ Mpe beno zaba, mpova yayi *alleluia* kele mutindu mosi na bandinga nionso. Beno kwenda na bamfinda ya nene ya ba-Hottentot na Afrika, *alleluia* kele mpova ya mutindu mosi. *Alleluia*, ya zolaka vwanda kaka mutindu ya kupesana mbote ya Baklisto. Mutindu yina ve? *Alleluia*, mpova yayi zola kutuba “lukumu na Nzambi ya beto.” Mpe Yandi kele ya kulunga samu na yawu, Yandi kele ve mutindu yina? Yandi kele kieleka Mvulusi ya munu. Yandi kele kieleka Yesu Klisto, Mwana ya Nzambi, samu na munu. Yandi kele kieleka “mutindu mosi mazono, bubu yayi, mpe kukonda nsuka,” samu na munu. Yandi kele mutindu yina samu na beno?

Mu zola Yandi, mu zola Yandi
Samu Yandi zolaka munu ntete
Mpe futaka... (Nzambi kusakumuna nge,
Mpangi-bakala.)



DIKUNZI KNG62-1230M
(Absolute)

Nsangu yayi ya Mpangi William Marrion Branham, kulongamaka na Kingelesi, na Lumingu na suka, na kilumbu ya 30 ya Ngonda ya kumi na zole, na mvula 1962, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2022 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org